

আট-দ্বারী-সংস্করণ-গ্রন্থমালার একবিংশ গ্রন্থ

---

# মধুপর্ক

শ্রীহেমেন্দ্র কুমার রায়

---

-কার্তিক, ১৩২৪

**PUBLISHED BY**  
**.GURUDAS CHATTERJEA**  
**OF MESSRS. GURUDAS CHATTERJEA & SONS.**  
**201, Cornwallis street, Calcutta.**

**PRINTED BY**  
**RADHASYAMI DAS**  
**AT THE VICTORIA PRESS**  
**2, Goabagan Street, Calcutta.**

মধুপক



## উন্মাদ

আমাকে উঠিতে দেখিয়া শচীশ বলিল, “সে কি ? এরি মধ্যে ! এলে যখন, গারদটা দেখেই যাও একবার !”

আমি বলিলাম, “সে কথা মন্দ নয়,—চল ।”

শচীশ আমার বাল্যবন্ধু। এখন পাগ্লা গারদের ডাক্তার। কার্যাগতিকে এ অঞ্চলে আসিয়া পড়াতে অনেকদিন পরে তার সঙ্গে সাক্ষাৎ।

কত রকমের পাগলই যে দেখিলাম ! কেহ ‘শিবনেত্র’ হইয়া ‘বোম্-ভোলানাথে’র মতই ধ্যানাসনে বসিয়া আছে, কেহ হাসিতেছে কাঁদিতেছে, কেহ নাচিতেছে গায়িতেছে, কেহ বা চৈচাইয়া আকাশ ফাটাইতেছে ! একজন আমাকে—গম্ভীর-ভাবে কাছে ডাকিয়া চুপিচুপি কাণে কাণে বলিল, “আপনি যদি কারুকৈ কিছু না বলেন, তাহলে একটি ভাল খবর দিতে পারি।”

আমি বলিলাম, “আচ্ছা, কারুকৈ বল্ব না—বলুন।”

## মধুপর্ক

পাগল বলিল, “আপনি কি রাতারাতি নবাব হতে চান ?”

—“খুব চাই !”

—“শুনুন তবে । দেখবেন—কারুকে বলবেন না কিন্তু ! আমি যথের ধনের সন্ধান পেয়েছি । সাতঘড়া মোহর—এক বাক্স হীরে-জহরৎ ! কোথায় আছে, আপনাকে বলে দেব ।”

আমি বলিলাম—“বলুন ।”

সে বলিল—“একি ফস্ করে বলে ফেলবার কথা ! আহুন, আগে একটু বসুন—বিশ্রাম করুন—তারপর ধীরে-স্বস্ত্রে একে একে সব বলচি !”

আমি হাসিয়া বলিলাম, “আচ্ছা, পরে আর একদিন এনে সব শোনা যাবে । আজ আর সময় নেই ।”

আর এক জায়গায় দেখিলাম, একটি লোক একখানা কাঁচ লইয়া জলে ডুবাইতেছে, শানে ঘষিতেছে আর মাঝে মাঝে কাঁচখানা একচোখ বুজিয়া দেখিতেছে ।

আমি তাকে অনেক ডাকিলাম, সে কিন্তু একবার মুখও তুলিল না—আমার কথার উত্তরে একটি টু শব্দও করিল না ।

শচীশ বুঝাইয়া দিল, “এঁর বিশ্বাস, ইনি শীঘ্রই বিজ্ঞান-

## উদ্ভাস

রাজ্যে যুগান্তর উপস্থিত করবেন। ঠুর ব্রত, ঐ কাঁচখানাকে মেজেঘষে একেবারে খাঁটি হীরে করে ফেলা। যতদিন এ মহৎ ব্রত-উদ্ঘাপন না হয়, এঁর দৃঢ়পণ, ততদিন ইনি মৌনী থাকবেন।”

আর একজন আমাকে ডাকিয়া বড়ই দুঃখিতভাবে নালিশ জানাইল, “মশাই, এরা ‘জিনিয়াসে’র ওপরে কি রকম যাচ্ছেতাই জবরদস্তি করে, জানেন?”

আমি বলিলাম, “কি-রকম?”

সে তার মাথাটি ঘুরাইয়া ফিরাইয়া দেখাইয়া বলিল, “দেখুন, মশাই দেখুন! এরা আগার মাথার চুল খাটো করে ছেঁটে দেয়, আমার গানা মানে না। মাথায় বাবুরি-কাঁটা চুলই যদি না রছিল, লোকে আমাকে তবে কবি বলে চিন্বে কিসে, বলুন ত?”

আমি হাসি চাপিয়া বলিলাম, “তা যা বলেছেন!”

পাগল খুসী হইয়া বলিল, “আপনাকে রসিক বলে আমার সন্দেহ হচ্ছে। আরো শুনুন, আমি কাগজ কলম চাইলে এরা তা কিছুতেই দেয় না, উণ্টে দাঁত বার করে হাসে। হায়, হায়, কাগজ-কলমই যদি না রছিল, কবি তবে কেমন করে কবিতা লিখবে—কেমন করে দুঃখিনী বঙ্গভাষার মুখোজ্জল করবে? এরা ভাবে আমি বুঝি পাগল—”

## মধুপর্ক

তার কথা শেষ হইতে না হইতেই আমি সুরিয়া পড়িলাম।  
পাগল কবি আমাকে ডাক দিয়া বলিল, ‘আ আমার  
কপাল! আপনিও ঐ দলে? মশাই, যাবেন না—যাবেন  
না! পাগলের সঙ্গে ‘জিনিয়াসে’র কতকটা যে সম্পর্ক, আগে  
সেটা প্রাঞ্জল ভাষায় ব্যাখ্যা করে প্রাণ জল করে দি  
আনুন।’

শচীশ বলিল, “ইনি ভাবেন, কবিতা লিখলেই ডাল-  
ছেঁড়া পাকা আমের মত ‘নোবেল-প্রাইজ, এঁর হস্তগত  
হবে। এঁর মনে দৃঢ় ধারণা, পাছে ইনি ‘নোবেল-প্রাইজ’  
পেঁয়ে যান, সেই হিংসায় রবি-ঠাকুরই ষড়যন্ত্র করে এঁকে  
এখানে নির্বাসিত করে রেখেছেন!”

বাস্তবিকই,—এ এক নতুন দুনিয়া, এখানে সমস্তই আজব  
ব্যাপার! সকলেই এখানে সুখী—কেননা, এদের বিশ্বে বাস্তব  
বলিয়া কোন-কিছু নাই। আপনাদের বাসনাকে এঁরা  
ভাস্কিয়া-চুরিয়া যেমন ইচ্ছা তেমনি করিয়া গড়িতেছে—যুক্তি,  
কারণ ও সহজজ্ঞানের কোন ধার ধারে না বলিয়া ‘অসম্ভব’  
কথাটি এদের অভিধান হইতে মুছিয়া গিয়াছে!

সামনেই একটি ঘর। প্রথমে ভাবিয়াছিলাম, ঘরে কেউ  
নাই; কিন্তু তার পরেই দেখিলাম, এককোণে আধা-অন্ধকারে  
আবছায়ার মত একটি মূর্তি, একেবারে যেন দেয়ালের সঙ্গে

মিথিয়া স্তম্ভভাবে বসিয়া আছে। বিশীর্ণ তার দেহ—বিষম  
তার মুখ!

আমাদের পায়ের শব্দে চমকিয়া, সে মুখ তুলিয়া চাহিল।  
শচীশকে দেখিয়া, তার কোটরগত অর্ধনিমীলিত চক্ষুদুটি  
একটু উজ্জ্বল হইয়া উঠিল। আশ্বে-আশ্বে বলিল, “কে,  
ডাক্তার?”

সে স্বর কি মানুষের? এমন অমানুষিক স্বর আমি  
জীবনে আর কখনো শুনি নাই!

শচীশ বলিল, “এখন কেমন আছেন?”

একটু ম্লান হাসি হাসিয়া, সে উঠিয়া দাঁড়াইল। তার  
পর পা-দুটো যেন কোনমতে টানিয়া টানিয়া আমাদের কাছে  
আসিয়া, শচীশের দিকে অস্থিচর্মসার একখানা হাত বাড়াইয়া  
দিয়া বলিল, “দেখুন।”

এতক্ষণে ভাল করিয়া লোকটার চেহারা দেখিয়া আমার  
গা শিহরিয়া উঠিল। হঠাৎ দেখিলে মনে হয়, যেন শ্মশানের  
মড়াকে তুলিয়া আনিয়া ভুতুড়ে বিদ্যায় কে ত্রাহাকে জীবন্ত  
করিয়া চলাইতেছে, ফিরাইতেছে! ওঃ, আর তার সেই  
বুকের ও কণ্ঠার হাড়গুলা! সেগুলার উপরে যেন মাংসের  
লেশমাত্র নাই—প্রতি নিশ্বাসেই ভয় হয়, উপরকার পাতলা  
চামড়ার ঢাকনি ফুড়িয়া এই মুহূর্তেই তাহারা বুঝি বাহির

## মধুপর্ক

হইয়া পড়িবে ! আমি স্তম্ভিতনেত্রে তাহার দিকে চাহিয়া কাঠ্ হইয়া দাঁড়াইয়া রহিলাম ।

শচীশ তাহার হাত ধরিয়া যতক্ষণ তার নাড়ী পরীক্ষা করিতে লাগিল, ততক্ষণ সে উদ্বিগ্নে ও আগ্রহে বিস্ফারিত-চক্ষে শচীশের মুখের দিকে চাহিয়া রহিল ।

শচীশ বলিল, “আপনার নাড়ীতে এখনো জ্বর আছে ।”

কিঞ্চিৎ নিশ্চিন্ত হইয়া সে বলিল, “বুকটা দেখ ত ডাক্তার !”

শচীশ তাহার বুকটা খানিকক্ষণ পরীক্ষা করিয়া বলিল, “আপনার যক্ষ্মারোগ হয়েছে ।”

রোগী একটা আশ্বস্তির নিশ্বাস ফেলিয়া, আপন মনে মৃদুস্বরে বলিল, “আঃ ! বাঁচলুম !” তারপর সে আবার ঘরের কোণে গিয়া বসিয়া পড়িল ।

বাহিরে আসিয়া শচীশকে জিজ্ঞাসা করিলাম, “কি ভয়ানক ! একে শচীশ ?”

শচীশ বলিল, “আশ্চর্য্য পাগল ! বছরের আর ক-মাস এ-লোকটি সহজ মানুষের মত থাকে ; কিন্তু যতই বর্ষা ঘনিয়ে আসে, এর পাগলামিও তত বিষম হয়ে ওঠে । তখন ওর কাছে ঘেঁষে, কার সাধ্য !”



আমি জিজ্ঞাসা করিলাম, “যক্ষ্মারোগ হয়েছে শুনে লোকটা অমন খুসী হয়ে উঠল যে ?”

শচীশ হাসিয়া বলিল, “যক্ষ্মা-টক্ষ্মা ওর কিচ্ছু হয় নি। ও আমার মিছে কথা।”

—“সেকি-হে ?”

—“হ্যাঁ ; আমি যদি বলতুম, ‘আপনি ভাল আছেন’— তাহলে ও রসাতল কাণ্ড বাধিয়ে দিত। তারপর খাওয়া দাওয়া ছেড়ে হয়ত উপোস করেই মরে যেত। প্রথম যখন এখানে ডাক্তার হয়ে আসি, তখন ওর হাল-চাল জানা না থাকাতে ভারি মুশ্বিলেই পড়া গিয়েছিল।”

আমি বিস্মিত স্বরে বলিলাম, “এ-রকম পাগলের কথা কখনো শুনি-নি।”

শচীশ বলিল, “ভদ্রবংশে লোকটির জন্ম, বেশ ভাল লেখা-পড়াও জানে। ওর জীবনের কথাও অদ্ভুত। গেল-বছরে ওর পাগলামি যখন বেড়ে ওঠেনি, আমি তখন কোতূহলী হয়ে একদিন ওর পরিচয় জিজ্ঞাসা করি। সে-দিন সে কিচ্ছু বললে না বটে, কিন্তু দিনকতক পরে ওর হাতে-লেখা মস্ত এক চিঠি পেলুম। তাতে ওর নিজের কথা সব খুলে লেখা ছিল।”

আমি আগ্রহের সহিত বলিলাম, “সে চিঠি তুমি ছিড়ে ফেল-নি ?”

## মধুপর্ক

—“না, সে ছিড়ে ফেলবার চিঠি নয়। সত্যিই মিথ্যে জানিনা, কিন্তু সেই কাগজ-ক-খানায় যা লেখা আছে, তা অতি ভয়ানক ব্যাপার। হয়ত তাতে পাগলের প্রলাপও কিছু কিছু আছে। কারণ আমার বিশ্বাস যে, চিঠিতে ও-লোকটি যে সব ঘটনার কথা বলেছে, সে ঘটনাগুলি ঘটবার আগেই ওর মাথায় পাগলামির ছিট্ ঢুকেছিল। তুমি বোধ হয় জান লোকে যখন প্রথম পাগল হয়, তখন কোন একটা বিশেষ বিষয়ে তার অস্বাভাবিক ঝাঁক পড়ে। সে অবস্থায় প্রথম প্রথম সে কার্যকারণের জ্ঞান হারায় না। কিন্তু, তারপর সেই ঝাঁকটা ক্রমে যতই বেশী হয়ে উঠতে থাকে, উন্মাদ-রোগ ততই তার ঘাড়ে চেপে বসে। হয়ত এ লোকটিরও সেই দশা হয়েছিল—চিঠি পড়লে তুমিও তা বুঝতে পারবে। তুমি কি সে চিঠি পড়তে চাও? বিশ্বাস কর না কর, সে পড়বার মত চিঠি বটে!

আমি বলিলাম, “পড়ব বৈকি!”

\* \* \* \* \*

শচীশের বৈঠকখানায় পাগলের পত্র লইয়া ইজিচেয়ারে শুইয়া পড়িলাম। চিঠিতে যা লেখা ছিল, তা এই :—

“ডাক্তার,

আমি যে পাগল, আমার এই পরিচয়ই কি যথেষ্ট নয়?—

পাগলের কথায় কে বিশ্বাস করবে? তোমার গারদে কত লোক আছে, তাদের কেউ মনে করে 'আমি সম্রাট', কেউ মনে করে 'আমি কবি', কেউ মনে করে 'আমি দেবতা',— কিন্তু তোমরা জান, তারা শুধু পাগল,—খেয়ালের স্বপনে মসৃণ হয়ে আছে। তোমরা সে সম্রাটদের হাত থেকে রাজ-দণ্ড কেড়ে নিয়েছ, কবিদের বাণীর কমলকানন থেকে নির্ঝাসিত করেছ, দেবতাদের ফুল-চাল-কলা থেকে বঞ্চিত করে রেখেছ। তাদের মুখের কথাকে তোমরা সম্রাটের হুকুম বা কাব্যের শ্লোক বা দেবতার অভিশাপ বলে ভ্রম কর না। তাদের কথা তোমরা তুড়ি মেরে স্রেফ উড়িয়ে দাও— আমার কথাতেই বা তোমাদের বিশ্বাস হবে কেন? তবু আমার কথা কেন যে তুমি জানতে চেয়েছ তাই ভেবে আমি আশ্চর্য হয়ে যাচ্ছি।

কিন্তু, জানতে যখন চেয়েছ, আমি যতটা পারি সব খুলে লিখব। মনের কথা মনে চেপে রাখায় বড় কষ্ট। পাগলরা তা পারে না বলেই তারা এত দিন-খোলা হয়। আমি এখনো পাগলের সব গুণে গুণী নই,—মনের কথা তাই মনেই চেপে রাখতে পারি। কিন্তু এ কথা চাপবার চাপ মনকে আমার জঁতাকলের মত পিষে ফেলছে—এতদিন তাই যা পারি-নি, আজ তা করব। সব তোমাকে বলব। বিশ্বাস কর

## মধুপর্ক

ভালই,—না-কর পাগলামি বলে উড়িয়ে দিও ; আমি সুধু বলে খালাস হতে চাই ।

আর এক কথা । আমি পাগলা গারদে আছি বটে, কিন্তু এখন ঠিক পাগল নই । তুমি-ত জান, বর্ষাকালটায় উন্মাদ-রোগ এসে আমার ঘাড়ে চেপে বসে । কিন্তু অন্তঃসময়ে আমি আর পাগলামির স্বপ্ন দেখি না । এ-সময়টায় মনে হয়, আমি যেন সবে ঘুম থেকে জেগে উঠেছি ; কেন মনে হয় জানি না,—কিন্তু, মনে হয় । সবে ঘুম ভাঙলে মানুষের দেহ যেমন একটা অলস জড়তায় আচ্ছন্ন হয়ে থাকে, আমিও তেমন আচ্ছন্ন হয়ে থাকি । পাগলামি না থাকলেও আমি যে এই সময়টাতে একেবারে সহজ মানুষ হয়ে উঠতে পারি না, তার মূলে, ঐ জড়তা ! এ-সময়টায় আমি ভাবতে পারি, সে ভাবনায় একটা কার্য-কারণের ধারা পাই—যে ধারা পাগলের চিন্তায় থাকে না । এইতেই বুঝি, এখন আমি পাগল নই ।

ছেলেবেলাতেই বাপ-মা আমার মারা যান,—আমি মানুষ হয়েছি মামার-বাড়ীতে । শুনেছি বাবা মরবার আগেই পাগল হয়েছিলেন । আমার অতি-বৃদ্ধ পিতামহও পাগল ছিলেন । কাজেই বোঝা যাচ্ছে, আমাদের বংশে পাগলামির চর্চা হচ্ছে পুরুষানুক্রমে । মামাদের দৌলতে আমি বি-এ পাশ দিয়ে বিয়ে করি । তারপর নিজদের গ্রামে ফিরে গিয়ে

সংসার প্রাতি-বাহির লোহার সিন্দুকে যা ছিল, তা নিয়ে বড়মানুষী করতে না পারলেও মোটা ভাতকাপড়ের অকুলান হল না। বলে রাখা ভাল, মামারা ছাড়া আমার আর কেউ আত্মীয়-স্বজন ছিলেন না।

ক-বছর কাটল বেশ।

নির্মলা অল্পবয়সেই পাকাগিন্নী হয়ে উঠেছিল; তার যত্নে আমার গৃহস্থালীতে সর্বদাই লক্ষ্মী-শ্রী বিরাজ করত। আমাদের আর-কোন দুঃখ ছিল না—কেবল একটি সন্তানের অভাবে নির্মলা মাঝে-মাঝে মুখখানি ভার করে থাকত।

নির্মলা যে সূধু গুণে লক্ষ্মী ছিল, তা নয়; রূপেও সে ছিল সরস্বতীর মতন। যেমন মুখ, তেমনি রং, তেমনি গড়ন,—আমার মত গৃহস্থের সংসারে সে-ধেন ভান্নাঘরে চাঁদের আলো! তাকে নিয়ে আমিও কিছু বিব্রত হয়ে থাকতুম। কেন, তা বলছি।

নির্মলার রূপের খ্যাতি সারা গাঁয়ে রটে গিয়েছিল। পাড়ার কতকগুলো বকাটে ছোঁড়াকে আমার বাড়ীর আঁনাচে-কানাচে ঘুরে বেড়াতে দেখতুম। ছু-চারখানা উড়ো চিঠিও আমার বাড়ীর মধ্যে এসে পড়েছিল। অবশ্য, সে-সব চিঠির কথা আমি টের পেতুম না,—নির্মলা নিজেই যদি সেগুলো এনে আমাকে না দেখাত।

## মধুপর্ক

ডাক্তার! স্পষ্ট কথা বলতে কি—স্ত্রীলোককে আমি তেমন ভাল চোখে দেখতুম না। নারী, ঘরের লক্ষ্মী হতে পারে,—কিন্তু লক্ষ্মীর মতই সে চঞ্চলা—কখন্ যে কার উপর সদয় হবে, শিবের বাবাও বলতে পারেন না। শত্রু পুরুষের পাল্লায় না পড়লে রমণী কখনো ঠিক থাকতে পারে না—এই ছিল আমার ধারণা। যে বাগানে মালীও নেই, বেড়াও নেই, সে বাগানের ফুল যে আর-পাঁচজনে লুঠে নেবে—এ ত জানা কথা। কামিনীফুলকে চোখে-চোখে রাখতে হয়,—নইলে, কোন্‌দিন দেখবে, হয়ত তোমার গলার মালা অন্তের গলায় হুলুছে!

সুতরাং নির্মলাকে আমি পৈ-পৈ করে মানা করে দিতুম, অন্যের আড়াল থেকে সে যেন কোনমতে বাইরে না বেরিয়ে পড়ে।

নির্মলা কথা বড় বেশী কইত না—উত্তরে একবার ‘আচ্ছা’ বলেই অণু কাজে চলে যেত।

ঘরের দিকে এবং পরের দিকে—দুদিকেই আমার দৃষ্টি ছিল সমান সতর্ক। “কোলে থাকিলেও নারী রেখ সাবধানে”—এটা বোধ হয় কবি ঠেকে শিখেছিলেন, কেননা, এর-চেয়ে খাঁটি কথা আর হতে পারে না।

একদিন ভিন্-গাঁ থেকে ফিরে আসছি; বাঁড়ীর কাছে এসে,

দেখি, একটা ছোঁড়া কাঁইরে থেকে দরজারি ফাঁক দিয়ে আমার বাড়ীর ভিতরপানে কি দেখছে। কি যে দেখছে, তা বুঝতে আমার দেরি হল না। এখানে কথার চেয়ে গায়ের জোরের দাম বেশী। এতএব, আমি ছুটে গিয়ে তার গণ্ডে এমন এক প্রচণ্ড চড়কসিয়ে দিলাম যে সামলাতে না পেরে দড়াম করে সে, মাটির উপরে পড়ে গেল। একেবারে অজ্ঞান! সেই অজ্ঞানতা থেকে গ্রামের আর আর সকলেই পরম জ্ঞানলাভ করলে; কেননা এরপর হতে আর কারুকে আমার বাড়ীর ত্রিসীমানায় উঁকিঝুঁকি মারতে দেখি নি। আমিও জেনে রাখলুম, এ লোকগুলোর রূপের প্রতি তৃষ্ণা যত, কিল-চড়ের প্রতি বিতৃষ্ণাও তত। এদের ফুল তোলবার সখ আছে বিলক্ষণ—কিন্তু কাঁটা দেখলেই হাত-গুটিয়ে পিছিয়ে দাঁড়ায়। দুনিয়ার কত সাধু যে শুধু এই কাঁটার ভয়েই দায়ে পড়ে সাধু,— তা ঠিক করে বলা দায়!

একদিন বিকালে বাড়ীর স্মুখে পাইচারি করছি,—  
ইঠাৎ দেখলুম এ-দিকপানে একজন লোক আসছে।

লোকটি বয়সে যুবা, দেখতেও সুশ্রী। চোখে সোনার চশমা, হাতে বাঁধানো ছড়ি—পরনের কাপড়-চোপড় দেখলে বোঝা যায়, বাবুআনার দিকে লোকটির ঝোঁক আছে ষোল আনা। ছেলেবেলায় পরের বাড়ীতে পরের খেয়ে মানুষ

## মধুপর্ক

হয়েছি, নিজে কখনো বাবুআনার দায়না ধরবার সুবিধা পাইনি। এইজন্মে কিনা জানি-না,—যারা বাবুআনা করত তারা ছিল আমার চোখের বিষ। কাজেই এই সভ্য-ভব্য নব্যবাবুটির প্রতি গোড়া থেকেই আমার মন চটে গেল।

লোকটা বরাবর আমার সম্মুখে এসে দাঁড়াল। ছড়ি দিয়ে আমার বাড়ীটা দেখিয়ে সে বললে, “এ বাড়ীখানা কার মশাই?”

আমি শুষ্ক স্বরে বললুম, “মশায়ের সে খোঁজে দরকার?”

লোকটি একটু অপ্রস্তুত হয়ে বললে, “না, না,—এটা কি বিনয়বাবুর বাড়ী—আমি তাঁকেই খুঁজছি।”

“মশায়ের আসা হচ্ছে কোথা থেকে?”

“আমি সম্প্রতি এখানকার সরকারী হাসপাতালের ডাক্তার হয়ে এসেছি।”

লোকটি পদস্থ বটে! কাজেই একটু নরম হয়ে বললুম, “আজ্ঞে, আমারই নাম বিনয়বাবু।”

আগন্তুক একবার আমার পা থেকে মাথা পর্য্যন্ত চোখ বুলিয়ে নিয়ে বললে, “আপনিই নির্মলার স্বামী? নমস্কার বিনয়বাবু, নমস্কার!”

হুঁ! ‘বিনয়বাবু’ বলতে এ ঠিক করে নিলে,—‘নির্মলার স্বামী’! অর্থাৎ পষ্ট বোঝা যাচ্ছে যে, নির্মলাকে এ চেনে



এবং কান টানলে মাথা আসে বলে, 'বিনয়বাবু'কে এ খুঁজছে  
নির্মলারই খোঁজ পাবার জন্যে !

আগন্তুক বললে, "তাহলে বিনয়বাবু, বাড়ীর ভিতরে একবার  
দয়া করে বলে আসুন গে, যে ললিত এসেছে দেখা করতে ।"

কে এ ললিত ?—ভাবতে-ভাবতে অন্তরে গেলুম । নির্মলা  
তখন বসে বসে একটা বেড়ালের গলায় ঘুঙ্গুর পরাচ্ছিল ।

আমি বললুম, "হ্যাঁগা, ললিত নামে কারকে তুমি  
চেন ?"

নির্মলা একবার চম্কে উঠল । সে চম্কানি আমার  
চোখ এড়াল না ।

"বেড়ালটাকে ছেড়ে দিয়ে নির্মলা বললে, "কেন গা ?"

নির্মলার মুখ-চোখের উপর নজর রেখে আমি বললুম,  
"ললিত বলে একটি লোক তোমার সঙ্গে দেখা করতে  
এসেছে । কে সে ?"

নির্মলার মুখ প্রথমে কেমন-একরকম হয়ে গেল । তার-  
পরেই সে কিন্তু খুব খুসী হয়ে উঠল । বললে, "ললিত এসেছে ?  
যা ও, যা ও, ডেকে আন এখানে !

আমি অটলভাবে বললুম, "যা জিজ্ঞেস করলুম—তার  
জবাব কৈ ? ললিত তোমার কে হয় ?"

নির্মলা একটু খতমত খেয়ে বললে, "ললিতের বাপের

## মধুপর্ক

সঙ্গে আমার বাবার খুব বন্ধুত্ব ছিল। ললিত আমাকে ছেলেবেলা থেকেই জানে।”

আমি খানিকক্ষণ চুপ করে দাঁড়িয়ে রইলুম। তারপর স্থিরস্বরে বললুম, “ললিত ছেলেবেলা থেকে তোমাকে যখন জানে, তখন এটাও বোধ হয় জানে যে, তুমি এখন পরস্ত্রী। সে তোমার আত্মীয় নয়, তার সঙ্গে তোমার দেখা হওয়া অসম্ভব।”

নির্মলা কাঠের পুতুলের মত ঘাড় হেঁট করে বসে রইল। বাইরে গিয়ে ললিতকে বললুম, “আমার স্ত্রী এখন পাড়ায় নেমন্ত্নে গেছে।”

ললিত একবার আড়চোখে আমার দিকে চাইলে; বললে, “আচ্ছা, কাল আমি আবার আসব এখন।”

—“ললিতবাবু! কাল সে তার বোনের বাড়ী যাবে; ফিরতে রাত হবে। তার সঙ্গে আপনার দেখা হল না বলে আমি দুঃখিত।”

সে বললে—“নির্মলার— বোন? সে কি রকম! সে ত এখানে থাকে না!”

আমি খতমত. খেয়ে বললুম—“আপনার বোন নয় - দূর-সম্পর্ক!”

আমার দিকে ব্যঙ্গদৃষ্টি নিক্ষেপ করে আর কিছু না বলে

ললিত ছুড়ি ঘোরাতে-ঘোরাতে চলে গেল। বেশ বুঝলুম,  
আমার চালাকি সে ধরে ফেলেছে।

বাড়ীর দিকে ফিরিবামাত্র দেখলুম, ছাদের এক-কোণে  
লুকিয়ে নির্মলা দাঁড়িয়ে আছে। ওখানে কেন সে?—ললিতকে  
দেখছিল?

মনে মনে নিজের বুদ্ধিকে ধন্যবাদ দিলুম। ভাগ্যে  
পতঙ্গের সামনে আগুনকে আনি-নি।

নির্মলার এক বোন ছিল, নাম কমলিনী। সে আজ  
এক বছর হল, বিধবা।

হঠাৎ একদিন খবর এল, কমলিনী কুলত্যাগ করেছে।

খবরটা শুনে আমি কিছুমাত্র আশ্চর্য হলুম না! এত  
স্বাভাবিক!

আরও সাবধান হলুম। কমলিনী যে রক্তে জন্মেছে,  
নির্মলার দেহেও ত সেই রক্তই আছে! অতএব—

অতএব বাগানের মালীকে সতর্ক হতে হবে।

নির্মলা মাঝে-মাঝে পাড়ার মেয়ে-মহলে তাস খেলতে  
যেত। আমি বারণ করে দিলুম, আমার ছকুম-ছাড়া সে  
যেন আর কোথাও না যায়। নির্মলা 'হাঁ-না' কিছুই  
বললে না।

## মধুপর্ক

এমনি সময় হঠাৎ আমাকে ঘুষ্‌ঘুষে জ্বরে ধরলে। গাঁয়ে একজন বাঙ্গালায় পাশ করা ডাক্তার ছিল, মাস-দু-এক তার চিকিৎসায় রইলুম। তার ওষুধে সফলের চেয়ে কুফল হল বেশী। দিনে-দিনে আমি ক্রমেই কাহিল হয়ে পড়তে লাগলুম। তারপর জ্বরের সঙ্গে দেখা দিলে—খুক্‌খুকে কাশি।

সেদিন সন্ধ্যাবেলায় আমার পা টিপে দিতে দিতে নির্মলা মৃদুস্বরে বললে, “ই্যা গা, এ ডাক্তারকে দিয়ে অসুখ যখন কমলো না, অণ্ড ডাক্তার ডাক না!”

আমি বললুম, “গাঁয়ে আর ডাক্তার কৈ?”

নির্মলা থেমে থেমে বললে, “আচ্ছা, ললিতকে ডাকলে হয় না? সে ত সরকারী হাসপাতালের ডাক্তার, হাত-যশ না থাকলে সে অতবড় কাজ পেত না।”

আমি তীব্র তিক্ত স্বরে বলে উঠলুম, “না!”

আমার কণ্ঠস্বরে নির্মলা বোধ হয় ব্যথা পেয়েছিল। কারণ পা টিপতে-টিপতে তখনি সে একবার থেমে পড়ল। অনেকক্ষণ চুপ করে বসে থেকে তবে-সে আবার পা-টেপা শুরু করলে।

ললিত ডাক্তারের কথা যে আমার মনে ছিল না, তা নয়। কিন্তু তার সুন্দর মুখকে আমি ভয় করি। নির্মলা যে তাকে চায়,—সে কথা সেইদিনই বুঝেছি, যেদিন সে ছাত্র-থেকে লুকিয়ে তাকে দেখেছিল! সুতরাং এটা আন্দাজ করা শক্ত

নয় যে, আমার এই অস্থির অছিলায় •নির্মলা ললিতের সঙ্গে  
ঘনিষ্ঠতা করতে চায় !

ডাক্তার, চিঠি পড়তে পড়তে আমার মনের ক্ষুদ্রতা দেখে  
নিশ্চয়ই তুমি বিরক্ত হয়ে উঠছ। নিশ্চয়ই ভাবছ যে, আমি  
কি নীচ—কি হীন স্বভাবের লোক ! বাস্তবিক, আজ এই  
গারদে বসে, নিজের চরিত্র বিশ্লেষণ করে চিঠি লিখতে লিখতে  
আপন-স্বভাবের জন্য আমি আপনিই লজ্জিত হয়ে উঠছি।

সন্দেহ-রোগটা আমার ধাতের সঙ্গে কেমন মিশে গিয়ে-  
ছিল। এ রোগ যদি আমার না থাকত, তবে আজ কি আমাকে  
কেউ এই সুন্দর পৃথিবী থেকে, এই বিচিত্র সংসার থেকে,  
সেই বিমল প্রেমের আলিঙ্গন থেকে, সেই স্বাধীন উদ্যম-  
জীবন থেকে বঞ্চিত রাখতে পারত ? ডাক্তার,—ডাক্তার,  
আমি লম্পট নই, মাতাল মই, অন্য কোন পাপে পাপী নই—  
কিন্তু এক সন্দিগ্ধ প্রকৃতির জন্যই আজ আমি সকল-হারা  
কাঙ্গাল, মানুষ হয়েও অমানুষ, জগতে থেকেও জীবন্ত !

থাক—যা বলছিলুম—

ললিত ডাক্তারকে ডাকা হল না।

পরদিন আমার চিকিৎসা করতে এক কবিরাজ এলেন।  
কবিরাজ প্রাচীন বটে, কিন্তু অর্কাচীন কি প্রবীণ সেটা  
জানতুম না।

## মধুপর্ক

তবে তিনি যে স্পষ্টবক্তা এবং রোগীর কাছে শিশুর মত সরল, তার পরিচয় পেলুম।

চোখ বুজে অনেকক্ষণ আমার নাড়ী-পরীক্ষা করে তিনি সুধু গম্ভীরভাবে মাথা নেড়ে বললেন,—“হঁ।”

এই “হঁ”র মানে কি? জিজ্ঞাসা করলুম, “জ্বর কতদিনে সারাতে পারবেন?”

কবিরাজ মাথা তুলে তুল-তুল চোখে কড়িকাঠের দিকে তাকালেন,—অর্থাৎ, জ্বর সারা না সারা—সমস্তই ভগবানের হাত।

একটু বিরক্ত হয়ে বললুম, “কবরেজ মশাই, শুধু ভগবানকে ডেকে যদি অসুখ সারাতে হয়, তবে আপনাকে ডেকে লাভ কি?”

কবিরাজ বললেন, “আমরা নিমিত্ত মাত্র। বাবা, তোমার অসুখ কিছু গুরুতর।”

—“অসুখটা কি?”

“—যক্ষ্মা!”

আমার বুকটা ছাঁৎ করে উঠল।

দরজার কাছে ধুপ্ করে একটা শব্দ হোল। সেখানে ঘোমটা দিয়ে নির্মলা দাঁড়িয়েছিল—চেয়ে দেখি, মাটির উপর সে ছমড়ি খেয়ে পড়ে আছে!

•যক্ষ্মা !

সারাদিন—সারাদিন বিছানায় আড়ষ্ট হয়ে শুয়ে রইলুম,—  
মনে হতে লাগল অশরীরী মৃত্যু যেন এখন এসে আমার  
অপেক্ষায় দরজা আগলে বসে আছে। যক্ষ্মা ! এই দুটি  
অক্ষরের সঙ্গে কি বিপুল যন্ত্রণা গাঁথা আছে,—কি আতঙ্কের ভাব  
মেশানো আছে ! আজ আমি যেন এই পৃথিবীতে থেকেও  
পৃথিবীর নই—এরি মধ্যে পৃথিবীর সঙ্গে আমার সম্পর্ক যেন  
ঘুচে গেল। ফাঁশীর ছকুম পেলে কয়েদীর মনে কি এমনিতর  
ভাবের উদয় হয় ?

এতদিন জ্বর হলেও আমি উঠে, বসে, নড়ে-চড়ে  
বেড়াতুম,—তাতে কোন কষ্ট হোত না। কিন্তু, ব্যাধির নাম  
শুনে পর্য্যন্ত আমি একেবারে কাবু হয়ে পড়েছি ; মনে হচ্ছে,  
কে যেন আমার বুকের উপর জগদল পাথর চাপিয়ে দিয়েছে,—  
উঠে বসি, সাধ্য কি !

নির্মলা এসে আমার মুখে ওষুধ ঢেলে দিলে। উদাস  
চোখে তার দিকে তাকিয়ে রইলুম। আজ তার মুখ মলিন,  
কেশে বেশে কোন শ্রী নেই। কিন্তু এই বিষণ্ণতা ও মলিন-  
তার মধ্যেই তার রূপের শিখা যেন বেশী জ্বলন্ত হয়ে  
উঠেছে।

আস্তে আস্তে বল্লুম, “নির্মল,—আমি আর বেশীদিন নই।”

## মধুপর্ক

অন্য কোন স্ত্রীলোক হয়ত এখানে পাড়া কাঁপিয়ে কেঁদে উঠত। কিন্তু নির্মলা শুধু বললে, “ভয় কি, তোমার কিচ্ছু হয়-নি।”

—“কিচ্ছু হয়-নি ! এত সহজে তুমি আমার এ রোগটাকে উড়িয়ে দিতে চাও ? আরো বেশী কিচ্ছু হলে তোমার ও শিখের সিঁড়র কোথায় থাকবে নির্মল ?”

নির্মলা হঠাৎ পিছন ফিরে দাঁড়াল—তারপর জানালাটা বন্ধ করে দিলে। আমি বুঝলুম, সে পিছন ফিরেছে মুখের ভাব লুকোবার জন্মে—জানালা বন্ধ করে দেওয়া ছলমাত্র।

আমি শুরু হয়ে রইলুম। নির্মলার বিড়ালটা বিছানার উপরে লাফিয়ে উঠল, তারপর আরামে ঘুমোবার মতলবে আমার বুকে চড়ে বসল। নির্মলা ছুটে এসে হঠাৎ তার বিড়ালকে এমন এক চড় মারলে যে, আয়েসের আশা ছেড়ে সে একলাফে আমার বুক থেকে নেমে ল্যাঙ্গ তুলে সরে পড়ল। ব্যাপারটা তোমাদের চোখে সামান্য ঠেকবে—কিন্তু আমার কাছে এ তুচ্ছ নয়। কারণ, ‘পুসী’কে এর আগে নির্মলার হাতে কখনো মার খেতে দেখিনি।

নির্মলাকে এইমাত্র কড়া কথা বলেছি বলে মনে একটা ঘা লাগল। গাঢ়স্বরে ডাকলুম, নির্মল !”

সে আমার কাছে এসে দাঁড়াল।



—“বেড়ালটাকে তাড়িয়ে দিলে কেন ?”

—“কোথেকে এসে নোংরা পায়ে বিছানায় উঠেছিল, তাই।”

—“কেন, আগেও ত সে গঙ্গাজলে পা না ধুয়েই বিছানায় উঠত, তখন ত ওকে মারতেও না, তাড়াতেও না।”

নির্মলা চুপ করে রইল।

—“সত্যি করে বল দেখি, পাছে আমার কষ্ট হয় বলেই তুমি ওকে মেরেছ কি না ?”

সে কথা কইলে না।

—“নির্মল—”

—“বল।”

—“আমার কষ্টে তুমি কষ্ট পাও ?”

নির্মলা একবার আমার চোখে তার চোখ রেখেই নামিয়ে নিলে।

—“নির্মল, শোন।”

—“কি ?”

—“কাছে এস, আরো কাছে।”

—“বল।”

—“আমাকে তুমি ভালবাস ?”

নির্মলার মুখে হঠাৎ একটি তরল হাসি খেলে গেল ;

## মধুপর্ক

তারপরেই,—বোধ হয় আমার অস্থির কথা ভেবেই—তার  
সে হাসি খেমে গেল। বললে, “তোমার আজ হয়েছে কি,  
এত আবোল-তাবোল বকুছ কেন?”

—“নির্মল, তুমি কি আমার কথার উত্তর দেবে না?  
আমাকে ভালবাস? বল, বল!”

নির্মলা খানিকক্ষণ অবাক আশ্চর্য হয়ে আমার মুখের  
পানে তাকিয়ে রইল। তারপর আশ্বে আশ্বে মুখ নামিয়ে,  
আমার ঠোঁটের উপরে তার দুখানি তপ্ত ঠোঁট রেখে, দুহাতে  
আমার গলা জড়িয়ে ধরুলে।

স্বামী হতে গেলে স্বভাবটা কিছু কর্কশ, কিছু গস্তীর হওয়া  
চাই—এই ছিল আমার ধারণা। কিন্তু কেন জানি না, সেদিন  
আমার মুখ থেকে গান্তীর্থ্যের মুখোমুখি কি করে হঠাৎ খসে  
পড়েছিল। তার পরের দিন সকালে নিজের ছেলেমানুষীর  
কথা ভেবে নিজেই যে লজ্জা পেয়েছিলুম—আজও তা  
ভুলি-নি। সামান্য কারণেই কেন যে প্রাণ চঞ্চল হয়, মুখ দিয়ে  
কেন যে শিশুর হালকা কথা বেরিয়ে পড়ে, এ-এক মহা রহস্য!

কিন্তু তবু আজ আমার মনে হচ্ছে, সে-সময় সত্যি যদি  
ছেলেমানুষ থাকতে পারতুম, আজ তাহলে আমাকে এই  
দুঃখের কাহিনী লিখতে হতো না!

পুরুদিন ভিন্নগ্রাম থেকে এক পাশ-করা ডাক্তার আনালুম। কারণ 'শতমারী'র বিষবড়ি খেয়ে মরার চেয়ে পাশ-করা ডাক্তারের হাতে পটল তোলা ঢের ভাল।

ডাক্তারের মুখে এই একটু ভরসা পেলুম যে, আমার রোগ এখনো সাংঘাতিক হয়ে ওঠে-নি। হয়ত, সেটা মিথ্যা প্রবোধ!

চিকিৎসা চলতে লাগল। ঘরে ওষুধের শিশি খুবই বাড়ল, কিন্তু রোগ কমল না। এমনি সময় আর এক ঘটনা ঘটল।

সেদিন ভরসঙ্কায় বাদল নামল,—নবীন আষাঢ়ের প্রথম জলধারা। আমি বিছানার উপর বালিসে পিঠ রেখে বসে-ছিলুম,—জানালাটা একটুখানি ফাঁক করে দিয়ে। গুমোট করা ঘরের মধ্যে মাঝে-মাঝে ঝুঁকুঝুঁকু জলের ছাট এসে গায়ে লাগছে—আঃ, সে কি মিষ্টি! গাছের পাতায়, গাঁয়ের পথে, খানায়-ডোবায় বৃষ্টিবিন্দুগুলি যেন শিশুর মত খেলায় মেতে কলরব করছিল,—আর আমি আনমনে বসে-বসে বর্ষার 'জলতরঙ্গে, বাদলের সেই মেঠো সুর শুনছিলুম।

হঠাৎ নীচের পথে চোখ পড়ল; সন্ধ্যার আবছায়ায় স্পষ্ট বোঝা গেল না,—কিন্তু মনে হোল, কে-একটা লোক যেন ছাতি-মাথায় দিয়ে আমার বাড়ীর ভিতর ঢুকে পড়ল।

প্রথমে ভাবলুম, ডাক্তার। কিন্তু, একে-ত ডাক্তারের

## মধুপর্ক

এখন আসবার কথা নয়, তায় এই বৃষ্টি ! আচ্ছা, ডাক্তার ত এখানেই আসবেন, দেখা যাক্ ।

একে-একে পাঁচটি মিনিট কেটে গেল । না, ডাক্তার নয় ; তবে, কে ও ? আমারই চোখের ভ্রম ? না, তাই-বা কি-করে বলি !

আশ্বে-আশ্বে বিছানা থেকে উঠলুম । দরজাটা ফাঁক করে দেখলুম, রান্নাঘরে নিশ্চল নেই । এ-সময় তার ত এখানেই থাকবার কথা,—কোথায় গেল সে ?

নিজের অস্থির কথা ভুলে গেলুম । পা টিপে-টিপে ঘর থেকে বেরিয়ে, একটি, দুটি, তিনটি ঘর পেরিয়ে এলুম,— নিশ্চল কোথাও নেই ।

হঠাৎ দেখলুম, বৈঠকখানা থেকে আলোর রেখা বাইরে এসে পড়েছে । খুব সন্তর্পণে, চোরের মতন দরজার পাশে গিয়ে দাঁড়ালুম ।

ধারালো তীরের মত একটা অচেনা গলার আওয়াজ আমার কাণে এসে লাগল ।

কে বলছে,—

“না বুঝে তখন বদ্-সঙ্গে মিশেছিলুম, তোমার বাবা তাই তোমার সঙ্গে আমার বিয়ে দিতে চাইলেন না । নিশ্চল, এখন আমি আর মদ খাই না বটে, কিন্তু তোমাকে—”

বাধা দিয়ে. আমার স্ত্রী বললে, “ললিত, ও কথা আর তুলো না। ছেলেবেলায় আমরা যেমন দুই ভাই-বোনের মত একসঙ্গে ছিলাম, এখনো তেমনি করে আর থাকতে না পারলেও, তুমি আমার ভাই, আমি তোমার বোন।”

নির্মলার স্বর কি অস্বাভাবিক !

ললিত,—সেই ডাক্তার ললিত, যে একদিন আমার স্ত্রীর সঙ্গে দেখা করতে এসেছিল, যাকে আমি সন্দেহ করে তাড়িয়ে দিয়েছিলাম, আমাকে লুকিয়ে তারই সঙ্গে নির্মলার এ কি কথা হচ্ছে !

নির্মলা দরজার দিকটা একবার দেখে নিয়ে বলে “ললিত, শোন, আমার বেশী সময় নেই, উনি টের পেলো আর রক্ষা রাখবেন না। তোমাকে এখানে আসবার জন্যে কেন চিঠি লিখেছি, তা ত জান না ?”

ললিত বললে, “না।”

“আমার স্বামীর বড় অসুখ।”

“কি অসুখ ?”

নির্মলা অল্পকথায় আমার রোগের বর্ণনা করলে।

ললিত বললে, “আমাকে কি করতে বল ?”

—“ললিত, তুমি ডাক্তার। রোগের যে লক্ষণ বললুম,

## মধুপর্ক

তা শুনে তোমার কি মনে হয় ? এখানকার গাডার্গেয়ে ডাক্তার কব্ রেজ সব হাতুড়ে । তাদের কথায় বিশ্বাস নেই ।”

—“মুখে শুনে কি রোগ-ধরা চলে নির্মল ?—রোগী দেখতে হবে ।”

—“সে হবে না ।”

—“কেন ?”

নির্মলা থেমে-থেমে বললে, “তুমি যে এখানে আস, সেটা উনি পছন্দ করেন না ।”

“কেন ?”

একটু ইতস্তত করে নির্মলা বললে, “না, সে আমি বলতে পারব না ।”

ললিত খানিকক্ষণ চুপ করে থেকে ক্ষুদ্রস্বরে বললে, “থাক, আর বলতে হবে না, বুঝেছি । কিন্তু রোগী না দেখে এত বড় রোগ ধরা অসম্ভব ।”

নির্মলা কাতরস্বরে বললে, “ললিত, ললিত, তবে আমার কি হবে ?”

ললিত বললে, “একটা কথা বলি শোন । তোমার স্বামীর যদি সত্যই যক্ষ্মা হয়ে থাকে, তবে তুমি বাপের বাড়ী যাও—

“এ কি কথা ললিত !”

—“হ্যাঁ। অবশ্য, যাবার আগে রোগীর সেবার জগ্বে একজন ভাল লোক ঠিক করে যেতে হবে।”

—“সে কি হয়?”

—“হতেই হবে। এ-সব রোগীর কাছে স্ত্রী থাকলে রোগীরই অনিষ্ট।”

নির্মলা কিছুক্ষণ ভেবে বললে, “ওঁকে যদি জানতে, ললিত! আমাকে উনি এখান থেকে এক-পা নড়তে দেবেন না।—অনেক ক্ষণ হয়ে গেল, আর নয়। আজ আসি।”

আমি পা টিপে-টিপে আবার উপরে উঠলুম। তখনো বৃষ্টি পড়ছিল—জলে আমার কাপড়-চোপড় অল্প-অল্প ভিজ্জে গেল।

নির্মলা ঘরে এসে আমাকে জিজ্ঞাসা করলে, “কেমন আছ?” কোন জবাব না দিয়ে পাশ ফিরে শুলুম। রাগে আমার সর্বাঙ্গ কাঁপছিল।

নির্মলা খানিকক্ষণ অবাক হয়ে দাঁড়িয়ে রইল, বোধ হয় ভাবছিল, আমি জবাব দিলুম না কেন!

হঠাৎ কি দেখে সে আমার পায়ে আর কাপড়-চোপড়ে হাত দিলে। বেশ বুঝলুম, সে চমকে উঠল।

আমি মুখ ফিরিয়ে তার দিকে এক-দৃষ্টিতে তাকিয়ে রইলুম।

## মধুপর্ক

নির্মলা আমার দৃষ্টিতে যেন আহত হয়ে ছু-পা. পিছনে হটে গেল। তারপর উদ্বিগ্ন স্বরে বললে,—“তুমি—তুমি কি বাইরে গিয়েছিলে ?”

যতটা-পারা-ষায় গলাটা ভারি করে বললুম,—“হঁ। তুমি মর। আমিও তাহলে নিশ্চিন্ত হয়ে মরতে পারি।”

মড়ার মত সাদা মুখে, ঘাড় হেঁট করে নির্মলা ঘর থেকে তাড়াতাড়ি বেরিয়ে গেল—আমার দিকে আর চাইতেও পারলে না।

সে কি বুঝতে পেরেছে, আমার চোখে ধুলো দেওয়া কত শক্ত ?

বিছানায় শুয়ে-শুয়ে ভাবতে লাগলুম।

আমি ত মরবই ! যে রোগে ধরেছে, কথায় বলে, তা ‘শিবের অসাধ্য রোগ’। সংসারের খাতা থেকে আমার নাম কাটা গেল বলে !

আমি ম’লে নির্মলার কি হবে ? সে কোথা থাকবে—কার কাছে ? তার বাপ নেই, মা নেই,—এক ভাই আছে, সেও গরীব, আবার মাতাল। নির্মলার এই বয়স, এই রূপ,—সংসারের বিষম পাকচক্রে পড়লে সে কি আর আপনাকে সামলাতে পারবে ?



তারপর,—ঐ ললিত ! নিৰ্মলার সঙ্গে তার বিয়ের সম্বন্ধ হয়েছিল—সে এখনো নিৰ্মলাকে ভুলতে পারে-নি নিশ্চয় । ছেলেবেলা থেকে তারা দুজনে দুজনকে জানে—তাদের মধ্যে এখনো একটা ভালবাসার টান থাকা খুবই স্বাভাবিক । নিৰ্মলা এখনো তাকে দেখতে চায়—এর প্রমাণও হাতে-হাতে পেয়েছি ।

মাঝখান থেকে তাদের মেলা-মেশায় বাধা দিচ্ছি—আমি । নিৰ্মলা মনে-মনে সত্যই আমাকে ভালবাসে—না, কেবল কর্তব্যের জন্তে যেটুকু করবার তা করে—এটা ঠিক জানি না ; কিন্তু সে যে আমাকে ভয় করে, এ-কথা বেশ বোঝা যায় ।

ললিত এখনি পরামর্শ দিচ্ছে, আমাকে একলা ফেলে নিৰ্মলা চলে যাক । নিৰ্মলাও তার কথা শুনত—যদি না আমাকে ভয় করত । আমি বেঁচে থাকতেই এই !

কমলিনী নিৰ্মলার বোন—এক রক্তে এদের জন্ম । ষতদিন সধবা ছিল, ততদিন কমলিনীর নামে ত কিছুই শুনি-নি । বিধবা হয়ে কমলিনী বাপের বাড়ী গেল, তারপর বছর ঘুরতেই শুনলুম, সে কুলত্যাগ ক'রে কুল ছেড়ে অকূলে ভেসেছে !

কমলিনীর জীবনে যা ঘটেছে, নিৰ্মলার জীবনেও তা ঘটবে না কেন ? বিশেষ, নিৰ্মলার সামনে আর এক প্রলোভন আছে ; ললিত তার বাল্যবন্ধু, ললিতকে এখনো সে দেখতে

## মধুপর্ক

চায়, ললিতের সঙ্গে তার বিয়ের কথাও হয়েছিল, ললিত এখনো বিয়ে করে নি। ঐ সুপুরুষ ললিতকে আমি ভয় করি।

সে রাত্রে ঘুমিয়ে ঘুমিয়ে কেবল নির্মলা আর ললিতকে স্বপ্নে দেখতে লাগলুম। বারবার ঘুম ভেঙে যেতে লাগল। শেষবারে দেখলুম,—এই ঘরে, এই বিছানায় বিধবার বেশে বসে আছে নির্মলা, আর তার পায়ের তলায় ললিত! দরজার কাছে আমি অসহায়ের মত, স্নান-কাতর চোখে তাদের দিকে তাকিয়ে দাঁড়িয়ে আছি। আমি তাদের দেখতে পাচ্ছি—তারা আমায় দেখতে পাচ্ছে না। কারণ, আমি তখন মৃত; দাঁড়িয়ে আছে,—সে আমার প্রেতাত্মা!

এক-চমকে ঘুম ছুটে গেল। ঘর্ষাক্ত দেহে, বিছানা থেকে লাফিয়ে মেঝেতে গিয়ে পড়লুম। জানালার কাছে ছুটে গেলুম। তখনো বৃষ্টি পড়ছিল।

চীৎকার করে বলে উঠলুম, “এ হবে না, এ হবে না! নির্মলা আমার—আমি তাকে ভালবাসি—মরে গিয়েও ভালবাসব! মরবার আগে আমি তোমাকে সঙ্গে নিয়ে যাব নির্মল—নিয়ে যাব, নিয়ে যাব!”

অন্ধকারে হঠাৎ কে আমাকে দু হাতে প্রাণপণে জড়িয়ে ধরলে। আমি বিহ্বলের মত বললুম,—“কে তুমি?”

—“ওগো, আমি—আমি—”

“—অ্যা নিশ্চল ! শোন, আমি তোমাকে নিয়ে যাব—  
ছাড়ব না !”

—“কি বলছ গো—ও কি বলছ ! তোমার কি হয়েছে ?”  
তখন আমার চমক ভাঙ্গল। মাথাটা ঘুরে উঠল—পা  
টলতে লাগল। কোনরকমে নিশ্চলার গা ধরে বেহঁসের মত  
মাটির উপরে ধুপ করে বসে পড়লুম।

ডাক্তার, ডাক্তার, সেই রাত্রে আমার মাথার ভিতরে যে  
রকম ভাব এসেছিল, এখনো ফি-বছরের যে-সময়টায় আমি  
পাগল হয়ে যাই, আমার মাথায় ঠিক তেমনি ধারা ভাব আসে !

সে রাত্রি থেকেই যে আমাকে এই উন্মাদ-রোগ আক্রমণ  
করে নি, তা কে বলতে পারে ?

তুমি বলতে পার, ডাক্তার ?

ওঃ, সে স্বপ্নটা কি বাস্তব ! লিখতে লিখতে এখনো  
আমার চোখের উপর সেই দৃশ্য আঙুনের রেখায় জেগে উঠছে  
আর আমার সর্বাঙ্গ কাঁপছে। মনে হচ্ছে, আমি বুঝি আবার  
এখনি পাগল হয়ে যাব ! মাগো, এ কি যন্ত্রণা—কি যন্ত্রণা !

দু'চারদিন পরেই বুকে ব্যথা হয়ে নিশ্চলা ভয়ানক জ্বরে  
পড়ল। বাড়ীতে আমরা দুটি প্রাণী,—দুজনেই শয্যাশায়ী ;

## মধুপর্ক

কে যে কাকে দেখে তার ঠিক নেই। এক-দিন নিশ্চলা নিজে থেকে আমার সঙ্গে একটাও কথা বলে নি। যখন তাকে দেখেছি, তখন মনে হয়েছে, সে যেন কি দুর্ভাবনা ভাবছে। আমি ডাকলে বিমর্ষ মুখে আমার কাছে এসে দাঁড়াত, কোনও কথা জিজ্ঞাসা করলে সে অত্যন্ত নীরস একটা সংক্ষিপ্ত উত্তর দিত—যেন নিতান্ত দায়ে পড়েই।

তার এমনধারা ভাবভঙ্গি দেখে, আমার গা যেন জলে যেত। আমি কি তার চক্ষুঃশূল? কেন, এমন কি দোষে দোষী আমি?—ক্রমেই আমার রাগ বেড়ে উঠছিল;—তার এই নির্লিপ্ত অবহেলার ভাব আমার রুগ্ন মাথাটাকে যেন বিগড়ে দিচ্ছিল!

কি ভাবছে সে? কেন ভাবছে? কার জন্তে এ ভাবনা? মনে মনে এমনি নানান প্রশ্ন জাগতে লাগল। সে কি আমাকে ঘৃণা করে? সে কি ললিতের কথা ভাবছে? আমাকে ছেড়ে পালাতে চায়?

ললিতকে মনে পড়লেই, সেই গুপ্ত সাক্ষাৎ, সেই ভীষণ স্বপ্নদৃশ্য স্মরণ হয়—আর আমার মাথা যেন আগুনের মত গরম হয়ে ওঠে—আমি যেন পাগল হয়ে যাই।

এমন সময় নিশ্চলা অসুখে পড়ল। আমাকে যে ডাক্তার

দেখছিলেন, তিনিই তাকে দেখতে লাগলেন। প্রথম দু তিন দিন অস্থির ক্রমেই বেড়ে উঠতে লাগল, ডাক্তার পর্যন্ত ভয় পেয়ে গেলেন। কিন্তু আমার একটুও ভয় বা ভাবনা হোল না।

ডাক্তার! তুমি কি বিশ্বাস করবে যে, নির্মলার তখন মৃত্যু হলে, আমি খুসি হতুম! হ্যাঁ, সত্যি কথা। আমি ত মরবই,—তবে সে কেন বাঁচবে? আমাকে স্বার্থপর ভাবছ? না, আমি তা নই। নির্মলাকে আমি ভালবাসি,—প্রাণের মত ভালবাসি। সে ভালবাসার তল নেই, সীমা নেই, অন্ত নেই। কিন্তু বলেছি ত, নারীর চঞ্চল মনকে আমি বিশ্বাস করি না। তার উপর নির্মলার বোন কমলিনী আমার চোখ খুলে দিয়েছে। আমি যদি মরি,—তবে তার নবীন, নধর, পুষ্পিত ঘোবন নিয়ে কুচক্রীর বিষাক্ত নিশ্বাসে নির্মলা কি নির্মল থাকতে পারবে? পারবে না—পারবে না! আর একটা কথা শোন, ডাক্তার!

নির্মলা একদিন জরের ঘোরে ভুল বুদ্ধি ছিল। আমি মাঝে-মাঝে রোগশয্যা থেকে উঠে নির্মলাকে দেখে আসতুম। কিন্তু সেদিন গিয়ে কি শুনলুম জান? শুনলুম, নির্মলা সকাতির বন্ধে, “ললিত! সেদিনের কথা ভুলে যাও—তুমি বিয়ে কর; তাহলেই আমি সুখী হব—”তারপর সে চুপিচুপি বিড়বিড়

## মধুপর্ক

করে আরো কি-সব বলতে লাগল, আমি শুনতে পেলুম না। কিন্তু যা শুনেছি তাই শুনেই ঘরের ভিতরে যেতে আমার পা উঠল না; আচ্ছন্নের মত আপন ঘরে এসে বিছানার উপর আছড়ে পড়লুম।

ডাক্তার, রোগের ঘোরেও সে ললিতকে ভোলে-নি! তাই কামনা করছিলুম, নিশ্চল মরুক—আমি মরবার আগে নিশ্চল মরুক! রোগে যদি তার মৃত্যু হোত,—তাহলে আজ জীবন শূন্য হয়ে গেলেও হয়ত আমি পাগল হয়ে যেতুম না।

আজ দুদিন নিশ্চল কতকটা সামলে উঠেছে; কিন্তু ভয় যায় নি।

সেদিন বিকালবেলায় তার ঘরে গেলুম। ঢুকেই দেখি, নিশ্চল শুয়ে শুয়ে একখানা চিঠি পড়ছে। চিঠি পড়তে পড়তে সে এমনি তন্ময় হয়ে উঠেছিল যে, আমার পায়ের শব্দ মোটেই তার কানে ঢুকল না।

যখন একেবারে তার বিছানার কাছে গিয়ে দাঁড়ালুম, তখন সে মুখ তুলে আমাকে দেখেই চমকে উঠল। তারপর, চিঠিখানা তাড়াতাড়ি কাপড়ের মধ্যে লুকিয়ে ফেললে।

দেখলুম, তার চোখের কানায়-কানায় জল টলমল করছে চিঠি পড়তে-পড়তে সে কাঁদছে!—কেন?

ফুতুহলী হয়ে জিজ্ঞাসা করলুম, “কার চিঠি নির্মল ?”  
নির্মলার মুখ পাঙ্গাশপানা হয়ে গেল। সে জবাব দিলে  
না।

আবার জিজ্ঞাসা করলুম, “কার চিঠি ?”

নির্মলা নিরুত্তর।

বিরক্তস্বরে আমি বললুম, “বলবে না তাহলে ?”

নির্মলা মুখ বুজে পাশ ফিরে শুয়ে রইল।

আর সহিতে পারলুম না। রাগে কাঁপতে-কাঁপতে চড়া  
গলায় বললুম, “নির্মলা, তুমি ঠাউরেচ কি, আমি কি তোমার  
গোলাম ? তুমি লুকিয়ে পরের সঙ্গে দেখা করবে—জরের  
ঘোরেও পরপুরুষের নাম করবে—আড়ালে পরের চিঠি পড়বে,  
আমার বাড়ীতে বসে আমারই কথা মানবে না, শুনবে না,—  
আমার অস্থখে কি তোমার ফুঁতি বেড়েছে ? আমি না মরতে  
এই, ম’লে কি করবে ? তার চেয়ে তুমিও মর, আমিও মরে  
জুড়োই !”

নির্মলা পাথরের মূর্তির মত শুক্ক হয়ে শম্যায় পড়ে রইল।

—“এখনো বল বলছি, কার চিঠি ?”

নারীর এ কি স্পর্ধা—তার এ নীরবতা অসহ !—আমার  
শিরায় শিরায় তপ্ত রক্ত ছুটতে লাগল। সামনে একটা জলের  
কঁজো ছিল, নিষ্ফল আক্রোশে সেটা তুলে নিয়ে ছুঁ করে

## মধুপর্ক

মেঝেতে আছড়ে ফেল্লুম, সেটা সশব্দে ভেঙ্গে এফেবারে গুঁড়ো হয়ে গেল ; এক-টুকুরো ছিটকে নির্মলার গায়ের উপরেও গিয়ে পড়ল—তবু সে পাথরের মত নিসাড় নিথর হয়ে রইল,— কিছুতেই ক্রক্ষেপ করলে না ।

কোনমতেই না-পেরে-উঠে ব্যঙ্গের হাসি হেসে শেষটা আমি তীক্ষ্ণস্বরে বলে উঠলাম,—“বোঝা গেছে, এ সেই লম্পট ললিতের চিঠি । তোমার বোন বিধবা হয়ে কুলত্যাগ করেছে, তোমার বোধ হয় অত দেরিও সহিচে না ; স্বামী বেঁচে থাকতেই তুমি কুলে কালি দিতে চাও ! কুলটার বংশে তোমার জন্ম—তুমিও—”

ছিলা-ছেঁড়া ধনুকের মত চকিতে সোজা হয়ে নির্মলা দাঁড়িয়ে উঠল—তার মাথার রুম্ম এলমেল চুলগুলো ক্রুদ্ধ সাপের মত চারিদিকে ঠিকরে-ঠিকরে পড়ল—তার দুই চোখ স্থির বিছাতের মত আমার চোখের উপর জলতে লাগল—তার মাথা থেকে পা পর্য্যন্ত থরথর করে কাঁপতে লাগল ! কি-যেন সে বলতে চায়—কিন্তু রাগের আবেগে তার কথা কণ্ঠের মধ্যে অবরুদ্ধ হয়ে গেছে !

অনেক কষ্টে শেষটা সে এক নিশ্বাসে দৃষ্টস্বরে বলে উঠল,—“কি ! কুলটার বংশে আমার জন্ম—আমি কুলটা !”

নির্মলাকে বরাবর নেতিয়ে-পড়া লজ্জাবতী লতার মত



## উন্মাদ

সঙ্কোচে জড়সড় দেখে আসছি,—আজ তার এ কি মূর্তি—এ কি ভাব!—এ যে কখনো কল্পনাতেও ভাবতে পারি নি। মুহূর্তে এমন পরিবর্তন কি সম্ভব!

আমি আর দ্বিতীয় বাক্যব্যয় না করে সে ঘর ছেড়ে চলে এলুম।

নিজের ঘরে এসে হাঁপাতে হাঁপাতে বসে পড়লুম। মাথার ভিতরে তখন সমস্ত ওলট্-পালট্ হয়ে গিয়েছিল। খানিকক্ষণ হতভম্বের মত চুপচাপ বসে রইলুম।

তারপর, সব ঘটনা মনে মনে একবার ভেবে নিলুম। নিশ্চলার স্বমুখ থেকে অমন করে পালিয়ে এলুম কেন? আমি কি কাপুরুষ! নিশ্চলা দোষী হয়েও অনায়াসে আমাকে চোখ রাঙ্গালে—আর, আমি পালিয়ে এসে তার দেমাক্ বাড়িয়ে দিলুম! ছিঃ, ধিক আমাকে! পুরুষ হয়ে নারীকে—নিজের স্ত্রীকে ভয়! গলায় দড়ি আমার!

আপনাকে আপনি বারবার ধিক্কার দিতে লাগলুম। কিন্তু তাতেও মন উঠল না! আমি যে ভয় পাই নি, আমি যে স্ত্রী নই, আমি যে ইচ্ছে করলেই নিশ্চলাকে পায়ে নীচে খেঁৎলাতে পারি,—এটা তাকে বুঝিয়ে দেবার জন্তে, এ-ঘর থেকেই আমি হো-হো করে তাচ্ছীল্যের উচ্চহাসি হেসে উঠ-

## মধুপর্ক

লুম। ও-ঘর থেকে নির্মলা কি আমার হামি শুনতে পায়-  
নি? পেয়েছিল বৈ কি!

সেই চিঠির কথা মনে পড়ল। কার চিঠি? নিশ্চয়ই  
ললিতের। নৈলে সে চিঠিখানা অমন করে লুকোত না।  
পাপী না হলে চিঠি দেখাতে তার অত ভয় কিসের? আমার  
স্বকথা-কুকথা কিছুই সে গ্রাহ্য করলে না, চিঠিতে নিশ্চয়ই  
কোন দৃশ্য কথা আছে।

হ্যাঁ—চিঠি পড়তে-পড়তে সে কাঁদছিল। আমার  
কড়াঙ্কড়িতে তার মনের ইচ্ছে পূর্ণ হচ্ছে না—সেইজন্মেই  
তার এ কান্না আর কি! কান্না ত দুর্কলেরই বল!—আর,  
চিঠিখানা যে তার কত মনের মত হয়েছিল, তাও বেশ বুঝতে  
পাচ্ছি। আমার পায়ের শব্দও তার তন্ময়তা ভাঙতে পারে-নি!

ললিত, ললিত, নির্মলা তোমাকেই ভাবছিল!  
তোমাকে যদি এখন হাতের কাছে বাগে পাই, তবে নির্মলার  
সামনে তোমাকে হিড়হিড় করে টেনে নিয়ে গিয়ে, এই দুই  
হাতে তোমার গলা টিপে ধরে, আশ্বে আশ্বে—ক্রমে ক্রমে—  
চেপে চেপে নিশ্বাস বন্ধ করে তোমাকে আমি খুন করে ফেলি!  
তোমাকে চোখের সামনে মরতে দেখে নির্মলা কেঁদে উঠবে,  
আর তার কান্নার উত্তরে আমিও আকাশ ফাটিয়ে হেসে  
উঠব, হাঃ হাঃ হাঃ হাঃ!

হঠাৎ আমার হুঁস হোল—এ কি! বিছানার একটা বালিশ দু-হাতে চেপে ধরে সত্যি-সত্যিই আমি যে বিকটস্বরে হাসছি! অ্যাঃ—আমি কি পাগল হলাম—এ আমি করছি কি?

গা-ঝাড়া দিয়ে উঠে দাঁড়ালুম। বাতাসের সঙ্গে যুঝে কোনই লাভ নেই। একটা কিছু করা চাই!

মরবার আগে আমাকে একটা কিনারা করতে হবেই হবে। সে দিনের স্বপ্ন আমি এখনো ভুলি-নি। কিছু-না-করে আমি যদি আজ মরি, তবে কাল সেই স্বপ্নই সত্য হবে।

কিন্তু কি করব—কি করতে পারি?

একমনে ভাবতে লাগলুম—তেমন ভাবনা আর কখনো ভাবি নি।

বী এসে খবর দিলে, ডাক্তার-বাবুর লোক এসেছে। তাকে উপরে আনতে বললুম। যে এল সে ডাক্তারের কম্পাউণ্ডার।

কম্পাউণ্ডার নির্মলার জন্মে দুটো ওষুধ এনেছিল। সে বললে, “একটা খাবার, আর একটা বুকো মালিস করবার।”

শিশি দুটো দেখলুম। মালিশের ওষুধের শিশিতে এক-খানা কাগজে বড়-বড় ইংরেজী হরফে লেখা রয়েছে—  
“বিষ।”

## মধুপর্ক

শিশিটা একমমে দেখতে-দেখতে কম্পাউণ্ডারকে জিজ্ঞাসা করলুম—“এ খেলে কি মানুষ মরে ?”

—“মরে বৈ কি !”

খানিক ভেবে আবার জিজ্ঞাসা করলুম, “যদি সমস্তটা খায় ?”

—“বারো ঘণ্টার মধ্যে মরে যেতে পারে ।”

—“আচ্ছা, যাও ।”

সেই রাত্রি—কালরাত্রি ! ওঃ, কে-যেন ধারাল ছুরি দিয়ে ছেঁদা করে সে রাত্রির সমস্ত অঙ্ককার আমার বুকের মধ্যে পুরে দিয়েছে । সে রাত্রি কি ভুলব—ভুলতে কি পারি ?

ডাক্তার, সে-রকম রাতও কখনো দেখি নি,—তেমন ঘুট-ঘুটে অঙ্ককারও আর-কখনো দেখি-নি ! খালি কি অঙ্ককার ? যেমন ঝুপ্‌ঝুপ্‌ বৃষ্টি—তেমনি ছছ-ছছ ঝড় ! মড়মড় করে বড় বড় গাছের ডালগুলো ভেঙ্গে পড়ছে,—সেইসঙ্গে ক্রমাগত গুড়্‌গুড়্‌ করে বাজ ডাকছে আর ডাকছে ! সে রাতে পৃথিবীকে মনে হচ্ছিল, যেন স্রুধু শব্দের পৃথিবী !

এক-পা এক-পা করে নির্মলার ঘরের দিকে গেলুম । ঘরে ঢুকবা-মাত্র লক্ষ্য করলুম—নির্মলা চুপ করে উপরপানে চেয়ে শুয়েছিল, আমাকে দেখেই চোখ মুদলে । আমার উপর

তার ঐত ঘৃণা ! মনে একটু যে ইতস্তত ভাব ছিল, নিশ্চলার  
রকম দেখে তাও ঘুচে গেল ।

খাটের পাশে গিয়ে ইচ্ছে করেই নীরস, কর্কশ স্বরে  
বললুম, “কেমন আছ ?”

সে আমার দিকে পিছন ফিরে গেল । আমিও তখন তার  
ভালমানুষী চাইছিলুম না—সে রাগ করে, তাই আমার  
ইচ্ছা !

আমি তেমনি স্বরে বললুম, “আমার অস্থখ শরীর, কখন  
আছি কখন নেই, এই দুর্ঘ্যোগে বিছানা ছেড়ে উঠে, আমি  
এলুম তোমার কাছে—আর, তোমার কিনা এই ব্যবহার !  
যে রক্তে কমলিনী জন্মেছে, সেই রক্তেই ত তোমার জন্ম !  
স্বামীকে তুমি ভক্তি করবে কেন ! আমি ত ললিত নই !”

এই কথাগুলো বলব বলে আমি আগে থাকতে অনেকক্ষণ  
ধরে মুখস্থ করে রেখেছিলুম ।

নিশ্চলা বিছানায় উপুড় হয়ে পড়ে, দুহাতে প্রাণপণে  
মাথার বালিশটা চেপে ধরলে,—যেন সে অনেক—অনেক  
কষ্টে আপনাকে সামলে নিচ্ছে !

আমি আবার বললুম, “তুমি অসতী ! তোমার মৃত্যুই  
ভাল !”

নিশ্চলা শিউরে উঠল ।

## মধুপর্ক

“শোন, যা বস্তুতে এসেছি। মাথার উপরে যে শিশিটা রইল, ওটা বিষ। খেলেই লোক মরে যায়। ওটা বিষ—ভয়ানক বিষ, বুঝলে?”

কে এক পণ্ডিত বলেছিলেন, সঙ্গিন মুহূর্তে কারুর মাথায় কোন কু-সঙ্কেত ঢুকিয়ে দিলে সেটা সাংঘাতিক হয়ে ওঠে। সে-কথা আমি ভুলি-নি। আমি জানি, এইজন্মেই পৃথিবীতে অনেক মারাত্মক ঘটনা ঘটে গেছে! এই মুহূর্তে নির্মলার আচ্ছন্ন দুর্বল মস্তিষ্কের যে অবস্থা,—এখন কেমন করে কি ইঙ্গিত দিলে আমার কার্যোদ্ধার হবে,—আগে থাকতে তার প্রত্যেক কথাটি তন্ন-তন্ন করে আমি ভেবে রেখেছিলুম।

ঠক করে নির্মলার শিয়রে ওষুধের শিশিটা রেখে দিলুম। দেখলুম, শিশি রাখার শব্দে নির্মলা চমকে উঠলো।

আস্তে-আস্তে দরজা পর্য্যন্ত এসে, ফিরে দাঁড়ালুম। তার-পর, প্রত্যেক কথাটিতে খুব জোর দিয়ে-দিয়ে কর্কশস্বরে আবার বললুম,—“তুমি মলে আমি বাঁচি। কিন্তু বলে দিচ্ছি শোন, ওটা খাবার ওষুধ নয়, মারাত্মক বিষ। খেয়োনা যেন—ভয়ানক বিষ—খেলেই মরবে!”

নির্মলার ঘর থেকে বেরুতেই,—কেন জানি না, আমার প্রাণে কেমন একটা আতঙ্ক হোল। ছুটতে-দাঁড়তে নিজের

## উন্মাদ

ঘরে এসে ঢুকে পড়লুম। তাড়াতাড়ি দড়াম্ করে দরজাটা  
এঁটে বন্ধ করে দিলুম।

ঘরের এককোণে জ্বুথবু হয়ে বসে বসে কাঁপছি আর  
কাঁপছি। এত কাপুনি কেনরে বাপু—শীত নেই, গা কাঁপে  
কেন? ভয়ে? ইঃ, ভয়টা কিসের—আমি কি কাপুরুষ?  
যার মরবার ভয় নেই, যে মরবে নিশ্চয়, যে মরতে প্রস্তুত,  
তার আবার কিসের ভয়—কাকে ডরায় সে? কিন্তু গা কেন  
তবু কাঁপে, বুকের কাছটা থেকে-থেকে কেন হৃদয় করে  
ওঠে?

ওকে—কে, ও!—ঐ যে নড়ছে, আমার পাশে পাশে—  
নীরবে, নীরবে!—একলাফে দাঁড়িয়ে উঠলুম—সেও যে দাঁড়িয়ে  
উঠল! হাঃ হাঃ, আরে ছাঃ! এ যে আমারি ছায়া!

দাও পিদিমটা নিবিয়ে,—ছায়া আর পড়বে না!

উঃ, কি অন্ধকার—কি অন্ধকার! এত অন্ধকারও  
পৃথিবীতে ছিল? এ কি পৃথিবীর অন্ধকার,—না, নরকের?  
অন্ধকার যেন ঘুরছে ফিরছে, এগিয়ে আসছে, গিছিয়ে যাচ্ছে,  
জমাট হচ্ছে, তাল পাকাচ্ছে! ঐ যে শোঁ-শোঁ করে ঘরের  
মধ্যে কি এসে ঢুকে পড়ল, ও কি ঘরের হাঁক, না অন্ধকারের  
দীর্ঘনিশ্বাস?

## মধুপর্ক

চুপ্—চুপ্ ! ঐ শোন, অন্ধকারে কে যেন যন্ত্রণায় কাত্রে কাত্রে কেঁদে উঠছে না ? ঐ যে—ঐ যে ! মাটিতে কাণ পেতে শোন—ও কান্না ঠিক তোমার বুকে এসে লাগছে না কি ? কে যেন বলছে না কি “ওগো বুক গেল গো—ওগো বুক—উহ্-হ্-হ্ ?”—হ্যাঁ, বলছে ত—বলছে ত ! কৈ, না—কেউ ত কাঁদছে না—হ্যাঁ, কাঁদছে বৈকি,—না, না, কাঁদছে না—ও তোমার ভয় !

না—দেখে আসি, সত্যি হোক মিথ্যে হোক—একবার দেখে আসি । এমন করে জড়ের মত এই অন্ধকারে হাত-পা গুটিয়ে কি বসে থাকা যায় ?

এলমেল কতরকম ভাবনাই যে মাথার মধ্যে এল গেল—কে তার ঠিক রাখে ?

আস্তে-আস্তে একবার উঠে দরজার কাছে এগিয়ে গেলুম । দরজায় হাত না দিতে সমস্ত ঘরখানা বিদ্যুতের তীব্র আলোয় দপ্ করে একবার জ্বলে উঠল । তারপর—বজ্রের সে কি ভয়ানক শব্দ ! সে শব্দে বাড়ীখানার ভিত্ পর্য্যন্ত যেন টলমল করে নড়ে উঠল—সঙ্গে-সঙ্গে ঝড়ের একটা প্রচণ্ড ঝাপটা দমাদম করে জানালা দুটো আচম্কা বন্ধ করে দিলে ! কেমন-একটা ভয়ে আমার বুকের রক্ত হিম হয়ে গেল—আমার পিছনে-পিছনে, আমার সামনে-সামনে, আমার আশে-পাশে—যেদিকে



## উন্মাদ

চাই সেইদিকে, যে দিকে যাই সেইদিকে—আকাশে বাতাসে ঝড়ে বৃষ্টিতে, বিদ্যুতের আলোয়, অন্ধকারের ভিতরে—কি-একটা ভয়ঙ্কর আতঙ্ক যেন প্রলয়ঙ্কর মূর্তিতে ফুটে উঠছে, ওৎপেতে, প্রকাণ্ড হাঁ করে হল্‌হলে জিভ বার করে, আমাকে গোগ্রাসে গিলে ফেলতে চেষ্টা করছে ;—খানিক হামাগুড়ি দিয়ে, খানিক দেয়াল হাত্‌ড়ে-হাত্‌ড়ে টলতে-টলতে পিছিয়ে এসে আমি বিছানার উপর এলিয়ে ধপাস্ করে পড়ে গেলুম।

সত্যিসত্যি মনে হোল, পাণের ঘরে কে যেন কাঁদছে, কে যেন যন্ত্রণায় ছটফট করছে ! সে কি কান্না—সে কি ছটফটানি ! থেকে-থেকে আমি অঁৎকে অঁৎকে উঠতে লাগলুম ! নিজের দেহকে যতটা পারি গুটিয়ে নিয়ে বিছানার চাদরখানায় সর্কাস্ মুড়ি দিয়ে, কুণ্ডলী পাঁকিয়ে বালিশে মুখ গুঁজড়ে পড়ে রৈলুম, দু হাতে প্রাণপণে দু কান চেপে ধরলুম, তবু সে কান্না থাম্‌ল না—থাম্‌ল না ! আমি বিকৃতস্বরে চীৎকার করে উঠলুম,—“নিশ্চল, নিশ্চল ! কেঁদনা—আর কেঁদনা—সত্যি বলছি তোমাকে ভালবাসি—তোমাকে ভালবাসি—তোমাকে ছেড়ে আমি থাকতে পারব না—আমি ত মরবই—আজ না-হয় দুদিন পর, তাই তোমাকে—তাই তোমাকে—”

নাঃ ! তবু ত কান্না থামে না—একি সর্বনেশে কান্না গো !

## মধুপর্ক

আর সহ করতে পারলুম না—ধড়মড় করে উঠে ছুটে গিয়ে জানালা খুলে দিলুম। বাইরে মুখ বাড়াতেই ঝড়ের অট্টহাস্তে সে কান্নার শব্দ কোথায় মিলিয়ে গেল—ঝরু ঝরু বৃষ্টির স্নিগ্ধ-শীতল জলধারায় আমার উত্তপ্ত শিরে যেন কার প্রশান্ত আশীর্বাদ এসে পড়ল।

সেইভাবে চোখ মুদে দাঁড়িয়ে রইলুম—কতক্ষণ, কে জানে! যখন চোখ চাইলুম, তখন প্রাতঃসন্ধ্যার কোমল ছায়ালোকে নিদ্রোঞ্চিত পৃথিবী পরিপূর্ণ হয়ে উঠেছে।

কালকের রাতের ঘটনা স্বপ্ন বলে মনে হতে লাগল। কিন্তু, সে স্বপ্ন কি কঠোর সত্য!

আমার দেহ রুগ্ন বটে, কিন্তু মনের উত্তেজনায় রোগের কোন লক্ষণ বুঝতে পাচ্ছিলুম না। এককথাই একশোবার মনে হচ্ছিল, নিশ্চয়লা কি আমার ইঙ্গিত বুঝতে পেরেছে? সে কি সেই শিশির ওষুধ—

দু-তিনবার ঘর থেকে বেরুতে গেলুম,—কিন্তু পা উঠল না। কে জানে গিয়ে কি দেখব?—তাই যদি সত্যিসত্যিই ঘটে থাকে, তবে সে দৃশ্য প্রাণ ধরে দেখতে পারব কি? সেই চিকণ রেশমী চুল,—ঘাড়ের উপর কপালের উপর যা একে-বেঁকে কঁকড়ে থাকত, সেই দুটি বড়-বড় টানা-টানা চোখ,—

## উন্মাদ

আমার চুম্বনে যারা আবেশে কাঁপতে কাঁপতে পদমকোরকের মত মুদে থাকত, সেই দুটি কপোল—আমার স্পর্শে ঘাতে ধীরে ধীরে গোলাপের রং ফুটে উঠত,—সেই রূপের কুমুম যদি স্বর্গ-চ্যুত পারিজাতের মত পরিম্লান হয়ে গিয়ে থাকে—আমি কি তবে তা দেখতে পারুব—পাষাণে বুক বেঁধে, শুষ্কনেত্রে, স্থিরভাবে ?

কিন্তু, দেখতেই হবে—দেখতেই হবে ! আমার এ লক্ষ্মী-শূণ্য সংসারে আমাকে ত আর বেশীদিন জ্বালা পোহাতে হবে না । আমি আর কতদিন ? তবে ভয় কি ?

ব্বা-বামুন তখনো আসে-নি, কোথাও জনপ্রাণীর সাড়া-শব্দ নেই । আমার বাড়ীখানা যেন হানাবাড়ীর মত ভয়ঙ্কর নিস্তর হয়ে আছে ! সাহসে ভর করে নির্মলার ঘরে গিয়ে চুকলুম ।

প্রথমেই চোখ পড়ল খাটের উপরকার তাকের দিকে । মালিশের শিশিটা সেখানে নেই !

খুব-জোরে দরজায় ঠেগ-দিয়ে দাঁড়ালুম—নইলে মাথা ঘুরে পড়ে যেতুম । বুকের ভিতরটা ছুপছুপ করছিল—সে ছুপছুপনি বন্ধ করতে দু-হাতে বুকের কাছটা চেপে ধরলুম—কিন্তু সে আওয়াজ থামল না ।

কিছানার চাদরে মাথা থেকে হাঁটু পর্যন্ত ঢেকে, মেঝের উপরে স্থির হয়ে শুয়ে আছে—কে সে ? নির্মলা ! তার আর-

## মধুপর্ক

কিছু দেখতে পেলুম না—কেবল পা-দুটি ছাড়া। ওঃ! এই কি সেই নির্মলার পা? রক্তহীন—কালিমালিপ্ত আড়ষ্ট,—আঙ্গুল-গুলো শিঠিয়ে সামনের দিকে বেকে-বেকে হুম্ড়ে পড়েছে!

প্রাণ শিউরে উঠল—দাঁড়িয়ে দাঁড়িয়ে ঠক্ ঠক্ করে কাঁপতে লাগলুম।

যা দেখেছি, যথেষ্ট! চাদর খুলে ও মুখ কে দেখবে?—আমি? পারব-না—পারব না! এত ভয়ানক,—মৃত্যু?—কে জানত!

মেঝের উপরে একখানা কাগজ পড়ে রয়েছে না? হ্যাঁ—নিশ্চয় সেই চিঠি! এ চিঠি এতক্ষণ প্রাণপণে যে আগলে ছিল, সে এখন কোথায়? তার প্রেতাত্মা কি ঘরের এক-পাশে মলিনমুখে দাঁড়িয়ে দাঁড়িয়ে এখনো আমার কার্যকলাপ নিরীক্ষণ করছে?

ভয়ে-ভয়ে গুড়ি মেরে এক-পা এক-পা করে এগিয়ে চিঠি-খানা তুলে নিলুম। ও কি ও! নির্মলার গায়ের চাদরখানা নড়ে কেন? আমার নিশ্বাস বন্ধ হয়ে গেল, মাথার চুলগুলো যেন মাথার উপর ঝাড়া হয়ে উঠল! বিস্ফারিত নেত্রে স্পষ্ট দেখলুম, চাদরের একপাশ জোরে জোরে নড়ছে—ভিতরে কি-যেন ঠেলে-ঠেলে বেরিয়ে আসতে চাইছে!

বিকটস্বরে চীৎকার করে উঠলাম—চাদরের ভিতর থেকে

## উদ্ভাস

নির্মলার পোষা, বেড়ালটা বেরিয়ে এসেই একছুটে পালিয়ে  
গেল। আঃ—রক্ষা পাই! কিন্তু, তবু আমার গা-ছমছমানি  
ভয় ঘুচল না—বেড়ালটার সঙ্গে সঙ্গে আমিও একদৌড়ে ঘর  
থেকে বেরিয়ে পড়লুম।

নিজের ঘরে এসে অনেকক্ষণ পরে মাথাটা একটু ঠাণ্ডা  
হোল। তৃষ্ণায় গলা শুকিয়ে গিয়েছিল, এক গেলাস জল  
খেলুম। খানিকক্ষণ ঘরের মেঝেতে পাইচারি করলুম। তার  
পর, সেই চিঠিতে কি আছে, তাই জানবার আগ্রহ হোল।

চিঠিখানা চোখের সামনে ধরলুম। প্রথমেই হাতের  
লেখা দেখে মন চমকে উঠল। এ কি, এ ত পুরুষের লেখা  
নয়!

“শ্রীচরণেষু,

দিদি, বড় লজ্জায়, মুখ পুড়িয়ে তোমাকে এই চিঠি  
লিখছি। সংসারে তুমি বৈ এ পোড়ারমুখীর আপন বলতে  
আর কে আছে? দিদি, যার কথায় ভুলে ধর্ম ছেড়েছি, কুলে  
কালি দিয়েছি, সে এখন আমায় পথে বসিয়ে কোথায় পামি-  
য়েছে। আমি এখন খেতে পাচ্ছি না, এ সময় তুমি যদি কিছু  
দাও, তবেই প্রাণে বাঁচব। আর কি লিখব। উপরে ঠিকানা  
দিলুম।”

অভাগিনী “কমলিনী।”

## মধুপর্ক

চিঠি পড়ে বজ্রাহতের মত স্তম্ভিত হয়ে বসে রইলুম।  
কমলিনীর পত্র ! নিশ্চল তাই আমাকে এ চিঠি দেখায়  
নি ! তাই সে কাঁদছিল ! আর আমি—আর আমি—  
এতক্ষণ স্থির হয়ে ছিলাম, আর পারলুম না। মেঝেতে  
কপাল ঠুকতে-ঠুকতে চোঁচিয়ে কেঁদে উঠলুম।

ডাক্তার ! এই আমার কথা। আমি যে কি পাষণ্ড,  
তা কি বুঝতে পারছ ? আমার মতন আশ্চর্য্য ও অস্বাভাবিক  
মানুষ তুমি কি আর কখনো দেখেছ ?

কিন্তু সবুর কর, এখনো একটু বাকি আছে। সে ঘট-  
নার পরের কথা আমি তোমাকে কিছুতেই বলতে পারব না;  
সুতরাং কি ফল সে বিফল চেষ্টায় ? তবে, আমার নিজের  
কথাই আরো কিছু বলব। মাঝখানে বাদ দেওয়াতে যদি  
কোথাও খাপছাড়া বোধ হয়, তবে সেটুকু তুমি নিজেই পুরিয়ে  
নিও।

আমি শ্মশানে যাই নি—যেতে পারি-নি। গাঁয়ের লোকে-  
রাই এসে নিশ্চলাকে শ্মশানে নিয়ে গেল। তারা জানলে,  
নিশ্চলা ভুল করে মালিশের ওষুধটা খেয়ে ফেলাতে, এই বিপত্তি  
ঘটেছে। নিশ্চলা মরে গিয়েও নাকি শিশিটা হাত থেকে  
ছাড়ে-নি, সেটা তার মুঠোর মধ্যেই পাওয়া গিয়েছিল। আহা,

ছাড়বে. কেন,—সেই শিশিই যে তাকে আমার কবল থেকে মুক্তি দিয়েছে !

খবর পেয়ে ললিতও এসেছিল। নিখিলার ঘর থেকে যখন বেরিয়ে এল, সে তখন কাঁদছিল। তার উপর আর আমার রাগ ছিল না। তার কান্নায় আমারও কান্না এল।

আমি কাঁদছি দেখে চোখের জল মুছে সে আমার কাছে এসে দাঁড়াল। আমাকে সাহায্য দিতে লাগল।

আমি বললুম, “ললিত বাবু শুনেছি আপনি মস্ত ডাক্তার। একটা কথা রাখবেন কি ?”

—“বলুন।”

—“আপনি ঠিক বলবেন—লুকোবেন না ?”

—“কি কথা আগে শুনি।”

—“আমার যক্ষ্মা হয়েছে, জানেন ত ?”

—“শুনেছি বটে।”

—“হ্যাঁ, আমার যক্ষ্মা হয়েছে। আপনি আমাকে একবার পরীক্ষা করে ঠিক বলুন দেখি, কত শীঘ্র আমি মরব। আপনার পায়ে পড়ছি, কিছু লুকোবেন না। মরণে আমার ভয় নেই।”

ললিত একটু কুণ্ঠিত হয়ে বললে, “মাপ করবেন—এতে

## মধুপর্ক

পায়ে পড়াপড়ির কি আছে ? যখন জানতে চাইছেন, কিছুই লুকোবো না।”

ললিত খুব মন দিয়ে অনেকক্ষণ ধরে নানারূপে পরীক্ষা করলে। তারপর বললে, “আমার যতদূর বিদ্যা, তাতে বলতে পারি, আপনার একেবারেই যক্ষ্মারোগ হয়-নি।

—অ্যা, ঠিক বলছেন ?”

—“হ্যাঁ।”

আমি ছুঁহাতে ললিতের হাত জড়িয়ে ধরে কাতরস্বরে বললুম,—“বলুন—বলুন, লুকোবেন না। আমার যক্ষ্মা হয়-নি, বলেন কি ?”

আমার রকম দেখে ললিত আশ্চর্য হয়ে বললে,—“আমি ঠিক বজুছি, কিছুই লুকোই-নি।” আপনি আমার কথায় বিশ্বাস করুন।”

আমার নির্মল !—আমার নির্মল !—এই আলোয়-ভরা পৃথিবী আমার চোখে একলহমায় অঁধার-ঢাকা হয়ে গেল ! ছুঁ-চোখ মুদে যেন দেখলুম, সেই গভীর অন্ধকার ভেদ করে বিদ্যুতের মত উজ্জ্বল একখানি মুখ ঝেগে উঠল—চোখে সেই মধুর লজ্জা, ঠোঁটে সেই মৃদু হাসি, মুখে সেই স্বর্গের স্ত্রী—সে যে তারই মুখ ! চকিতে সে ‘মুখ কোথায়’ লুকিয়ে গেল,—তারপরেই আবার কি ও ঝেগে উঠল !—ও যে



সেই. পা-দুখানা;—সেই আড়ষ্ট, রক্তহীন, আঙ্গুল-দুন্ডানো  
পা-দুখানা !

ভয়বিভোর চোখে সেই বিকৃত পা-দুখানা দেখতে দেখতে  
আমি অজ্ঞান হয়ে পড়লুম।

যখন জ্ঞান হোল—দেখলুম, স্মৃতির শ্মশানে আমি পরি-  
তাক্ত, উন্মত্ত, জীবন্মৃত !

ডাক্তার ! না, আর থাক—”

\* \* \* \* \*

এই অপূৰ্ণ পাগলের বিচিত্র কাহিনী-পড়া সাক্ষ হইল।  
মনটা কেমন ভারগ্রস্ত হইয়া উঠিয়াছিল, তাড়াতাড়ি উঠিয়া  
পড়িয়া বলিলাম, “চল, চল, তোমার এ গারদ থেকে বেরিয়ে  
হাঁপ ছেড়ে বাঁচি !”

শচীশের সঙ্গে বাহিরে আসিলাম। ফটকের দিকে  
যাইতে যাইতে পথে সেই পাগলের ঘর পড়িল।

সেদিকে তাকাইতেই দেখি, আকাশের দিকে স্থিরনেত্রে  
চাহিয়া সেই পাগল স্তব্ধভাবে দাঁড়াইয়া আছে। তাহার পাণ্ডুর  
মুখে সূর্যের কিরণ লাগাতে গালের উঁচু-উঁচু হাড়দুখানা যেন  
আরও-বেশী বাহির হইয়া পড়িয়াছে।

হঠাৎ শচীশকে দেখিয়া পাগল ডাকিল, “ডাক্তার,  
ডাক্তার !”

## মধুপর্ক

শচীশ তার কাছে গেল।

হাত বাড়াইয়া পাগল কহিল, “হাতটা দেখুন ত  
একবার!”

শচীশ তার হাত ও বুক পরীক্ষা করিয়া বলিল, “তাইত,  
আপনার যে যক্ষ্মা হয়েছে!”

ম্মান হাসি হাসিয়া পাগল বলিল, “আঃ, বাঁচলুম!”

শচীশ আমার কাছে আসিয়া নিম্ন স্বরে বলিল, “যখন  
ভাল থাকে, তখনো এর এই পাগলামি-টুকু ঘোচে না।”

## কুসুম

ক

সে পতিতা । জীবনের ক্ষণিক ভ্রমেতে নয়,—বিধাতার  
বিধানে সে পতিতা ।

পঙ্কের ভিতরে পদ্মের মতই কুসুম ফুটিয়া উঠিয়াছিল ।

\* \* \* \* \*

ঘরে ঘরে সন্ধ্যাদীপ জলিয়া উঠিবার আগেই, পথের  
ধারের বারান্দায় কুসুম তাহার রূপের প্রদীপ উজ্জ্বল করিয়া  
বসিয়া থাকিত । তাহার প্রাণ তখন কাঁদিত, মুখ হাসিত !

রাস্তার লোকগুলা যেন 'উর্দ্ধমুণ্ড' ব্রত গ্রহণ করিয়াছে,—  
সকলের চোক তাহার উপরে ! তাহাদের সেই নিষ্ঠুর, ক্ষুধিত,  
ও ঘৃণিত দৃষ্টির মাঝে কুসুম, বিশ্বের নারী-জাতির প্রতি মৌন  
ধিকারকে ফুটিয়া উঠিতে দেখিত পাইত ।

রাস্তায় গাড়ীর পর গাড়ী ছুটিতেছে । এক-একখানা  
গাড়ীর খড়খড়ি-কপাট সব তোলা । কিন্তু কুসুম দেখিত,  
খড়খড়ির ফাঁকে ফাঁকে কুললক্ষ্মীদের কোঁতুলনী দৃষ্টি বাহিরের

## মধুপর্ক

মুক্ত আলোর দিকে একাগ্র হইয়া আছে। সে দৃষ্টি কুম্বের উপর পড়িলেই সচকিত হইয়া উঠিত। কুম্বের মনে হইত, সে পবিত্র নয়নের নির্মল দৃষ্টি যেন বিদ্যুতাগ্নির মত তার দেহ-মনকে ঝলসাইয়া দিয়া যাইতেছে। মরমে মরিয়া কুম্ব, বারান্দার রেলিঙ্গে মাথা রাখিয়া বসিয়া থাকিত। দেহের ভিতর হইতে তাহার নারী-প্রাণ যেন কাঁদিয়া কাঁদিয়া বলিত, “এ রূপের প্রদীপ নিবিষে দাও,—ওগো কঙ্কালের বাধন খুলে দাও!”

খ

বারান্দা হইতে কুম্ব সেদিন উৎকণ্ঠিত হইয়া দেখিল, ট্রামগাড়ী থেকে নাবিতে গিয়া একটি ভদ্রলোক পা ফস্কাইয়া রাস্তার উপরে পড়িয়া গেলেন। গাড়ীস্থল লোক হাঁ হাঁ করিয়া উঠিল,—কিন্তু গাড়ী না থামাইয়া চালক আরও জোরে গাড়ী চালাইয়া দিল।

পাথরে মাথা ঠুকিয়া বৃদ্ধ একেবারে অজ্ঞান হইয়া পড়িলেন। তাঁহার চারিপাশে ক্রমেই লোক জড় হইতে লাগিল।

একজন বলিল, “ওহে, মাথা দিষে রক্ত পড়্চে যে!”

আর একজন বলিল, “মরে যায় নি ত?”

আর একজন বলিল, “উঁহু!”

আর একজন বলিল, “মরেনি, কিন্তু মবুতে কতক্ষণ!”

চলছে, এখন পুলিশ-টুলিশ এসে পড়বে, আর সাক্ষী মেনে খানায় ধরে নিয়ে যাবে !”

বারান্দার উপরে ঝুঁকিয়া পড়িয়া আকুল-চোখে কুমুম দেখিল, সবাই গোলমালই করিতেছে, বৃদ্ধকে সাহায্য করা কাহারও ইচ্ছা নয় !”

কুমুম আর স্থির থাকিতে পারিল না, তাড়াতাড়ি উপর হইতে নামিয়া আসিল।

ভিড় ঠেলিয়া সে ভিতরে গেল। অচেতন বৃদ্ধের দিকে একবার চাহিয়া, কুমুম বলিল, “আপনারা একে দয়া করে আমার ঘরে তুলে দ্বিয়ে আন্বেন ? নৈলে ইনি মারা যাবেন।”

তিন-চারজন লোক ছুটিয়া আসিল।

ভিড়ের ভিতরে ফিস্‌ফিস্‌ করিয়া একজন বলিল, “বুড়োটা এর কে রে ?”

আর একজন বলিল, “হেঁঃ ! তা আর বুঝতে পার্চ না ম্যাডাকান্ত ?”—সে একটা অর্থপূর্ণ ঈশারা করিল। অনেকেই হো-হো করিয়া হাসিয়া উঠিল।

কুমুম সে সব কাণেও তুলিল না। চোখ নামাইয়া সে মাটির দিকে তাকাইয়া রহিল।

চারজন লোকে ধরাধরি করিয়া বৃদ্ধকে তুলিয়া ধরিল। তখনও তাঁর জ্ঞান হয় নাই; মাথায় রক্তপড়াও বন্ধ হয় নাই।

## মধুপর্ক

তাঁর মুখ একদিকে হেলিয়া আছে,—হাত দুখানি অসহায়-ভাবে  
দুদিকে ঝুলিয়া পড়িয়াছে। কুসুম আশ্বে' আশ্বে হাতদুটি  
আবার বৃদ্ধের বৃকের উপরে তুলিয়া দিল।

পিছন হইতে কে-একটা অসভ্য উচ্চকণ্ঠে বলিয়া উঠিল,  
“যত্ন করবার এমন মনের মানুষ পেলে আমিও বাবা, দিনে  
দুশোবার ড্রাম থেকে পড়ে যেতে রাজী আছি !”

গ

একরাত একদিন গিয়াছে,—বৃদ্ধ তেমনি অজ্ঞান।

কুসুম একরকম খাওয়া-দাওয়া ভুলিয়া তাঁহার সেবাসুশ্রমা  
করিতেছে।

সে নিজের কাপড় ছিড়িয়া বৃদ্ধের ক্ষতস্থানে বাঁধিয়া  
দিয়াছে; রাতভোর জাগিয়া, বিছানার পাশে বসিয়া তাঁকে  
পাখার হাওয়া করিয়াছে। বাড়ীর তলায় একজন ডাক্তার  
থাকিত, কুসুম তাহাকে ডাকাইয়া আনিয়াছিল।

কিন্তু সকাল গেল, বিকাল গেল—কৈ, রোগীত এখনে  
চোখ মেলিয়া চাহিলেন না! কুসুম ভাবনায় পড়িল।

সন্ধ্যার সময়ে বৃদ্ধের গায়ে হাত দিয়া কুসুম দেখিল, গা  
যেন আগুন!

ভয় পাইয়া তখনি সে চাকরকে একজন নামজাদা  
ডাক্তার ডাকিয়া আনিতে বলিল।

ডাক্তার, আসিল। সে বয়সে যুবক,—সবে বিলাত  
হইতে ফিরিয়াছে।

পরীক্ষার পর ডাক্তার বলিল, “এঁর অবস্থা বড়  
ভাল নয়।”

কুমুম কাতরে বলিল, “তবে কি হবে?”

“ভাল করে চিকিৎসা হলে, বিশেষ কোন ভয় নেই।”

রোগীর মাথায় ‘ব্যাণ্ডেজ’ বাঁধিয়া ও ‘প্রেসক্রিপসন্’  
লিখিয়া ডাক্তার উঠিয়া দাঁড়াইল।

কুমুম ডাক্তারের হাতে ‘ভিক্রিটে’র টাকা কটা  
গুঁজিয়া দিল।

আঙ্গুল দিয়া টাকাগুলি অমুভব করিতে করিতে কুমুমের  
দিকে চাহিয়া ডাক্তার বলিল, “ইনি তোমার কে?”

কুমুম কি উত্তর দিবে ভাবিতেছে, কিন্তু তার আগেই  
ডাক্তার আবার বলিল, “ইনি বুঝি—”

ডাক্তার কি বলিবে, সেটা আগে থাকিতেই আন্দাজ  
করিয়া তাহার কথা শেষ না-হইতে-হইতেই কুমুম সবেগে মাথা-  
নাড়া দিয়া বলিয়া উঠিল, “না, না, না!”

“তবে?”

কুমুম অল্প দু-চার কথায় সব বুঝাইয়া দিল।

ডাক্তার খানিকক্ষণ কি ভাবিল। তার পর বলিল, “দেখ,

## মধুপর্ক

তুমি এক কাজ কর। একে কাল সকালেই হাঙ্গপাতালে পাঠিয়ে দাও। সেখানে ভাল চিকিৎসাও হবে, আর হঠাৎ কিছু হলে তোমারও কোন দায়দোষ থাকবে না।”

দরজার কাছে দাঁড়াইয়া এক প্রৌঢ়া স্ত্রীলোক ডাক্তারের কথার একমনে গুনিতেছিল। এখন, হঠাৎ সে ঘরের ভিতরে ঢুকিয়া বলিল, “আমিও তাই বলি ডাক্তার-বাবু! ছাখদিকিন্, কোথাকার আপন কার ঘাড়ে এসে পড়ল! ও ছুঁড়ীর মতিচ্ছন্ন হয়েছে,—আমার কথাত্তে কিছুতেই ও কাণ পাত্বে না। আপনাদের পাঁচজনের দ্বায় কোনরকমে ছুঁটাকা-পাঁচটাকা ঘরে আসে, তা ও ছানরে ত্যানরে, কঙ্গীরে, ডাক্তার রে, ওষুধ রে, পত্তি রে,—ভালমানুষের ওদখ কি পোষায়, না ভাল ছাখায়? তা তুই—”

কোনরকম উত্তরের অপেক্ষা না রাখিয়া আপন মনে সে গড়্গড় করিয়া বলিয়া যাইতেছিল, কিন্তু কুসুম অধীর হইয়া বলিয়া উঠিল, “মা তুই থাম্ বল্চি!”

“থাম্? কেন থাম্? হক্ কথা বল্ব, তা—”

“ফেব্ যদি ফ্যাচ্-ফ্যাচ্ কর্বি মা, তাহলে এই ঘট দিবে—” বলিতে বলিতে কুসুম জলের ঘটির দিকে হাত বাড়াইল।



## কুমুম

কুমুমের মা ভয় পাইয়া ঘর থেকে বাহির হইয়া নীচে নামিয়া গেল ; এবং সেখান হইতে অকথা ভাষায় মেয়েকে গালি পাড়িতে লাগিল ।

সেদিকে কাণ না পাতিয়া কুমুম, ডাক্তারকে বলিল, “এঁর জ্ঞান হবে কখন ?”

ডাক্তার এতক্ষণ চুপ্‌টি করিয়া কি-এক চোখে কুমুমের দিকে চাহিয়া ছিল । তাহার প্রশ্ন শুনিয়া বলিল, “আজ রাতেই জ্ঞান হতে পারে । তবে, বলাও যায় না”,—তারপর হাত বাড়াইয়া বিছানার উপর হইতে টুপীটা তুলিয়া লইয়া বলিল, “তবে, আমি এখন চল্লুম ।”

“আমুন,”—কুমুম ডাক্তারকে নমস্কার করিল ।

যাইতে যাইতে হঠাৎ দাঁড়াইয়া পড়িয়া ডাক্তার বলিল, “দেখ, তোমার ‘ভিজিটে’র টাকা ফিরিয়ে নাও ।”

কুমুম, বিস্মিতস্বরে বলিল, “কেন ?”

ডাক্তার স্নিগ্ধচোখে কুমুমের চকিত চোখের দিকে চাহিয়া, শুধু বলিল, “না ।”

কুমুম অত্যন্ত সন্দেহ ও বিরক্তির সহিত কহিল, “কেন নেবেন না, বলুন আপনি !”

কুমুমের মনের ভাব বুঝিয়া ডাক্তার মুখ টিপিয়া নীরব-হাস্য করিল । তারপর হাতের টাকাগুলো ঝন্ঝান্-শব্দে

## মধুপর্ক

বিছানার উপরে ছুঁড়িয়া দিয়া, জুতা মস্‌মস্‌ করিতে করিতে তাড়াতাড়ি চলিয়া গেল।

কুসুম খানিকটা ঘাড় হেঁট করিয়া দাঁড়াইয়া রহিল। আপনমনে অশ্রুট ও দুঃখিত কণ্ঠে বলিল, “এমন পোড়া মন নিয়ে সংসারে এসেছি যে, সাধুকেও সন্দেহ হয়!”

ঘ

• অনেক রাতে রোগীর জ্ঞান হইল।

পাশ ফিরিয়া, খামিয়া খামিয়া তিনি বলিলেন, “বুক জলে যাচ্ছে—একটু জল।”

পাখার বাতাস করিতে করিতে তখন কুসুমের সবে একটু তন্দ্রা আসিয়াছে। রোগীর গলা শুনিয়া ধড়মড় করিয়া সে উঠিয়া বসিল। তাড়াতাড়ি কুঁজো হইতে একটা কাঁচের গেলাসে জল গড়াইয়া সে রোগীর মুখের কাছে ধরিল।

জলপান করিয়া রোগী আরাম পাইলেন। কুসুম তাঁহার তপ্ত কপালে আপনার ঠাণ্ডা হাতদুখানি আলতভাবে বুলাইয়া দিতে লাগিল।

“ওঃ! বুক জলে যাচ্ছে, বুক জলে যাচ্ছে!”

কুসুম তখনি রোগীর বুকে হাত বুলাইতে লাগিল। তিনি “আঃ” বলিয়া চোখ বুজিলেন।

## কুমুম

খানিক পরে আবার তাঁহার তৃষ্ণা পাইল। কুমুম  
আবার জল দিল।

রোগী খানিকক্ষণ বিমস্ত দৃষ্টিতে চাহিয়া রহিলেন, তারপর  
একবার জড়িত কণ্ঠে বলিলেন, “কে? মা সুধা?”

মুখ ফিরাইয়া কুমুম বলিল, “না, না! আমি  
পোড়াকপালী!”

রোগী চোখ মুদিয়া আপনা-আপনি বলিলেন, “এত রাত  
অবধি জেগে আছি মা!”

মা! সে কি কথা, সে কি সুর!—কুমুমের সারা বুক  
ভরিয়া উঠিল। খাটের পরে মাথা রাখিয়া সে একমনে, সেই  
সুর আপন মনের মধ্যে উন্টাইয়া-পান্টাইয়া শুনিতে লাগিল।

তার বোধ হইল, সে যেন এই বিপন্ন বৃদ্ধের আপন কণ্ঠা!  
বাবা যে কেমন, কুমুম ত একথা কখনই জানে নাই,—আজ  
যেন তারই একটা অজানা আনন্দের আভাস প্রাণে তার  
জাগিয়া উঠিল।

হঠাৎ ঘরের দরজায় বাহির হইতে করাঘাত হইল।

কে ডাকিল, “কুমুম!”

কুমুম শুনিয়াও শুনিল না। সে তখনও বুঝি মা-ডাক  
শুনিতেছে!

“কুমুম!—অ আমার কুমুমকলি!”

## মধুপর্ক

কুসুম চুপ ।

“ও কুসুম, শুন্চ ?”—সঙ্গে-সঙ্গে আগন্তুক বাজুখাই গলায় একটা গান ধরিয়া বসিল । সে ত গান নয়—যেন ষাঁড়ের ডাক !

এবারে কুসুমের মনে ভারি ভয় হইতে লাগিল,—রোগী যদি শুনিতে পান ?

“( হঠাৎ গান থামাইয়া ) ওগো কুসুম,—ও—” কিন্তু কথা শেষ হইতে না হইতেই হঠাৎ নীরবে দরজাটা খুলিয়া গেল এবং বিদ্যুতের মত বাহিরে মুখ বাড়াইয়া নিম্ন অথচ তীব্রস্বরে কুসুম বলিল, “ফেরু যদি কুসুম কুসুম করবে, তাহলে ঝাঁটা মেঝে বিষ ঝেড়ে দেব । বেরোও এখান থেকে—।

যেমন সহসা দরজাটা খুলিয়াছিল তেমনি সহসা আবার বন্ধ হইয়া গেল ।

উ

পরদিনের সন্ধ্যাবেলা । কুসুম জানালার কাছে একলাটি বাসিয়াছিল ।

আজ সকালে রোগীর জ্বর হঠাৎ বাড়িয়া উঠাতে কুসুম ভয় পাইয়া অনিচ্ছাসঙ্গেও রোগীকে হাঁসপাতালে পাঠাইয়া দিয়াছে । না দিয়া আর উপায় কি ?

আপন জীবনের মলিনতা, কুসুমকে সব-সময়েই কাতর করিয়া রাখিত । এই মলিনতার ভিতরে থাকিয়াও, সে যে

## কুমুম

একটা ভাল কাজ করিতে পারিয়াছে, এটা ভাবিয়াও মন তার সন্তোষ ও পুলকে পূরিয়া উঠিতেছিল।

আর, রোগীর উপরে তার কেমন একটা মায়াও পড়িয়া গিয়াছিল। রোগীর সেই রোগকাতর মুখখানি এখনও তার প্রাণের ফাঁকে ফাঁকে উকি মারিতেছিল।

দিনের ভিতরে চার-পাঁচবার চাকর পাঠাইয়া কুমুম রোগীর খবর লইয়াছে। জানিয়াছে যে, রোগীর বাড়ীর লোকেরা কেমন করিয়া সংবাদ পাইয়া হাসপাতালে আসিয়াছে।

\* \* \*

তিন-চারদিন পরে শুনিল, রোগীর জ্বর বন্ধ হইয়াছে, কাল তিনি নিজের বাড়ীতে ফিরিবেন।

একটা আশ্বস্তির নিশ্বাস ফেলিয়া কুমুম ভগবানকে ধন্যবাদ দিল। ঠিক করিল আজই সে রোগীকে একবার দেখিতে যাইবে।

চ

হাসপাতালের স্মৃখে আসিয়া কুমুম গাড়ী হইতে নামিল। ফুলদার রেশমী চাদরখানি মাথার উপরে টানিয়া দিয়া চাকরের সঙ্গে চলিল। চাকর তাহাকে রোগীর ঘর চিনাইয়া দিল। আশ্বে আশ্বে দরজা ঠেলিয়া কুমুম ভিতরে ঢুকিল।

একটি বালিসে ঠেসান্ দিয়া বৃদ্ধ বসিয়া আছেন। পাশে

## মধুপর্ক

একটি যুবক ও একটি বয়স্ক রমণী। বৃদ্ধ কি' কথা 'কহিতে-  
ছিলেন,—হঠাৎ কুসুমকে ঢুকিতে দেখিয়া বলিতে বলিতে  
থামিয়া গেলেন।

কুসুম সঙ্কুচিতভাবে আগাইয়া গিয়া বৃদ্ধের পায়ে মাথা  
ছোঁয়াইয়া ভক্তিমতী কণ্ঠার মত প্রণাম করিল।

কুসুমের দিকে চাহিয়া বিস্মিত বৃদ্ধ বলিলেন, “কে গা  
তুমি?”

কুসুম মৃদুস্বরে বলিল, “আমাকে চিনতে পারছেন না  
বাবা?”

ভাল করিয়া কুসুমের মুখ দেখিতে দেখিতে বৃদ্ধ  
বলিলেন, “হঁ, চিনি চিনি কবুচি বটে! বোধ হয়—বোধ হয়,  
অসুখের সময়ে তোমাকে কোথায় দেখেছি। তাই নয় কি?”

কুসুম ঘাড় নাড়িয়া জানাইল, হঁ।

“রোসো—রোসো, মনে পড়েচে। তুমি কি আমার  
পায়ে হাত বুলিয়ে দিয়েছিলে, আমাকে জল খেতে দিয়েছিলে?”

“ট্রাম থেকে পড়ে গেলে পর আপনাকে আমি আমার  
ঘরে তুলে নিয়ে গিয়েছিলাম। আপনি আমার বাড়ীতে  
দু' রাত ছিলেন। তারপর আপনার জ্বর বেড়ে ওঠাতে আমি  
ভয় পেয়ে আপনাকে এখানে পাঠিয়ে দি। আপনি ভাল  
আছেন শুনে একবার দেখে যেতে এসেছি।”

## কুসুম

• বৃদ্ধ মুখ নীচু করিয়া কি ভাবিতে লাগিলেন। তারপর, কুসুমের পা থেকে মাথা পর্য্যন্ত একবার খরচোখে দেখিয়া লইয়া চিন্তিতভাবে বলিলেন, “তোমার ঘরে, তোমার হাতে আমি জল খেয়েচি,—বল কি, অ্যা!”

বৃদ্ধের ভাব দেখিয়া কুসুম একেবারে থ হইয়া গেল।

তীব্রস্বরে বৃদ্ধ বলিলেন “হ্যা—হ্যা, আরও মনে পড়্চে। তুমি আমাকে দুধ আর সাবুও খেতে দিয়েছিলে।”

একটু খামিয়া হঠাৎ বিছানার উপরে সোজা হইয়া বসিয়া, উগ্রকণ্ঠে তিনি আবার বলিয়া উঠিলেন, “গণিকা তুই,—জানিস্, আমি ব্রাহ্মণ!”

কুসুমের মাথা হেঁট হইয়া গেল।

“আমার জাত মেরেচিস্! তার চেয়ে আমি মরে গেলাম না কেন, আমি মরে গেলাম না কেন!—পাপিষ্ঠা, আবার কি করতে এখানে এসেচিস্ তুই?”

কুসুম কিছু বলিতে পারিল না। আড়ষ্ট ও জড়সড় হইয়া দাঁড়াইয়া রহিল।

বৃদ্ধ কৰ্কশস্বরে বলিলেন, “কথা ক’! বল, কি চাস্ তুই? বখ্‌শিষ্?”

• বখ্‌শিষ্!—কুসুমকে ঠিক যেন কে একটা ধাক্কা মারিল। গৰ্জিতভাবে হঠাৎ মাথা তুলিয়া দৃঢ়স্বরে সে বলিল, “হা!”

## মধুপর্ক

বালিশের তলা থেকে একখানা দশটাকার নোট বাহির করিয়া বুদ্ধ অবজ্ঞাভরে কুসুমের দিকে ছুঁড়িয়া ফেলিয়া দিলেন। নোটখানা কুসুমের গায়ে লাগিয়া মাটিতে পড়িয়া গেল।

কুসুম হেঁট হইয়া নোটখানা তুলিয়া লইল। তারপর কোন দিকে না চাহিয়া নতমুখে দৃঢ়পদে ঘর ছাড়িয়া চলিয়া গেল।

কুসুম, রাস্তায় আসিয়া দাঁড়াইল।

একটা খোঁড়া ভিখারী হাত পাতিয়া বলিল, “মা কিছু ভিক্ষে দাও মা!”

কুসুম অত্যন্ত তাড়াতাড়ি নোটখানা ভিখারীর হাতে হস্তান্তর করিয়া দিল।

ভিখারী প্রথমটা হতভম্ব হইয়া গেল। তারপর কুসুমের পায়ের তলায় পড়িয়া গদগদকণ্ঠে বলিল, “জয় হোক রাজা মা,—জয় হোক!”

কিন্তু সে জয়ধ্বনি কুসুমের কাণে প্রবেশ করিল না। বধির হইয়া সে রৌদ্রদীপ্ত আকাশের অনন্ত নীলিমার দিকে চাহিল,—হায়, তাহার অশ্রু-অন্ধ চোখে বিশ্ব আজ অন্ধকার—  
অন্ধকার!



# দেবী

ক

ডেপুটিগির্নিস মচল পদ পাইয়া বাঙ্গালাময় চলিয়া বেড়াইতেছিলাম। সংপ্রতি ছ' মাসের ছুটি লইয়া কলিকাতায় আসিয়া কিছুদিনের জন্য চলা বন্ধ করিয়া অচল হইয়া বসিয়াছি।

বাড়ীর সাম্নেকার রোয়াকে বসিয়া সেদিন খবরের কাগজ পড়িতেছিলাম। হঠাৎ মুখ তুলিয়া দেখি, আমার দিকে অবাক হইয়া চাহিয়া একটা লোক চূপ করিয়া রাস্তার উপরে দাঁড়াইয়া আছে।

আমার চোখ তাহার চোখে মিলিবামাত্র সে খতমত খাইয়া মুখ নীচু করিয়া একদিকে চলিয়া গেল। খানিক দূর গিয়া মুখ ফিরাইয়া আবার সে আমার দিকে চাহিল। আমি তখনও কৌতূহলী হইয়া তা'র দিকে তাকাইয়া আছি দেখিয়া সে হনু হনু করিয়া খানিকটা আগে চলিয়া গেল। তা'রপর ফিরিয়া আবার আমার দিকেই আসিতে লাগিল।

একেবারে আমার সম্মুখে আসিয়া ছ' চারবার টোক

## মধুপর্ক

গিলিয়া সে স্বিধার সহিত বলিল, “আপনি—আপনি কি আমাকে চিন্তে পারুচেন ?”

বাস্তবিক, লোকটাকে চিনি চিনি মনে হইতেছিল ; কিন্তু ঠিক স্মরণ না হওয়াতে আমি একটু বোকা বনিয়া মাথা চুলকাইতে লাগিলাম ।

সেও সন্দিগ্ধস্বরে জিজ্ঞাসা করিল, “আপনার নাম ত পূর্ণেন্দুবাবু ?”

আমি একটু আশ্চর্যান্বিত হইয়া বলিলাম, “আজ্ঞে হাঁ।।”

“আর আমি হচ্ছি জগাই—হা হা হা !”

খুব খানিকক্ষণ হাসিয়া হঠাৎ হাসি থামাইয়া সে খপ্পু করিয়া আমার একখানা হাত চাপিয়া ধরিয়া কহিল, “কি হে পূর্ণ,—আউট অফ্ সাইট্, আউট-অফ্ মাইণ্ড্, নাকি বাবা ? য়াস ফ্রেণ্ড্ না হ’লেও আমি ত তোমার ক্লাশ-ফ্রেণ্ড্ সে কথাটা কি স্বেফ্ ভুলে’ বসে’ আছ—অঁ্যা ?”—বলিয়াই সে আমার হাত ছাড়িয়া মুক্কব্বানার সহিত পিঠ্ চাপ্ড়াইতে সুরু করিয়া দিল ।

এতক্ষণে চিনিলাম,—জগাই বটে ! ছেলেবেলায় তা’র সঙ্গে স্কুলে পড়িয়াছিলাম । তা’র মত ডানপিটে ও বকাটে ছেলে ক্লাশে আর দু’টি ছিল না । দুষ্টামির নিত্য নূতন ফন্দি চট্ পট্ আবিষ্কার করিতেও সে অদ্বিতীয় ছিল ।

## দেবী

আমরা তাঁকে জুজুর মত ভয় করিতাম। যে পণ্ডিত মাথায় টিকি বজায় রাখিতে চাহিতেন—তিনি সাধামত জগাইচাঁদকে ঘাঁটাইতেন না। চেয়ারে চারিটা পায়ার তলায় চারিটা সুপারি রাখিয়া মাষ্টার মশাইকে যে কতবার সে 'পপাত ধরনীতলে' করিয়াছে, তাহার সংখ্যা হয় না। স্কুলের হেড-মাষ্টার বেজায় কড়া ও গরম মেজাজের লোক ছিলেন। প্রথম দিনকতক তিনি জগাইচাঁদকে শায়েস্তা করিবার চেষ্টা করিলেন; কিন্তু জগাইচাঁদ সপ্তাহখানেক ধরিয়া তাঁহার তামাকে লঙ্কাবাটা মিশাইয়া, চেয়ারে ষাট সত্তরটি ছারপোকা ছাড়িয়া এবং জুতার ভিতরে আলপিন ঢুকাইয়া তাঁহাকেই দস্তুরমত শায়েস্তা করিয়া দিল। হেড-মাষ্টারের কড়া ও গরম মেজাজ একেবারে ঠাণ্ডা হইয়া গেল।

এ সেই জগাই! আজ পনের ষোল বৎসর তাহাকে দেখি নাই—এতদিন পরে এমন হঠাৎ তাহার সঙ্গে দেখা হইয়া যাওয়াতে মনে মনে কিছু খুসি হইলাম। জীবনের মাঝপথে বাল্যের সাথীকে দেখিলে খুসি হয় না, এমন লোকও বোধ করি সংসারে নাই।

হাসিতে হাসিতে জগাইকে লইয়া বাহিরের ঘরে গিয়া বসিলাম।

জগাইয়ের মাথায় লম্বা টেড়ি, চুলগুলা তেল-চক্চকে।

## মধুপর্ক

গায়ে একটা আধ-ময়লা চুড়ীদার পাঞ্জাবী, জামাটা যে ইস্ত্রি করা হয় নাই, বাড়ীতেই 'জলকাচা' হইয়াছে, সেটা বেশ স্পষ্টই বুঝা যায়। পরনে একখানা চওড়া-পাড়ের শাড়ী— নিশ্চয়ই কোন স্ত্রীলোকের। পায়ে তালিমারা অনেক দিনের পরা এক জোড়া পম্প-সু,— ডান পায়ের জুতাটি মুখব্যাদান করিয়া হাওয়া খাইতেছে। বাঁ হাতে একগাছা পিচের ছড়ি,— মাথার দিক্‌টা ভাঙ্গিয়া গিয়াছে ; ডান হাতে একটা বিড়ি— সবটাই প্রায় পুড়িয়া গেলেও জগাই অতি সন্তর্পণে বিড়ির গোড়ার দিক্‌টা ধরিয়া যথেষ্ট উৎসাহের সহিত টানিতে ছাড়িতেছে না।

জগাই, জামার সাম্নেকার নীচের অংশটি কোলের ভিতরে গুঁজিয়া বসিয়া পড়িল। আমি লক্ষ্য করিলাম, জামার সেখানটায় লম্বা সেলাই করা। সেলাইটা যে আমার চোখে পড়ে, বোধ হয় জগাই সেটা পছন্দ করে না—তাই সেলাইটা কোলের ভিতরে ঢাকিয়া রাখিল। বুঝিলাম জগাইয়ের মনে বাবুগিরির সখটুকু বিলক্ষণ, কিন্তু বেচারীর পয়সার ভারি থাকৃতি।

সাম্নে টিনের বাক্সে ভাল ইজিপ্‌সিয়ান সিগারেট ছিল। বাক্সটি দেখিবামাত্র জগাই হাতের বিড়িটা ফেলিয়া দিয়া, টপ্‌ করিয়া একটি সিগারেট ধরাইয়া ফেলিল। তা'রপর চেয়ারে

হেলিয়া পড়িয়া কড়িকাঠের দিকে তাকাইয়া পরম আশ্রামের  
সহিত ছহ করিয়া ধোঁয়া ছাড়িতে ছাড়িতে বলিল, “বাঃ বাঃ  
বেড়ে সিগারেট ত !”

আমি একটু হাসিয়া বলিলাম, “তারপর জগাই, কেমন  
আছ, বল ।”

জগাই টেবিলের উপরে নবাবের মত একখানা পা তুলিয়া  
দিয়া নাচাইতে নাচাইতে বলিল, “আছি ভাল । খাচ্ছি-দাচ্ছি  
বেড়িয়ে বেড়াচ্ছি । তবে কি জ্ঞান, যা কিছু কষ্ট অন্ন-বস্ত্রের ।”

আমি হাসিয়া বলিলাম, “কি রকম ?”

জগাই চেয়ারের দু’পাশে হাত দুলাইতে দুলাইতে বলিল,  
“মাই ডিয়ার পূর্ণ, ব্যবসা-ট্যাব্‌সা কি পুলিশের জালায় আর  
করবার যো আছে ! আরে ছিঃ ছিঃ ! ঘেঞ্জা ধরিয়ে দিলে ।”

আমি বিস্মিত হইয়া বলিলাম, “পুলিশের জালায় ব্যবসা  
বন্ধ ! সে কি রকম ব্যবসা ?”

জগাই সোজা হইয়া বসিয়া টেবিলে একটা চড়্‌ মারিয়া  
বলিল, “খুব ভাল ব্যবসা পূর্ণ, খুব ভাল ব্যবসা । ‘পেটেন্ট আর  
স্বপ্নাঙ্ক ওষুধের ব্যবসা করে’ দিনকত দু’-হাতে টাকা লুটে’  
নিষেছিলাম ;—তা’, তা’ই দেখে’ টিক্‌টিকি-বেটাদেব চোখ  
টাটিয়ে উঠল ।”

আমি কৌতূহলী হইয়া বলিলাম, “কেন ?”

## মধুপর্ক

“আরে, সে কথা আর জিজ্ঞেস কর, কেন ? পবনের কাগজে বিজ্ঞাপন দিয়েছিলাম, “বৈজ্ঞানিক প্রণালীতে প্রস্তুত, আমেরিকার জন সাহেবের আবিষ্কৃত অদ্ভুত দস্তমঞ্জন।” দিনকতক খুব বিক্রী হ’য়েছিল, এর মাঝে হঠাৎ টিকটিকি-বেটারা কেমন করে’ ধরে’ ফেলে যে, আমার অদ্ভুত দস্তমঞ্জনে সূধু ইঁটের গুঁড়ো আছে ; এই আর কি— অমনি মামলা রুজু। আমি কিন্তু সহজে ছাড়ি নি বাবা,—শত শত প্রমাণ দেখিয়ে ম্যাজিষ্ট্রেটকে প্রাঞ্জল ভাষায় বোঝাতে চেষ্টা করে’ছিলুম যে, যে দস্তমঞ্জনে বিশুদ্ধ ইঁটের গুঁড়ো থাকে, সত্যসত্যই তা’ অদ্ভুত কি না। ম্যাজিষ্ট্রেট শুনে’ হেসে ফেলেন ; কিন্তু হেসেই আমার দু’শো টাকা জরিমানা করলেন। সেইদিন থেকেই ব্যবসা বন্ধ।

বুঝিলাম, জগাইএর ছুঁটামি-বুদ্ধি এখনও যায় নাই ; কিন্তু, সেইসঙ্গে তাহার সরলতাটুকুও আমার কাছে নেহাৎ মন্দ লাগিতেছিল না।

জগাই ততক্ষণে প্রথম সিগারেটটা পুড়াইয়া ছাই করিয়া আর একটা ধরাইয়া বলিল, “যা’হোক, মাই ডিয়ার পূর্ণ, তোমাকে এতদিন পরে হঠাৎ আবিষ্কার করে’ আমি মনে মনে বড়ই খুসী হ’য়ে উঠে’ছি। ইচ্ছে হচ্চে গলা ছেড়ে গান গাই—” বলিয়াই বাঁ-হাতে টেবিল চাপড়াইয়া মাথা নাড়িয়া সে গান শুরু করিয়া দিল—

“ভোজন কর কৃষ্ণ জিরে,

ভজন কর কৃষ্ণজী রে-এ—এ—এ—”

গানের চোটে ঘরখানা যেন কাঁপিতে লাগিল। পাছে বাড়ীর ভিতর আমার স্ত্রী গান শুনিয়া ভয়ে আঁৎকাইয়া উঠেন, সেইজন্য তাড়াতাড়ি আমি ব্যস্ত সমস্ত হইয়া বলিয়া উঠিলাম, “ও জগাই, থাম, থাম,—গান-টান পরে শোনা যাবে এখন।”

জগাই গান থামাইয়া দুঃখিতভাবে মাথা নাড়িয়া বলিল, “ওই ত দাদা! ওস্তাদজী তাইতেই বলেন, রসজ্ঞ শ্রোতা ছুনিয়ায় বড়ই কম পাওয়া যায়। এই দেখ না, এগন খাসা টপ্পাখানা ধরা গেল, কোথায় সমের ঘরে মসৃণল হ’য়ে মাথা নেড়ে সায় দেবে, তা’ সে সব চুলোয় গেল—অন্তরাটা ধরতে না ধরতে তুমি কিনা আমাকে খামিয়ে দিলে! আরে ছ্যাঃ—ছ্যাঃ!”

জগাই সিগারেটে একটা দমভোর টান্ দিয়া ধোঁয়া ছাড়িতে ছাড়িতে জড়িতস্বরে বলিল, “তুমি বোধ হয় পদ্ম-টু পড়ো না? এবার থেকে পড়তে চেষ্টা করবে। নইলে রসবোধ হবে না।”

আমি যে অরসিক নই, এটা প্রমাণিত করিতে গেলে, পাছে জগাইটাদ দ্বিগুণ উৎসাহিত হইয়া আবার ‘কৃষ্ণ জিরে’র গান ধরিয়া বসে, সেই ভয়ে এ অপবাদ আমি মাথা পাতিয়া লইলাম।

## মধুপর্ক

আরও ছ'-চারিটা কথার পর জগাই সেদিনকার মত বিদায় লইল। যাইবার আগে সে আর একবার আমার সিগারেটের তারিফ করিতে করিতে বেশ সপ্রতিভ ভাবেই কোঁটা হইতে গোটা কুড়ি ইজিপ্‌সিয়ান সিগারেট লইয়া টপাটপ পকেটে পুরিয়া ফেলিল। তাহার এই সপ্রতিভ ভাবটাও খুব শিষ্ট না হইলেও আমার বেশ মিষ্ট লাগিতেছিল; কিন্তু যতই মিষ্ট লাগুক, এটা ঠিক যে, তা'র পরদিন হইতে আমি টেবিলের উপরে দামী ইজিপ্‌সিয়ান সিগারেটের বদলে হাওয়াগাড়ী সিগারেটের কোঁটা রাখিয়া দিতাম।

কিন্তু জগাইটার অসাধারণ উৎসাহ তাহাতেও কিছুমাত্র দমিয়া যায় নাই; প্রতিদিন সে অন্ততঃ গোটা দশ-বারো সিগারেট না পুড়াইয়া ও গোটা পনের না পকেটস্থ করিয়া কোনদিন আমার ঘর ছাড়িয়া উঠিয়া যাইত না।

থ

ই্যা,—বাস্তবিক, জগাই আমাদের বেড়ে লোক। ছুটির একঘেয়ে দিনগুলো তাহাকে লইয়া হাসি-খুসিতে গোলে-হরিবোলে দিব্য একরকমে কাটিয়া যাইত।

তাহার কথাবার্তার ভিতরে আমি একটা বিশেষত্ব সর্বদা লক্ষ্য করিতাম। যখন-তখন সে তাহার স্ত্রীর কথা পাড়িত ও যথেষ্ট সম্মানের সঙ্গেই জগাই সে কথাগুলো বলিত। সে যে তা'র



স্ত্রীকে 'অত্যন্ত ভালবাসে, এটা আমি বেশ বুঝিতে পারিতাম।

মধ্যে জগাই একদিন আমাকে তা'র বাড়ীতে নিমন্ত্রণ করিয়াছিল। লোকের বাড়ীতে নিমন্ত্রিত হইয়া ইঁা করিয়া লুচির আশায় বসিয়া থাকাকাটা আমি আদোপেই ভালবাসিতাম না; কিন্তু জগাই পাছে মনে করে যে, সে গরীব বলিয়াই আমি তাহার বাড়ীতে নিমন্ত্রণে যাইতে নারাজ, সেই ভয়ে তাহার কথা ঠেলিতে পারিলাম না।

জগাই খাবারের বন্দোবস্ত বড় মন্দ করে নাই। তাহার স্ত্রীর রান্নাও বেশ হইয়াছিল।

খাইতে বসিয়া দেখিলাম, একটি গৌরান্ধী মহিলা আমাকে পরিবেশন করিতেছেন।

জগাই আমার সম্মুখেই, মেঝের উপরে উবুড় হইয়া বসিয়াছিল। মহিলাটি ঘরে আসিবামাত্র জগাই উচ্চকণ্ঠে বলিল, "মাই ডিয়ার পূর্ণ, এস, আমার স্ত্রীর সঙ্গে তোমাকে ইন্ট ডিউস্ করে' দি। ইনি হচ্ছেন আমার স্ত্রী শ্রীমতী কমলা দাসী,— আর, ওগো! শুন্টো? ইনি হচ্ছেন ডেপুটী ম্যাজিস্ট্রেট শ্রীযুক্ত পূর্ণচন্দ্র সেন—আমার গ্রাশ-ফ্রেণ্ড না হ'লেও ক্লাশ-ফ্রেণ্ড। ওকি, মুখে ঘোমটা কেন? পূর্ণর সামনে ঘোমটা! অ্যাঃ—বল কি! খোল, খোল—ঘোমটা খোল।"

## মধুপক

মহিলাটি মুখের ঘোমটা আরও বেশী করিয়া টানিয়া, সলজ্জ, ত্রস্তপদে তাড়াতাড়ি ঘর ছাড়িয়া বাহির হইয়া গেলেন।

আমিও লজ্জায় অধোবদন হইয়া বসিয়া রহিলাম।

থাওয়া-দাওয়া হইয়া গেলে পর বিদায় লইয়া রাস্তায় আসিয়া দাঁড়াইয়াছি, এমন সময়ে জগাই আমার হাত ধরিয়া বলিল, “মাই ডিয়ার পূর্ণ, তুমি কি আমার ওপর রাগ করে’চ ?”

আমি একটু আশ্চর্য হইয়া বলিলাম, “রাগ ! কেন ?”

জগাই বলিল, “আমার স্ত্রীর সঙ্গে তোমার পরিচয় করে’ দেবার সময়ে যে কথাগুলো বলে’ছিলাম,—সেই জন্তে ? আমার স্ত্রী বললে, আমি নাকি অসভ্য ব্যবহার ক’রেচি আর তুমি তা’ই চটে’ গিয়েছ। সে বললে, তোমার কাছে আমার ক্ষমা চাওয়া উচিত।”

আমি হাসিয়া বলিলাম, “না না আর ক্ষমা চাইতে হবে না,—আমি রাগ করি নি।”

গ

সেদিন জগাই হঠাৎ আসিয়া আমাকে বলিল, “মাই ডিয়ার পূর্ণ, আমার একটা উপকার করতে হবে।”

আমি জিজ্ঞাসা করিলাম, “কি উপকার ?”

একটু ইতস্ততঃ করিয়া জগাই বলিল, “যদি—যদি

দেবী

আমাকে কুড়িটা টাকা ধার দাও। আমি 'তিনদিনের ভেতরে নিশ্চয় শোধ করব। দেবে ভাই ?'

তাহাকে কুড়িটা টাকা দিলাম। সে আমাকে অনেক ধন্যবাদ জানাইয়া তাড়াতাড়ি চলিয়া গেল।

জগাই 'অগস্ত্য-যাত্রা' করিয়াছে। তিনদিনের ভিতরে টাকা শোধ করিবে বলিয়া সেই-যে সে চলিয়া গিয়াছে, আর তাহার টিকিটি পর্যন্ত দেখিবার যো নাই। অবশ্য, টাকার জন্ম আমি ব্যস্ত নই; কিন্তু জগাইয়ের অভাবে আমার দিন গুলা ভগ্নচক্র শকটের মত স্তম্ভিত হইয়া আছে, সময় আর কাটিতেই চাহে না। এই জন্মই বন্ধুবান্ধবকে টাকা ধার দিতে নাই; তা'তে টাকাও পাওয়া যায় না, বন্ধুও থাকে না।

প্রায় কুড়িদিন কাটিয়া গিয়াছে। আমি জগাইয়ের আশা-ভরসা একরকম ছাড়িয়াই দিয়াছি। এক একবার মনে করিয়াছি, জগাইয়ের বাড়ীতে গিয়া খোঁজ লইয়া আসি, কিন্তু পাছে সে ভাবিয়া বসে যে, আমি তাগাদা করিবার জন্ম তাহার খোঁজ লইতেছি, সেই ভয়ে তাহার বাড়ীতে যাওয়াও আর ঘটয়া উঠিল না।

কিন্তু, ইহার ভিতরে জগাই নিজেই একদিন আসিয়া হাজির।

## মধুপর্ক

আমি বলিলাম, “কি হে জগাই, একেবারে ডুমুয়ের ফুল হ’য়ে উঠে’চ যে !”

জগাই বলিল, “মাই ডিয়ার পূর্ণ, আমি এখন আবার বিজনেসম্যান অর্থাৎ মাতৃভাষায়, কাজের লোক হ’য়ে উঠে’চি । আমার সময় এখন মূল্যবান্ ।”

আমি হাসিয়া বলিলাম, “বল কি ! ‘অদ্ভুত দন্তমঞ্জর’ ফের বাজারে চলছে নাকি ?”

“আরে ছেৎ ! ‘অদ্ভুত দন্তমঞ্জর’নের নিকুচি ক’রেছে ! মাই ডিয়ার পূর্ণ, সে সব কিছু নয়—আমি এখন দালালী ব্যবসায় ধরে’চি ।”

দালালীর গুপ্তরহস্য সম্বন্ধে জগাইটাদ লম্বা এক বক্তৃতা ফাঁদিয়া বসিল, আমি চুপচাপ শুনিয়া যাইতে লাগিলাম ।

বক্তৃতা শেষ করিয়া জগাইটাদ উঠিয়া দাঁড়াইল । পকেট হাত্‌ড়াইয়া একখানা নোট বাহির করিয়া জগাই বলিল, “মাই ডিয়ার পূর্ণ, তোমার টাকা কুড়িটা নাও । বিজনেসে বড় ব্যস্ত ছিলাম বলে’ এদিকে আসতে পারি নি, তোমার টাকাগুলোও সেইজন্নে আর দেওয়া হয় নি, কিছু মনে কর’ না ডিয়ার !”

নোটখানা লইয়া আমি ব্যাগের ভিতরে রাখিয়া দিলাম ।

খানিকক্ষণ চুপ করিয়া থাকিয়া জগাই বলিল, “পূর্ণ,

## দেবী

তোমাকে আর একটা কথা বলব-বলব মনে করুচি, কিন্তু বলতে পারুচি না।”

“কেন ?

“পাছে তুমি কিছু মনে কর।”

“মনে আবার করুব কি ? বল।”

“মাই ডিয়ার পূর্ণ, আমার স্ত্রী আজ এক জায়গায় নিমন্ত্রণে যাবে, যদি একছড়া হার দাও, তা’হলে ভারি উপকার হয়। তা’র হারছড়া ছিড়ে গেছে। আজ নিয়ে যাব, কালকেই ফিরিয়ে দেব।”

জগাইয়ের আজকের প্রার্থনাটা আমার কাছে ভারি বেশরো ঠেকিল ; কিন্তু কি আর করি, চক্ষুলাজ্জার খাতিরে মনে মনে বিরক্ত হইয়াও বাড়ীর ভিতরে গেলাম। পত্নীর কাছ থেকে তাঁহার হারছড়া চাহিয়া জগাইকে আনিয়া দিলাম।

ঘ

—পরদিন বৈকালে কতকগুলো জিনিষ কিনিতে ‘মিউনিসিপাল মার্কেটে’ গিয়াছিলাম।

জিনিষ পত্র কেনা হইয়া গেল। আমার কাছে খুচরা টাকা ছিল না, ব্যাগের ভিতর জগাইয়ের দেওয়া নোটখানা বাহির করিয়া দোকানদারকে বলিলাম, “টাকা ভাঙ্গাতে হবে।”

## - মধুপর্ক

দোকানদার নোটখানা আমার হাত হইতে লইয়া বিস্ফারিত চোখে ভাল করিয়া দেখিতে লাগিল। তা'রপর আমার দিকে মুখ তুলিয়া চাহিয়া বলিল, “কি ম'শয়, এ সব জোচ্চুরী কতদিন শিখে'চেন?”

আমি আশ্চর্য হইয়া ক্র-সঙ্কোচ করিয়া বলিলাম, “কি বললে?”

“ওঃ! বাবু যে একেবারে আকাশ থেকে পড়লেন দেখ'চি! আমি হচ্ছি লালু মিঞা, আমার কাছে এসেছ জাল নোট চালাতে! পাজী, ত্যাঁদড় কোথাকার!”

“কি বল্ছিস্ উল্লুক?”

“চুপ রহো! ওরে, পুলিশ ডাক ত!”

আমার চারিদিকে লোক জড় হইল। লজ্জায়, অপমানে যেন আমার মাথাকাটা গেল। নোটখানা দেখিয়া বুঝিলাম, দোকানদারের কথা মিথ্যা নয়।

বেগতিক দেখিয়া আমি নরম হইয়া বলিলাম, “দেখ, আমি জান্তুম'না যে, নোটখানা জাল। আর একজন আমাকে এখানা দিয়েচে।”

দোকানদার গরম হইয়া বলিল, “হঁ হঁ চাঁদ! পথে এস! আমি হলুম লালু মিঞা, আমার কাছে এসেছ জাল-নোট চালাতে! ওরে পুলিশ ডাক ত!”

দেবী

কোনরকমে তাহাদের হাত হইতে ছাড়ানু পাইয়া আমি সেখান হইতে মানে মানে সরিয়া পড়িলাম ।

ওঃ ! সে সময়ে যদি একবার জগাইয়ের দেখা পাইতাম ! পিছনে বাজারস্থল লোক হাসিতে লাগিল । দোকানদার গলা চড়াইয়া তখনও বারংবার দর্জ্জন করিতেছে, “আমি হলুম লালু মিঞা, আমার কাছে এসেছ জাল-নোট চালাতে ! ওরে, পুলিশ ডাক ত !”

উ

জগাই কোথায় ?

বাজারের সেই ব্যাপারের পরে একমাস কাটিয়া গিয়াছে, কিন্তু জগাইয়ের দেখা নাই ।

আমি তা'কে তন্ন তন্ন করিয়া খুঁজিলাম—এমন কি, তাহার বাড়ীতে পর্য্যন্ত গিয়াছি ; কিন্তু, সে বাড়ী ছাড়িয়া জগাই যে সপরিবারে কোথায় উঠিয়া গিয়াছে, কেহ তাহা জানে না ।

বাড়ীওয়ালা আমাকে বলিল, “মশাই, সে আমার পাঁচমাসের ভাড়া দেয় নি । তা'র সঙ্গে যদি আপনার দেখা হয়, তা'হলে বলে' দেবেন, একবার যদি তা'র টিকিটি দেখতে পাই, তবে হয় তা'র মাথা নয় পাঁচমাসের ভাড়া না নিয়ে আর ছেড়ে দেব না । আমরা পাঁচপুরুষ কলকাতা-সহরের বাড়ীওয়ালা—

## মধুপর্ক

আমাকেই ফাঁকি—অঁ্যা ! হয় ভাড়ার টাকা নয় মাথা—একটা কিছুই নেবই নেব,—বুঝে'চেন ?”

বুঝিলাম, জগাইয়ের দেখা ত আর পাবই না—সেইসঙ্গে আমার দামী সোণার হারছড়াও জন্মের মত গেল। জগাইয়ের সঙ্গে এতটা ঘনিষ্ঠতা করিয়াছিলাম বলিয়া এখন আমি মনে মনে অনুতপ্ত হইলাম। ওঃ ! তা'র জন্মে সেদিন দশজনের সামনে কি অপমানিতই হইয়াছিলাম ! আর একটু হইলেই হাতে হাতকড়ি পড়িত ! ইচ্ছা ছিল, জগাইকে ধরিয়া সে অপমানের প্রতিশোধ লইব ; কিন্তু মনের রাগ মনেই চাপিয়া গুম্বাইতে গুম্বাইতে বাড়া ফিঁরিয়া আসিলাম।

\* \* \* \* \*

আমার ছুটি প্রায় ফুরাইয়া আসিল। সেদিন বৈকালে বেড়াইতে বাহির হইয়াছি, এমন সময়ে খানিক তফাতে একটা লোককে দেখিয়া চমকিয়া উঠিলাম।

কে ও ? জগাই না ! ই্যা—তা'ই ত !

আমি তাড়াতাড়ি অগ্রসর হইয়া একেবারে তাহার স্মুখে গিয়া দাঁড়াইলাম।

আমাকে দেখিবামাত্র জগাইয়ের মুখ ভয়ে কালিপানা হইয়া গেল। সে পাশ কাটাইয়া চলিয়া যাইবার চেষ্টা করিল.; কিন্তু আমি তাহাকে বাধা দিয়া বলিলাম, “কি জগাই, চিন্তে পার্চ ?”



জগাই খতম্ব খাইয়া দাঁড়াইয়া পড়িল। ঢোক গিলিয়া বলিল, “কে মশাই, আপনি ?”

আমি কঠোরস্বরে বলিলাম, “বটে ? তুমি আমাকে চেন না—না ?”

জগাই বলিল, “পথ ছাড়ুন মশাই, পথ ছাড়ুন। রাস্তার মাঝখানে আর অসভ্যতা করবেন না।”

আমি আর সহ করিতে পারিলাম না—তাহার মুখে সজোরে এক চড়্ বসাইয়া দিয়া বলিলাম, “নির্লজ্জ, চোর, জালিয়াত ! দে আমার হার দে।”

চড়্ খাইয়া জগাই ষাঁড়ের মত চেঁচাইয়া উঠিল। “পাহারা-ওলা, আমায় খুন করুলে—পাহারাওলা, পাহারাওলা !”—বলিতে বলিতে সে ছুটিল। আমিও ছাড়িলাম না—তাহার পিছনে-পিছনে ছুটিলাম। রাস্তার অনেক লোকও মজা দেখিতে আমাদের অনুসরণ করিল।

জগাই, ছুটিতে ছুটিতে হঠাৎ একটা বাড়ীর ভিতরে ঢুকিয়া পড়িল। সঙ্গে সঙ্গে আমরাও ঢুকিলাম।

জগাই সিঁড়ি দিয়া উপরে উঠিতে গেল ; কিন্তু হেঁচট্ খাইয়া ঘুরিয়া পড়িল। আমি একেবারে তাহাকে মাটির সঙ্গে চাপিয়া ধরিলাম।

জগাই আর্তনাদ করিয়া উঠিল, “খুন করুলে, খুন করুলে !”

## মধুপর্ক

গোলমালা একজন লালপাগড়ীও / বাড়ীর ভিতরে  
চুকিয়াছিল। সে কাছে আসিয়া বলিল, “কি হ’য়েচে বাবু?”

জগাই বলিল, “ও পাহারাওলা-জি, আমাকে বাঁচাও!  
এই হতভাগা গুপ্তা আমাকে মেরে ফেল্লে!”

রাগে অজ্ঞান হইয়া আমি বলিলাম, “ষ্টুবিড্, আবার  
গালাগালি!”—আমি ঘুসি তুলিলাম।

হঠাৎ পিছন হইতে কে আমার হাত চাপিয়া ধরিল।  
ফিরিয়া দেখি, একজন স্ত্রীলোক।

ঠাঁহার মাথার কাপড় খুলিয়া গিয়াছে, একরাশ  
এলোমেলো চুল কাঁধে বুকে এলাইয়া পড়িয়াছে, মুখে চোখে  
ভীতা হরিণীর মত অসহায়, কাতর ভাব!

আমার হাত অসাড় হইয়া পড়িয়া গেল।

মহিলাটি মিনতি-মাথা স্বরে আমার দিকে চাহিয়া  
বলিলেন, “ইনি আমার—ইনি আমার স্বামী! একে আপনি  
মারুচেন কেন?”

জগাইয়ের স্ত্রী? এত সুন্দরী!

আমি মৃদুস্বরে বলিলাম, “আপনার স্বামীর জন্তে আমি  
ভয়ানক অপমানিত হয়ে’ছি। আপনার স্বামী আমার একছড়া  
হার নিয়ে এসে আর ফিরিয়ে দেয়নি। একে পুলিশে দেব।”

মহিলার মুখ বিবর্ণ হইয়া গেল। তিনি জগাইয়ের দিকে

দেবী

অনন্ত দৃষ্টিতে চাহিলেন,—জগাই আশ্বে আশ্বে মাথা হেঁট করিল ।

রমণী আবার আমার দিকে তাকাইলেন । সে চোখ কি ব্যথাভরা !

তিনি একবার পাহারাওয়ালার দিকে, ভিড়ের দিকে চাহিলেন । তাঁহার দেহ, লজ্জা-ভয়ে যেন কাঁপিয়া উঠিল । তাঁ'রপর তিনি হঠাৎ গলা হইতে একছড়া হার খুলিয়া, আমার সম্মুখে ধরিয়া বলিলেন, “আমার এই একছড়া হার আছে । আমাদের ঘরে আর হার নেই । এ হার কি আপনার ?”

হ্যাঁ—এ হার ত আমারই বটে ! আমি কি বলিতে যাইতেছিলাম ; কিন্তু তাঁহার চোখের দিকে চাহিয়া থামিয়া গেলাম । সে চোখ যেন কথ্য কহিতেছিল, সে চোখ যেন বলিতেছিল, “ওগো আমার স্বামীকে বাঁচাও,—ওগো আমার স্বামীকে বাঁচাও !”

আমি কি বলিব ?

রমণী আবার বলিলেন, “এ হার কি—”

আমি বাধা দিয়া বলিলাম, “না, এ হার আমার নয়—মাপ করুন, মাপ করুন—আমার ভুল হ'য়েচে ।”

রমণী মাথায় ঘোমটা টানিয়া আমার দিকে পিছন ফিরিয়া দাঁড়াইলেন ।

## মধুপর্ক

জগাই, লাফাইয়া উঠিয়া বলিল, “শুনলে ত গাহারাওলা সায়েব, শুনলে ত সব ? মিছামিছি আমার কি নাকালটাই করলে ! আচ্ছা বাবা, ভগবান্ আছেন ।”

চ

সন্ধ্যাবেলায় বাড়ীতে বসিয়া বসিয়া ভাবিতেছিলাম, “বোঝা গেছে, ওরা স্বামী স্ত্রীতে জোঁচোর ! সুন্দর মুখ দেখে’ ভুলে’ যাওয়াটা ঠিক হয় নি ।”—এমন সময়ে একজন লোক আসিয়া আমার হাতে একটা মোড়ক দিয়া দাঁড়াইল ।

একটু বিস্মিত হইয়া মোড়কটা খুলিলাম । ভিতরে আমার সেই হারছড়া আর একখানা চিঠি । চিঠিখানা পড়িলাম :—

“আমার স্বামীর অনেক দোষ,—কিন্তু তিনি আমাকে ভালবাসেন ।

“আমি সামান্য স্ত্রীলোক,—তাঁকে একদিন বলে’ছিলাম, তুমি আমাকে ভালবাস না । ভালবাসলে, আমাকে অন্ততঃ একখানা গয়নাও দিতে ।

“তা’র পরের দিন তিনি আমাকে একছড়া হার এনে দিয়ে বল্লেন, ‘একজন বেচতে চাচ্ছিল, তোমার জগে কিনে আনলুম ।’—তখন আমার একটু আশ্চর্য হ’লেও, আমি সন্দেহ করি নি ।

দেবী

“ভগবান্ আপনার মঙ্গল করবেন,—আপনি আমার স্বামীকে পুলিশের হাত থেকে বাঁচিয়েছেন।

“লজ্জাহীনাকে ক্ষমা করবেন, আপনার হার ফিরিয়ে দিলাম।”

আমার চোখের স্রুখে এক জ্যোতির্ষ্ময়ী দেবী-প্রতিমা জাগিয়া উঠিল।

হে দেবি, আমি তোমাকে প্রণাম করি।

---

## অভিশপ্তা

কাশীর মানমন্দির দেখিতে গিয়াছি। পূর্ণিমার সন্ধ্যা।  
নীলপদ্মের রংমাখান আকাশ, তার নীচে গঙ্গার ধবল লহর-  
বীণায় তরল লীলা রাগিণী বাজিতেছে। এই রূপ-পুরীকে  
সম্পূর্ণতা দিবার জন্মই, যেন বসন্তের গুঞ্জরিত নবীন হাওয়া  
আজ প্রকৃতির মুঞ্জরিত কুণ্ডুয়ারে অতিথি।

মানমন্দির দেখা শেষ হইয়া গিয়াছিল; অতএব বিশ্বের  
এই যৌবন-শ্রীকে অবহেলা করিতে পারিলাম না—আস্তে  
আস্তে ছাদের এক পাশে গিয়া বসিয়া পড়িলাম। তখন চাঁদ  
উঠিতেছে।

আমি কবি নই; কিন্তু তবু যেন মনে হইল, গঙ্গার চপল  
জলে জ্যোৎস্না ঐ যে রূপার 'আখর' লিখিয়া দিতেছে, চেষ্টা  
করিলে আজ যেন তাহার ভিতরে সৌন্দর্য্য-কাব্যের দু'একটা  
ইঙ্গিত জানিলে জানিতে পারা যায়; এবং মন-মাতান  
সুগন্ধ মাখিয়া বসন্তবায়ু আজ যে সঙ্গীত গাহিতেছে, তাহা যেন  
প্রকৃতির ফুলবাগানের কুঁড়ি-ফোটার আনন্দোৎসব ভিন্ন আর  
কিছু নয়!

অনেকক্ষণ বসিয়া রহিলাম,—কতক্ষণ, তা জানি না।

## অভিশপ্তা

হঠাৎ আমার চমকে ভাঙ্গিয়া গেল। ঘড়ীখুলিয়া দেখি, রাত্রি সাড়ে দশটা। তাইত!

তাড়াতাড়ি উঠিয়া পড়িলাম। অন্ধকারে সিঁড়ি দিয়া দেয়াল ধরিয়া ধরিয়া কোনরকমে আঙ্গিনায় নামিয়া আসিলাম। ছ'একবার হেঁচট্ খাইয়া সদর দরজার কাছে আসিয়া দাঁড়াইলাম। দরজা ধরিয়া টানিলাম,—কিন্তু দ্বার খুলিল না। দ্বার বাহির হইতে বন্ধ।

আমার মাথায় আকাশ ভাঙ্গিয়া পড়িল। আমি যে ছাদের উপরে বসিয়া কবিত্বের স্বপ্ন দেখিতেছি, বন্ধক অত শত খেয়াল করে নাই। সে দরজা বন্ধ করিয়া চলিয়া গিয়াছে।

এখন উপায়? একবার শেষ চেষ্টা করিলাম। দরজার উপরে সতেজে এক ধাক্কা মারিলাম—বহু যুগের প্রাচীন কবাট, বান্-বান্ শব্দে বাজিয়া উঠিল—সেই বিশাল শূণ্য পুরীর নৈশ মৌনব্রত ভঙ্গ করিয়া আর্ন্তনাদের মত একটা তীক্ষ্ণ প্রতিধ্বনি সহসা জাগিয়া উঠিয়া আমার সৰ্ব্বশরীর রোমাঞ্চিত করিয়া তুলিল।

ভয়ে ভয়ে আবার ভিতরে আসিয়া দাঁড়াইলাম। প্রাঙ্গণের মধ্যে একটা বিপুলদেহ বৃক্ষ, আপনার বিস্তৃত শাখা-প্রশাখার ভিতরে খানিক আলো এবং খানিক অন্ধকার লইয়া দাঁড়াইয়া

## মধুপর্ক

আছে ;—কি ভীষণ তাহার পত্র-মর্ষর ! যেন 'সুদূর' অতীতের দেহমুক্ত আত্মা তাহার ডালে উপবিষ্ট হইয়া ঘন ঘন তপ্ত দীর্ঘ-শ্বাস ত্যাগ করিতেছে ! এবং ঐ যে তিমির-গুপ্ত নিশাচর পক্ষীরা ঝটপট্ ডানা নাড়িয়া স্তম্ভিত স্তম্ভতাকে বিদীর্ণ করিয়া দিতেছে, স্থান ও কাল-মাহাত্ম্যে বোধ হইল, তাহা যেন অপরজগৎচারী আত্মা সকলের অক্ষুট মধুর ধ্বনি ! বুকটা কেমন দমিয়া গেল । আপনার কুবুদ্ধিকে শত শত ধিক্কার দিতে দিতে সচকিত চিত্তে সামনের একটা ঘরের দরজা খুলিয়া ভিতরে ঢুকিয়া পড়িলাম । চারিদিকে সূচীভেদ্য অন্ধকার । ভিতরটা একবার ভাল করিয়া দেখিয়া লইবার জন্য পকেট হইতে দেশলাই বাহির করিয়া জালিলাম । দীপশলাকার ক্ষীণালোকে গৃহভিত্তির উপরে যোগল-যুগের প্রাচীন কারুকার্য ঈষৎ স্পষ্ট হইয়া উঠিল । অন্ধকারকে আরও গাঢ় করিয়া শলাকা নিবিয়া গেল । কেন জানি না, গা'টা কেমন ছম্-ছম্ করিতে লাগিল । সেই বিস্তৃত কক্ষের নিবিড় তিমিররাশির ভিতরে যেন অপর জগতের কি একটা বিষাদ-ত্রিয়ণ রহস্য গুমরিয়া গুমরিয়া উঠিতেছিল ।

অত্যন্ত অপ্রসন্ন চিত্তে ঘরের এক কোণে গিয়া শুইয়া পড়িলাম । আপাদমস্তক চাদর মুড়ি দিয়া ভাবিতে লাগিলাম, কোথায় আজ সে সকল শিল্পী,—অলঙ্কৃত গৃহভিত্তির উপরে যাহাদের নিপুণ হস্তের চিহ্নাবশেষ এখনও ক্ষোদিত হইয়া



রহিয়াছে ? কোথায় আজ সেই মানসিংহ, সেই জয়সিংহ,—  
বক্ষ মধ্যে যাহাদের অসামান্য সম্মান-স্মৃতি এখনও জাগ্রৎ হইয়া  
রহিয়াছে ? কোথায় সেই উজ্জল অতীত, কোথায় সে রাজ-  
ঐশ্বর্য ?

সহসা একটা দম্কা বাট্কার ঝাপটে বাহিরের বৃক্ষপত্রে  
কেমন যেন অনৈসর্গিক মর্ম্মরধ্বনি বহিয়া গেল এবং সেই সঙ্গে  
ঘরের ভেজানো দরজাটাও সশব্দে খুলিয়া গেল এবং আমার  
তন্দ্রাবিষ্ট শ্রবণের উপর কে যেন মুখ রাখিয়া অক্ষুটস্বরে বলিয়া  
উঠিল,—“কোথায়, ওগো কোথায় ?”

একলাফে উঠিয়া বসিলাম এবং দেওয়ালের উপরে আড়ষ্ট-  
ভাবে পৃষ্ঠ রাখিয়া দুই হাতে চোখ কচলাইয়া চাহিয়া দেখি,  
উন্মুক্ত দ্বারপথে চন্দ্রালোক আসিয়া ঘরের একাংশ উজ্জল  
করিয়া তুলিয়াছে ।

চারিদিক্ কি শুষ্ক ! আর, আর—সেই জনশূন্য প্রাচীন  
অট্টালিকার মধ্যে সে শুষ্কতা কি ভীষণ !

হঠাৎ মনে হইল, ঘরের অন্ধকার দিক্‌টায় কে যেন  
নড়িয়া-চড়িয়া বেড়াইতেছে ! যেন কার বস্ত্রের অক্ষুট শব্দ  
হইতেছে, যেন মৃদু ভূষণ-শিঞ্জিত শূনা যাইতেছে । যেন কেহ  
ফুলিয়া ফুলিয়া চাপাগলায় কাঁদিয়া উঠিতেছে—যেন কেহ  
বুকভরা দীর্ঘনিঃশ্বাস ফেলিতেছে ! কে সে ? কে সে ?

## মধুপর্ক

আমার দেহে কাঁটা দিন, মাথার চুলগুলা খাড়া হইয়া উঠিল। আমি রুদ্ধশ্বাসে প্রায়বদ্ধকণ্ঠে পাগলের মত বলিয়া উঠিলাম, “কে ? কে ? কে ?”

সহসা, কাহার একটা অতি-শীর্ণ ছায়া মুক্তদ্বার-মধ্যগত আলোক-রেখার মাঝে আসিয়া দাঁড়াইল !

এ কে ?

ভয়ে আমি চোখ বুজিতে গেলাম ; কিন্তু পারিলাম না— আমার চক্ষুকোর্টারে মধ্যো নিষ্পলকদৃষ্টি কি এক কুহকমন্ত্রে বিস্ফারিত হইয়া রহিল ! তদবস্থায় দেখিলাম, সম্মুখে নীরবে দাঁড়াইয়া মাংসমাত্রহীন সম্পূর্ণ কঙ্কালসার দেহ লইয়া আমার দিকে হেঁট হইয়া সে মূর্তি একদৃষ্টিতে আমাকেই নিরীক্ষণ করিতেছে ! তাহার বিশীর্ণ বাহ্যুগলে বলয়-কঙ্কন শ্লথ হইয়া হস্তাগ্রে ঝুলিয়া পড়িয়াছে। বস্ত্র, দেহের হাড়গুলাকে বেড়িয়া বেড়িয়া যেন লেপিয়া আছে। তাহার প্রকটাঙ্ঘি মুখ ৬ বৃকের উপরে রাশীকৃত কেশদাম বিশৃঙ্খল হইয়া দোতুল্যমান, এবং তাহার পলকহীন চক্ষুতে কি এক তীক্ষ্ণ দীপ্তি !

ছায়ামূর্তির অধরোষ্ঠের আবরণশূন্য দন্তপংক্তি—ক্ৰোড়পিতে লাগিল এবং সেই দুঃসহ মৌন ভঙ্গ করিয়া কাতর, তৃষিতস্বরে সে বলিয়া উঠিল,—কোথায় ওগো কোথায় ?”

আমি অসাড় হইয়া বসিয়া রহিলাম। তখন, ছায়ামূর্তি

## অভিশপ্তা

ধীরে ধীরে তাহার ক্লশ অস্থিসার পা বাড়াইয়া আমার দিকে অগ্রসর হইল।

চকিতে আমার জড়তা ভাঙ্গিয়া গেল। আমি প্রাণপণে চীৎকার করিয়া উঠিলাম, “চলিয়া যাও, চলিয়া যাও, আর এক পা আগাইলে তোমায় খুন্ করিব!” আমার সে সাহস, মৃত্যুর সম্মুখস্থ কাপুরুষের অন্তিম সাহসমাত্র!

ছায়ামূর্ত্তি কহিল, “আগন্তুক, সে একদিন গিয়াছে, যে দিন মৃত্যুকে আমি তোমারই মত ভয় করিতাম! এখন আমি জীবন-মৃত্যুর বাহিরে,—সংসারের ভয়-ভাবনা আর আমাকে ব্যথা দিতে পারে না, কিন্তু পৃথিবীর যাতনা যে এখনও আমাকে শতপাকে ঘিরিয়া আছে, আমাকে পুড়াইয়া পুড়াইয়া মারিতেছে, আমাকে পিষিয়া পিষিয়া পীড়ন করিতেছে! আগন্তুক, তুমি আমাকে দেখিয়া ভয় পাইতেছ? কিন্তু, একদিন আমার এই তনু ছিল কোমল, সুন্দর, দেববাঞ্ছিত! আজ আমার এই বাহু কুৎসিত, অস্থিসার,—কিন্তু এমন দিন ছিল, যখন আমার এ হাত দু’টি গোলাপফুলের একষোড়া মোহনমালার মত রাজকর্ণ বেষ্টন করিত! সেদিন গিয়াছে আগন্তুক, সেদিন গিয়াছে,—যে দিন এ দুটি চোখের সামনে পড়িবার জন্ত শত শত উন্মুখহৃদয় আবেগে ব্যাকুল হইয়া উঠিত! হায়, সে কত যুগ আগে, ওগো কত যুগ আগে!”

## মধুপর্ক

আমি কোন উত্তর দিতে পারিলাম না—যেমন বসিয়া-ছিলাম, তেমনই কাঠ হইয়া বসিয়া রহিলাম ।

ছায়ামূর্তি কহিল, “আগন্তুক, তুমি আমার কথা শুনিবে ? আজ কয় শতাব্দী, আমার অভিশপ্ত দোসর হারা আত্মা এইখানে ঘুরিয়া ঘুরিয়া কাঁদিয়া মরিতেছে, দুটো দুঃখের কথা শুনাইবার জন্য আমার পিয়াসী বুক ফাটিয়া যাইতেছে, কিন্তু শূন্যগৃহে কোন দরদের দরদী ত পাইলাম না ! তুমি শুনিবে আগন্তুক, তুমি শুনিবে ?”

আমি কথা কহিবার চেষ্টা করিলাম, কিন্তু আমার মুখ দিয়া কোন কথা বাহির হইল না । ছায়ামূর্তি তখন সেই দ্বারপথাগত পরিপূর্ণ জ্যোৎস্নায় বসিয়া পড়িল । তাহার অস্থিদেহ হইতে বিকট একটা কড়কড় শব্দ উঠিল । তাহার কেশদামের প্রতি আমার দৃষ্টি পড়িল—রেশমের মত চিকণ, কি সুন্দর সে কুন্তল !

আপনার বিগত যৌবনের, অতীত সৌন্দর্যের শেষ চিহ্নস্বরূপ সেই ত্বলকমালা, ঈষৎ গর্বেের সহিত মুখের উপর হইতে সরাইয়া দিয়া স্নান হাসি হাসিয়া ছায়ামূর্তি কহিল, “এই চোখ, এই বুক, এই বাহু দেখিয়া একদিন কত মুগ্ধপ্রাণ আমার রূপের আগুনে ঝাঁপ দিয়াছে ; আর আজ এই কেশ দেখিয়া আগন্তুক, তুমি কি আবার আমার সঙ্গে প্রেম করিবে ?

## অভিশপ্তা

না বন্ধু, না—অভাগীর এ কঠিন কঙ্কালস্তূপকে বুকে চাপিয়া আর কোন পাগল হৃদয় ধন্য হইবে না,—আমি এখন ভোরের বাসি মালা, পথের ধূলায় এখন আমার শয়ন, প্রথর তপনতাপে শুকাইয়া যাওয়াতেই এখন আমার অবসান ! কিন্তু কি বলিতে কি বলিতেছি !

আমার নাম ছিল, রাধা । রাজা জয়সিংহের অশুঃ-পূরে রাজ-আদরে আদরিণী হইয়া বড় সুখে আমার দিন কাটিত । বলিয়াছি, আমি রূপবতী ছিলাম । সে রূপের বর্ণনায় আর কাজ নাই, কারণ, আজ তাহা কেহ বিশ্বাস করিবে না ।

সেই রূপের মোহেই রাজা আমাকে ভাল বাসিতেন । মলিনচারী মৎস্য যেমন পাতালের আক্ৰিয়ারে অন্ধ হইবার আশঙ্কায় উপরে আসিয়া ধরণীব্যাপী মুক্ত আলো, এবং মুক্ত আকাশ দেখিয়া যায়—রাজকার্ষ্যের কাঠিন্যের মধ্য হইতেও তেমনই করিয়া—রাজা, দিনে শতবার নানা অছিলায় আমার কাছে ছুটিয়া আসিতেন । আমাকে দেখিয়া, দেখিয়া তাঁহার তৃপ্তি হইত না, আমাকে আদর করিয়া করিয়া তাঁহার আশ মিটিত না, আমার সঙ্গে কথা कहিয়া कहিয়া তাঁহার শ্রান্তি বোধ হইত না—আমি ছিলাম তাঁহার প্রাণাধিক ।

একদিন শুনিলাম, রাজা ৩ কাশীধামে যাইতেছেন । বাবা

## মধুপর্ক

বিশ্বনাথকে কখনও দেখি নাই, রাজা সেখানে যাইবেন, শুনিয়ে  
ভাবিলাম, এমন সুযোগ আর কখনও মিলিবে না।

রাজপদে আমার আর্জী পেশ করিলাম। আমার সাধ  
অপূর্ণ রাখা, রাজার পক্ষে সাধ্যাতীত। একটু ইতস্ততঃ করিয়া  
শেষটা তিনি মত দিলেন। তাঁহার সঙ্গে আমি ৬ কাশীধামে  
আসিলাম।

চারিদিকের ভিড় ঠেলিয়া, ভিখারী তাড়াইয়া, আমার  
প্রহরিবেষ্টিত শিবিকা বাবা বিশ্বনাথের মন্দির-তোরণে আসিয়া  
স্থির হইল। প্রহরীরা মন্দিরের ভিতর হইতে লোক তাড়াইতে  
লাগিল, শিবিকামধ্যে বসিয়া, সেই কোণাহল শুনিতে  
লাগিলাম। মন্দিরের ভিতর বীণা বাজিতেছিল এবং আলা-  
পিনীর মধুর রাগিনীর সঙ্গে কাহার কণ্ঠ, ভজন গায়িতেছিল :—

“ভোলানাথ, দিগম্বর

এ দুঃখ মেরা হরো !”

কি স্বর্গীয় কণ্ঠস্বর !

ইঠাৎ মাঝপথে গান থামিয়া গেল। বুঝিলাম, প্রহরীরা  
গায়ককে ভিতর হইতে তাড়াইয়া দিতেছে।

কেন জানি না, গায়ককে দেখিবার জন্য সহসা আমার  
মনে দুর্দ্দম বাসনা বলবতী হইয়া উঠিল। আশ্বে আশ্বে শিবি-  
কার আবরণ একটু সরাইয়া দিয়া আমি পথপানে চাহিলাম।

## অভিশপ্তা

কি দেখিলাম ! যাহা দেখিব বলিয়া আশা করি নাই,  
তাহাই দেখিলাম ।

দেখিলাম, এক সুবেশ, গৌরতনু তরুণযুবক মন্দিরমধ্য  
হইতে বাহির হইয়া আসিতেছে। শিরে তাহার কুঞ্চিতাগ্র  
দীর্ঘ কেশদাম গুচ্ছে গুচ্ছে স্কন্ধ চুষন করিতেছে, উন্নত ললাটে  
তাহার রক্তচন্দনের লেখা অগ্নিরেখার মত জল-জল, বিশালায়ত  
নয়নে তাহার দিব্য-শাস্ত দৃষ্টি, পুষ্ট অনাবৃত বাহুতে তাহার  
মৌন বীণা ! যুবতীর পেলব-লাবণ্য এবং পুরুষের অটল সরলতা  
যেন তাহার প্রশস্ত দেহে একীভূত হইয়া মিশিয়া গিয়াছে ।  
সে মূর্তি মানবের ? না, দেবতার ?

সহসা যুবকের দৃষ্টি বজ্রাবকাশ দিয়া আমার পিপাসী  
নেত্রের উপরে পড়িয়া সচকিত হইয়া উঠিল । কেন জানি না,  
আমি সে দৃষ্টিকে ব্যথিত করিয়া শিবিকার অন্ধকারে সরিয়া  
যাইতে পারিলাম না ।

আমিও চাহিয়া রহিলাম, যুবকও চাহিয়া রহিল—ক্ষণিকের  
জন্ম । প্রহরী আসিয়া যুবককে সরাইয়া দিল,—যাইবার সময়ে  
যেন তাহার সমগ্র প্রাণমন নেত্রাগ্রে একাগ্র করিয়া যুবক,  
আমার দিকে আর একবার চাহিয়া গেল ।

ধাবা বিশ্বনাথের চরণে, চন্দনচর্চিত বিল্বদল অর্পণ  
করিয়া, তাঁহাকে প্রণামান্তে আবার শিবিকায় আসিয়া উঠিলাম ।



## মধুপর্ক

উঠিবার সময়ে চঞ্চলনেত্রে একবার চারিদিকে চাহিয়া দেখিলাম, কিন্তু আমার বৃহস্পতিহৃদয়, যে রত্নের সন্ধান করিতেছিল, তাহা ত মিলিল না !

জনতা মথিত এবং ভিখারীদলকে মুখর করিয়া শিবিকা অগ্রসর হইতেছিল । চারিদিকে বিশ্বনাথের মহান্ নামে ভক্তের হৃদয় ভক্তিস্তোত্রে উচ্ছ্বসিত হইয়া উঠিতেছিল ; কিন্তু সে উচ্ছ্বাস আমার স্বপ্নাচ্ছন্ন চিত্তকে প্রীত ও স্পর্শ করিতে পারিল না—আমার অন্তর মধ্যে ভাব-সাগরে তখন ঢেউ উঠিয়াছে ! এমন সময়ে আমার সজাগ শ্রবণে এক পরিচিত প্রিয়স্বর ধ্বনিয়া উঠিল—

“তেরি নয়না যাদু ডারা !”

\* \* \* \* \*

মানমন্দিরেই মহারাজ, আমার জন্ম বিস্তৃত কক্ষ সাজাইয়া দিয়াছিলেন । অভিভূত হৃদয়ে অসুস্থতার ভাণ করিয়া শয্যাশ্রয় গ্রহণ করিলাম । শুইয়া শুইয়া তাহারই কথা ভাবিতে লাগিলাম । মন, অন্বেষিক ফিরাইবার জন্ম কত চেষ্টা করিলাম । কিন্তু আমার নিখিল চেষ্টা ব্যর্থ করিয়া, নিভৃত মানস-নেপথ্যে মন্দিরপথদৃষ্ট সেই তরুণসুন্দর মুখখানিই বারংবার জাগিয়া উঠিতে লাগিল ।

পরদিন বৈকালে, দাসী আমার কবরী রচনা করিয়া



## অভিশপ্তা

দিতেছিল। আমি শূন্যদৃষ্টিতে ওপারে,—যেখানে ধবল সিকতাশয়নের উপরে গঙ্গা আপন জলবেণী লুটাইয়া দিতেছিল, সেইদিকে চাহিয়াছিলাম ; এমন সময়ে, আবার সেই কণ্ঠস্বর !

তাড়াতাড়ি উঠিয়া গবাক্ষ-সমীপে গিয়া দাঁড়াইলাম ! দেখিলাম, নীচে গঙ্গাতরঙ্গচুম্বিত সোপান-চত্বরে বসিয়া বীণাহস্তে সেই যুবক !

• যুবকও আমাকে দেখিল। তাহার আনন ঈষৎ আরক্ত, তাহার স্বর ঈষৎ কম্পিত হইয়া উঠিল। তারপর যে গান গায়িতেছিল, তাহা খামাইয়া সে ভিন্ন রাগিণী ধরিল।

সে গায়িতে লাগিল :—

“অঁধারের ভিতরে ছুটি অঁখি দেগিয়াছি। সে যুগল অঁখির দীপ্তি দেখিয়া মনে হইল, মেঘের কালো নিকষে বিজলীর স্তবর্ণ-আলিপনা ফুটিয়া উঠিয়াছে।

“ফুলের রং যেমন ভিতর হইতে ধীরে ধীরে বিকসিত হয়, সে ছুটি নয়নের উপরে হৃদয়ের গোপন ভাষা তেমনই বিলিখিত হইয়াছিল।

“বসন্তের নীরব ইঙ্গিত বুঝিয়া কোকিল যেমন পঞ্চমে সাড়া দেয়, ওগো কমল-নয়না, তোমার অঁখিপটলিখিত হৃদয়ের মৌনভাষা বুঝিয়া আমার চিত্ত-সারং তেমনি করিয়াই সাড়া দিয়া উঠিতেছে।”

## মধুপর্ক

আমি দাসীর দিকে ফিরিলাম। আমার আকস্মিক আচরণ দেখিয়া সে বিস্মিত হইয়াছিল।

যুবকের দিকে অঙ্গুলিনির্দেশ করিয়া তাহাকে নিম্নকণ্ঠে কহিলাম, “উহাকে সকলের চোখের আড়ালে এখানে আনিতে পারিস্ ?”

দাসীর উপরে আমার যথেষ্ট বিশ্বাস ছিল। কিন্তু আমার কথা শুনিয়া তাহার মুখ ভয়ে বিবর্ণ হইয়া গেল।

আমি তাহার হাত চাপিয়া ধরিয়া আবার কহিলাম, “কি বলিস্ ? পারিবি ?”

“মহারাজ জানিলে আমার মাথা কোথায় থাকিবে ঠাকুরাণী ?”

“তোমার মাথা তোমার কাঁধের উপরেই থাকিবে। মহারাজ এখন আসিবেন না। বল—পারিবি বাঁদী ? হাজার আশ্রয়ি বখশীষ।”

খানিক ইতস্ততঃ করিয়া সে স্বীকার পাইল।

\* \* \* \* \*

অট্টালিকার গুপ্তদ্বার, আমাদের মিলন-সাধন করিয়া দিল। যুবক আমার সন্মানে,—আমি তার সন্মানে। চারিদিক স্তব্ধ। শুধু ভাগীরথীর অবিরাম কলতানে আমাদের মিলনের উৎসব-সঙ্গীত ধ্বনিত হইতেছিল।

যুবক আমার মুখ দেখিতেছিল,—আমি তার মুখ দেখিতেছিলাম। উভয়ে নীরব। আকাশের বাতাস আসিয়া আমাদের প্রাণের স্থপ্ত তন্ত্রীগুলিতে জাগরণের গধুর আভাস আনিয়া দিতেছিল।

যুবক বলিল, “আজ আমার জীবন সার্থক।”

আমি বলিলাম, “আজ আমার নারীজন্ম ধন্য।”

\* \* \* \* \*

অকস্মাৎ ঘরের দরজা খুলিয়া গেল। বিবর্ণমুখে ছুটিয়া আসিয়া দাসী কহিল, “মহারাজ আসিতেছেন! মহারাজ আসিতেছেন!”

মহারাজ!

আমার পায়ের তলা হইতে মাটি যেন চকিতে সরিয়া গেল, আমার চোখের স্রমুখ হইতে পৃথিবীর আলো যেন নিবিয়া গেল।

আমি কাঁপিতে কাঁপিতে গবাক্ষের পর্দার একদিকটা তুলিয়া, তাহার আড়ালে যুবককে ঠেলিয়া দিলাম। তারপর তাড়াতাড়ি বিছানার উপর গিয়া বসিয়া, কোনরূপে একটু আত্মসংবরণ করিয়াছি মাত্র,—এমন সময়ে হাশ্রমুখে মহারাজ গৃহমধ্যে প্রবেশ করিলেন।

আমার ডানহাতটি আপন মুষ্টিমধ্যে গ্রহণ করিয়া, মহারাজ

## মধুপর্ক

স্নিগ্ধস্বরে কহিলেন, “পিয়ারী, তোমার কাছ থেকে দুদণ্ড দূরে থাকিয়া আমার মনে হইতেছিল, আমি একযুগ তোমাতে ছাড়াইয়া আছি।”

বিপদভীত দৃষ্টিকে যথাসম্ভব কোমল করিয়া আমি বলিলাম, “মহারাজ, দাসীর প্রতি আপনার অপার কৰুণা।”

আমার অনাবৃত গণ্ডে সপ্রেমে একটি চুম্বন করিয়া মহারাজ বলিলেন, “তুমি আমার যাদু করিয়াছ।”

আমি মুখ নীচু করিয়া আঙ্গুলে আঁচল জড়াইতে লাগিলাম। মহারাজ, কিছুক্ষণ আমাকে নিষ্পলকনেত্রে নিরীক্ষণ করিলেন। তাহার পর একটু চঞ্চলতা প্রকাশ করিয়া কহিলেন, “উঃ! ঘরের ভিতরে অসহ্য গরম! একলাটি এমন করিয়া, এখানে তুমি কিরূপে বসিয়া আছ?” বলিয়া, তিনি গবাক্ষের দিকে অগ্রসর হইলেন।

আমার প্রাণ ঘেন, হৃদয়ের ভিতরে মূচ্ছিত হইয়া পড়িল।

মহারাজ জ্ঞানালার পর্দা সরাইয়া দিলেন। সেখানে, যুবক দাঁড়াইয়াছিল।

বিস্মিত হইয়া মহারাজ, পর্দা তুলিয়াই আবার ফেলিয়া দিলেন। কিছুক্ষণ স্তম্ভিত এবং স্তব্ধভাবে দাঁড়াইয়া রহিলেন। তাহার পর আমার দিকে ফিরিয়া কহিলেন, “এ কে?”

তুই হাতে শয্যার আস্তরণ মুঠার ভিতরে চাপিয়া ধরিয়া আমি বজ্রাহতার মত বসিয়া রহিলাম ।

কর্কশকণ্ঠে মহারাজ কহিলেন, “বিশ্বাসঘাতিনী ! এতদূর স্পর্ধা তোর ! আমার শয়নাগারে পরপুরুষ !”

বন্ধ কণ্ঠকে শ্রাণপণে মুক্ত করিয়া আমি কহিলাম, “দোহাই মহারাজের ! উহাকে আমি চিনি না ।”

• “চিনিস্ না ? তবে কিরূপে ও এখানে আসিল ?”

“জানি না, মহারাজ ! জানি না ! ও চোর !”

বাঁ হাতে আবার পর্দা তুলিয়া, মহারাজ ডান হাতে যুবককে ধরিয়া বাহিরে টানিয়া আনিলেন । তীক্ষ্ণদৃষ্টিতে তাহার আপাদমস্তক নিরীক্ষণ করিয়া কহিলেন, -- “কে তুই ?”

“আমি চোর ।”

“কিরূপে এখানে আসিলি ?”

“বলিব না ।”

“কি !”

“বলিব না ।”

“বলিবি না ?”

“না ।”

মহারাজ হাত বাড়াইয়া ভিত্তিবিনশ্বিত একখানি তরবারি গ্রহণ করিলেন । আমি ছুটিয়া গিয়া তাঁহার উচ্চত হস্ত ধারণ

## মধুপর্ক

করিলাম। কাতরকণ্ঠে কহিলাম, “মহারাজ, মহারাজ, একটা চোরের রক্তে আপনার পবিত্র অস্ত্র কলঙ্কিত করিবেন না।” তাহার পর যুবকের দিকে ফিরিয়া বলিলাম, “এখানে কিরূপে তুই আসিলি, খুলিয়া বল।”

যুবকের উপরে ছই বাহু রাখিয়া, পাথরে-গড়া মূর্তির মত যুবক এতক্ষণ নিখরভাবে দাঁড়াইয়া ছিল। আমার সম্বোধনে তাহার সর্ষদেহের মধ্য দিয়া তড়িৎ ছুটিয়া গেল। আনত নেত্রের পূর্ণ-দৃষ্টি আমার মুখের উপরে রাখিয়া যুবক অভিভূতকণ্ঠে কহিল, “আমি তুচ্ছ চোর নই,—আমি তোমাকে চুরি করিয়া দেখিতে আসিয়াছি।”

প্রদীপ্ত অগ্নির মত উগ্রমূর্তিতে মহারাজ বলিলেন, “কি !”

একটুও বিচলিত না হইয়া যুবক আনমনে বলিতে লাগিল, “হাঁ, চুরি করিয়া তোমাকে দেখিতে আসিয়াছি—শুধু তোমাকে সখি, শুধু তোমাকে ! দেবপূজায় তুমি যাইতেছিলে, পথ হইতে লুকাইয়া আমি তোমাকে দেখিতে পাইয়াছিলাম। তুমি জান না, দেখামাত্র আমার আত্মা তোমার পায়ে বিকাইয়া গিয়াছে। একবার দেখিয়া আমার তৃপ্তি হইল না—তাই সকলের অজ্ঞাত-সারে কৌশলে আমি এখানে আসিয়া লুকাইয়া ছিলাম,—আর একবার তোমাকে দেখিব বলিয়া ! আমার দেখা হইয়াছে।

এখন আমি মরিতে পারি। মহারাজ, আপনার প্রিয়তমার কোন দোষ নাই।”

মহারাজ অগ্রসর হইয়া কঠিনস্বরে কহিলেন, “উত্তম! তোকে প্রাণে না মারিয়া, তোর প্রতি আমি এক নূতন দণ্ড দিব। তোর যে পাপ-চক্ষু পরম্পর পবিত্রতার দিকে কুদৃষ্টিতে চাহিয়াছে, সেই চক্ষু আমি নষ্ট করিব। প্রহরী!” আদেশমাত্র প্রহরী ঘরের ভিতরে আসিয়া দাঁড়াইল।

যুবকের দিকে অঙ্গুলিনির্দেশ করিয়া মহারাজ বালিলেন, “এই হতভাগাকে বাহিরে লইয়া গিয়া, ইহাকে অন্ধ করিয়া ছাড়িয়া দে।”

যুবক নীরবে, হাস্যমুখে সেই ভীষণ দণ্ডাদেশ শ্রবণ করিল। বিনা বাধায় যুবক তাহার সঙ্গে চলিল—গমনকালে আমার দিকে একবার দীনদৃষ্টিতে চাহিয়া গেল। ভগবান্, সে দৃষ্টিতে কি গভীর ভাব ফুটিয়া উঠিতেছিল!

\* \* \* \* \*

পরদিন গভীর রাত্ৰিতে, নিদ্রাশূন্য গঙ্গার উচ্চ তরঙ্গ-কল্লোলের উপর দিয়া পাগল ঝটিকা বহিয়া বহিয়া যাইতেছিল।

স্বপ্নে মহারাজের শিথিল বাহুপাশের ভিতরে সহসা আমার নিদ্রাভঙ্গ হইল।

হুম্ করিয়া পবান্ধ-কবাট খুলিয়া গেল এবং বহিঃপ্রকৃতির

## মধুপর্ক

বিশ্বব্যাপী হাহাকার, বৃষ্টির ঝাপটা ও উদ্দাম বায়ুর সঙ্গে সে  
কাহার আকুলকণ্ঠ আমার ঘরের ভিতরে প্রবেশ করিল ? সে  
কেগো— সে কে ?

তাড়াতাড়ি জানালাটা বন্ধ করিয়া দিতে উঠিলাম ।  
হঠাৎ মেঘের কালো বুক চিরিয়া দেবতার অগ্নিময় ক্রকুটী ফুটিয়া  
উঠিল, সেই ক্ষণিকউজ্জ্বল আলোকে দেখিলাম, ঝড়-বৃষ্টির প্রতি  
একান্ত উদাসীন হইয়া সোপান চত্বরে বসিয়া সেই অন্ধ যুবক  
গায়িতেছে :—

“নয়না নহি নিদ গই রে,

নিশিদিন মোরি ছাতিয়ান লাগেও অধীরকো ।”

\* একটা চীৎকার করিয়া তখনই মূর্চ্ছিত হইয়া ভূমিতলে  
পড়িয়া গেলাম ।

\* \* \* \* \*

তাহার পর প্রতি নিশায় তাহার হতাশ সঙ্গীত, তীক্ষ্ণধার  
অস্ত্রের মত আমার বুকে আসিয়া বিধিত । আমার সকল সুখ,  
—শান্তি ও আনন্দ, জন্মের মত ঘুচিয়া গেল । আহারে-বিহারে  
শয়নে-স্বপনে সর্বদাই রহিয়া রহিয়া সেই যুবকের কথাই আমার  
মনে পড়িতে লাগিল । সেই কাতর মুখ—সেই অন্ধ নেত্র—  
সেই উদাস গীত ! তাহার যাতনা ও হতাশার একমাত্র  
কারণই ত আমি ! তাহাকে বিপদে ফেলিয়া আপনাকে



## অভিশপ্তা

বাঁচাইবার • জন্ম পাপিষ্ঠা আমি—অনায়াসে মিথ্যা কথা  
কহিয়াছি।

ভীষণ যন্ত্রণার ভিতরে অকস্মাৎ একদিন মৃত্যু আসিয়া  
আমার কমনীয় তনুকে চিতায় সমর্পণ করিল। মরণকালে  
তাহার গান শুনিয়াছি এবং মৃত্যুর পরেও শতাব্দীর পর শতাব্দী  
‘ধারিয়া, প্রতি-নিশায় আমার অভিশপ্ত আত্মা সেই সকরণ সঙ্গীত  
শুনুয়া আসিতেছে। ঐ শুন, ঐ শুন গো! হে অন্ধ যুবক,  
আমার অপরাধ মার্জনা কর আর শুনিতে পারি না, ওগো,  
আর সহ্য করিতে পারি না!”—

ছায়ামূর্তির কথা শেষ হইতে না হইতে হঠাৎ কাহার  
বিস্মিত কণ্ঠ শুনিলাম, “কোন ছায় রে!”

চকিতে আমার আচ্ছন্ন ভাব কাটিয়া গেল, ধড়মড়  
করিয়া উঠিয়া বসিয়া দেখি, পূর্ব চক্রবালে উষার ললাটিকা  
জ্বলিয়া উঠিয়াছে এবং একগোছা চাবী হাতে করিয়া  
মানমন্দিরের দরওয়ান সামনে দাঁড়াইয়া মুঠের মত আমার  
দিকে চাহিয়া আছে! কক্ষতলে কোথায় সেই ছায়ামূর্তি?  
আশ্চর্য্য স্বপ্ন!

# বিধবা

## গঙ্গার ঘাটে জটলা

সেনেদের বাঁধা-ঘাটে পাড়ার মেয়েরা স্নান করিতে আনিয়া-  
ছেন। কেহ বৃদ্ধা, কেহ প্রৌঢ়া, কেহ যুবতী, কেহ কিশোরী,  
কেহ বালিকা।

ঘোষ-গিন্নীর সামনে তামার টাটে মাটির শিব, পঞ্চপাত্রে  
গঙ্গাজল, ছোট্ট একটি বাঁপিতে ফুল আর বেলপাতা।

ঘোষ-গিন্নী যে পূজা করিতেছিলেন না, তাঁহাকে এমন  
অপবাদ যে দেয়, সে নিশ্চয়ই চোখের মাথা খাইয়াছে। তিনি  
অবশ্যই পূজা করিতেছিলেন, তবে তাঁর চোখ-কাণ-মন ছিল  
ঘাটের জটলার দিকে। একসঙ্গে যদি রথও দেখা যায়, কলাও  
বেচা হয়, তবে সেটা আর বিশেষ মন্দ কথা কি ?

বামুন-দিদি স্নান সারিয়া ভিজা কাপড় নিংড়াইতে  
নিংড়াইতে যখন ঘরমুখো হইলেন, ঘোষ-গিন্নীর শিব-পূজা তখন  
আশ্চর্যরূপে হঠাৎ সাক্ষ হইয়া গেল। তিনি তাড়াতাড়ি শিবের  
মাথায় কুশি করিয়া একটু গঙ্গাজল ছিটাইয়া, চারিদিকটা সতর্ক

## বিধবা

দৃষ্টিতে একবার দেখিয়া লইয়া বলিলেন, “ও বামুন-দিদি, বলি, চলে নাকি ?”

বামুন-দিদি বলিলেন, “হ্যাঁ ভাই, বেলা হল—বৌ-ঝিগুলো ছেলেমানুষ, আমি না গেলে হয় ত হাঁড়িই চড়বে না—ছেলেদের আপিসের ভাত দিতে হবে ত !”

সেনেদের বাড়ীর দিকে আর একবার অর্থপূর্ণ দৃষ্টিতে চাইয়া ঘোষ-গিন্নী, হাতছানি দিয়া ডাকিয়া বলিলেন, “বলি, শোনই না, কথা আছে ।”

ঘোষ-গিন্নীর রকম-সকম দেখিয়া বামুন-দিদির মাথার টনক নড়িল । তিনি ফিরিতে ফিরিতে কাঁহলেন, “তা বল্ বাপু বল্, কি বল্‌বার আছে বল্ ।”

ঘোষ-গিন্নী চাপা গলায় বলিলেন, “আর শুনেছ,—সেনেদের বাড়ীতে বিধবা-বিয়ে হবে যে !”

বামুন-দিদি কপালে চোখ তুলিয়া বলিলেন, “কার লো — কার ? নলিনীর ঠাকুমার নাকি ?”

ঘোষ-গিন্নী হাসিয়া ঢলিয়া পড়িয়া বলিলেন, “দিদির কথা শুনে আর বাঁচি না ! ও আমার পোড়া কপাল ! ঠাকুমার কি আর সে বয়স আছে ? তোমাদের নলিনীর গো—নলিনীর !”

বামুন-দিদি ছেলেদের আপিসে যাওয়ার কথা বেবাক্ তুলিয়া

## মধুপর্ক

ঘাটের চাতালে ধপাস্ করিয়া বসিয়া পড়িলেন, বলিলেন, “এ কথা কার মুখে শুনলি রে?”

ঘোষ-গিন্নী বিনাইয়া বিনাইয়া বলিলেন, “আমার কামিনী যে নলিনীর সহ,—আমি যে সব শুনব, তাতে আর আশ্চর্য্য কি বল! কামিনী কাল সন্ধ্যাবেলা আমাকে ডেকে চুপি-চুপি বললে, ‘কাউকে বল’ না মা, সহইয়ের ফের বিয়ে হবে’—আমি ত গালে হাত দিয়ে একেবারে অবাক!”—বলিতে বলিতে ঘোষ-গিন্নি সেনেদের বাড়ীর দিকে সন্দিগ্ধ নয়নে আবার চাহিয়া দেখিলেন। ঘাট-স্বন্ধ মেয়ে ততক্ষণে ঘোষ-গিন্নীর ঘাড়ের উপরে হুম্ড়ি খাইয়া পড়িয়াছে।

বামুন-দিদি ভাল করিয়া জঁাকিয়া বসিয়া বলিলেন, “তারপর?” তাঁর ভাব দেখিলে বোঝা যায়, ছেলেদের আজ অনাভাবে আপিস কামাই গেলেও, তিনি সব কথা না শুনিয়া এখান থেকে এক-পা নড়িবেন না।

ঘোষ-গিন্নী ভিজা চুলগুলো লইয়া, মাথার সামনের দিকে চূড়া করিয়া ছুটি বাঁধিতে বাঁধিতে বলিলেন, “কামিনীকে আমি জিজ্ঞেস করলুম, ‘কে বললে তোকে?’ কামিনী ফিকু করে একটু হেসে বললে, ‘কেন, সহই নিজে।’—নলিনী-ছুঁড়ীর বেহায়াপনাটা দেখ একবার! শুনলুম, বিয়ের কথা শুনে অবধি ছুঁড়ী নাকি ধিন্দী হয়ে বাড়ীময় নেচে নেচে বেড়াচ্ছে।”

## বিধবা

ধামুন-দিদি নাক শিকায় তুলিয়া বলিলেন, “টাকার দেমাক বাছা, টাকার দেমাক ! কিন্তু ব’লে রাখ্‌লুম বোন, ধর্ম্মে এত সহিবে না । এখনও শূঘ্যি উঠ্‌চে, দিন-রাত হচ্ছে !”

যাত্রার বীরপুরুষ যেমনভাবে দু’হাতে ভিড় ঠেলিতে ঠেলিতে রণক্ষেত্রে প্রবেশ করে, তেমনিভাবেই পুরুত-বৌ এই অবকাশে অগ্রসর হইয়া হাত ও মাথা ঘন ঘন নাড়িতে নাড়িতে বলিলেন, “ওমা, যাব কোথা ! কালে কালে এ হল কি ! যাই মিসেকে বলে’ দিই গে, ওদের বাড়ী যেন আর না মাড়ায় ।”

ঘোষ-গিন্নী ত্রস্তভাবে বলিলেন, “তা, যা কর তা কর বাছা, আমার নামটি যেন করে বস না । জানত, আমার কামিনী, নলিনীর সহি ।”

মুখ বাঁকাইয়া পুরুত-বৌ বলিলেন, “অমন স’য়ের মুখে ছাই ! তোমার কামিনীকে বলে দাও, স্নেহের বাড়ী গেলে তারও জাত্‌ যাবে ।”

ঘোষ-গিন্নী বিরক্ত হইয়া কহিলেন “বালাই, কামিনী আমার তেমন মেয়েই নয়—তার জাত্‌ যাবে কেন ? ওদের বাড়ীর চাল-কলা খেয়ে আর শাঁখ-ঘণ্টা নেড়ে যারা মানুষ, জাত্‌ যাবার ভয় তাদেরই বেশী—”

পুরুত-বউ বাধা দিয়া খন্থনে গলা তুলিয়া বলিলেন,

## মধুপর্ক

“চাল-কলা আর শাঁখ-ঘণ্টার খোঁটা, কাকে ঠেস্ দিয়ে বলা হল শুনি ? জাতের ডব্-ডবানি আমাদের আর দেখিও না গো ঘোষ-গিন্নী, দেখিও না। জাত্ রাখতেও আমরা—মার্বতেও আমরা।”

ঘোষ-গিন্নী বলিলেন, “থাম পুরুত-বৌ, থাম—এখানে দাঁড়িয়ে আর দশ-বাই-চণ্ডীর মত চেঁচিও না !”

মুখঝামটা দিয়া পুরুত-বৌ বলিলেন, “চেঁচাব না ! কেন চেঁচাব না ? আমি কি কোন শতেকখোয়ারীর আটচালায় বাস করি যে, ভয় করতে যাব ? আ মর ! আবার বলা হচ্ছে, চেঁচিও না ! চেঁচাব—খুব চেঁচাব। আমি জোরগলায় বল্চি, মিন্কে দিয়ে সেনেদের আর তোমাদের জাত্ মার্ব, মার্ব, মার্ব—তবে ছাড়্বে !”

আসল কথা চাপা পড়িয়া গেল দেখিয়া বাঘুন-দিদি ব্যাজার হইয়া বলিয়া উঠিলেন, “মা, মা ! আচ্ছা পুরুত-বৌ, এ যে তোমার অন্তায় বাছা ! কেউ ত তোমাকে কিছু বলে নি, গায়ে পড়ে তুমি কৌদল করতে আস কেন গা ?”

পুরুত-বৌ আরও উঁচু পদায় গলা তুলিয়া বলিলেন, “ও ! সব শেষালের এক রা ! আচ্ছা, মিন্কে বলে তোমারও জাত্ মার্ব !”

অগ্নাগ্ন স্ত্রীলোকেরা বলিল, “আচ্ছা, জাত্ মার্বতে হয়

বাড়ীতে গিয়ে মের’—এখন একটু খাম, কথাটা ভাল করে শুন্তে দাও।”

পুরুত-বৌ বলিলেন, “তোমরাও ঐ দলে? আচ্ছা, মিন্কে গিয়ে বল্ব, বল্ব—এই তিন সত্যি কর্বলুম, তোমাদের সন্সারই জাত্ মার্ব তবে ছাড়ব।”

এমন সময়ে দেখা গেল, সেনেদের বাড়ীর ভিতর থেকে একটি যুবতী বাহির হইয়া এই দিকেই আসিতেছেন। বোধ হয়, পুরুত-বোয়ের মিষ্ট গলার স্বর বাড়ীর ভিতরেও গিয়াছিল।

ঘোষ-গিন্নী ততমত খাইয়া বলিয়া উঠিলেন, “ওমা, নলিনী যে!”

বামুন-দিদি চট্ পট্ উঠিয়া পড়িয়া বলিলেন, “গঙ্গা, গঙ্গা, গঙ্গা! যাই মা, বেলা হল, আপিসের ভাত দিতে হবে।

পুরুত-বৌ গজ্-গজ্ ও ফোন্স্-ফোন্স্ করিতে করিতে—বোধ করি, “মিন্কে”র কাছে নালিশ জানাইতেই চলিলেন।

ঘোষ-গিন্নী ততক্ষণে (এবারে চোখ চাহিয়া নয়) ভক্তিভরে আবার শিবের ধ্যানে বসিয়াছেন। অন্যান্য রমণীরাও—কেহ গঙ্গায় গিয়া ডুব দিলেন, কেহ একাস্তমনে কাপড় কাচিতে লাগিলেন, কেহ “বাজার বড় মাগি, চাবুটে ক্ষুদে ক্ষুদে চিংড়ীমাছের ভাগা পাঁচ পয়সা—গেরস্তুর দিন চলা

## মধুপর্ক

ভার হয়ে উঠল দেখ্‌চি”—বলিয়া অতিশয় নিরীহের মত ঘর কন্নার কথা পাড়িলেন।

নলিনী ঘাটে আসিয়া দেখিল, অভিনয় শেষে রঙ্গালয়ের মত সব একেবারে চূপ-চাপ হইয়া গিয়াছে। একবার সকলকার মুখের দিকে তাকাইয়া বলিল, “ই্যাগা, পুরুত বৌ ‘জাত্ মারুব, জাত্ মারুব বলে’ চেষ্টাচ্ছিলেন কেন?”

কাপড়-কাটা বন্ধ করিয়া একজন যেন আকাশ থেকে পড়িয়া বলিলেন, “কই, আমরা ত শুনি নি বাছা!”

নলিনী বিস্মিতস্বরে বলিল, “সে কি গো, পুরুত-বৌয়ের গলার চোটে আকাশ ফেটে যাচ্ছিল, আর তুমি শোন নি কি রকম?”

“জানিনে বাপু, আমরা কারুর সাত-পাঁচে থাকিনি, কে কি বলে না বলে আমরা তা কি জানি? ঐ ঘোষ-গিন্নীকে জিজ্ঞেস কর।”

ঘোষ-গিন্নী তাড়াতাড়ি পূজার জিনিষ-পত্র তুলিতে তুলিতে দুই চক্ষু বিস্ফারিত করিয়া বলিলেন, “তুমি কেমন মেয়ে গা, কলু-বউ! আমি কচ্ছিলুম পূজো, কে কার জাত্ মারবে, আমি তার কি ধারু ধারি? মুখ দিয়ে ফস করে একটা কথা বলে ফেলেই হল!”—বলিতে বলিতে তিনি তাঁর নাহুস্-মুহুস্ নোটা দেহখানি লইয়া, যত তাড়াতাড়ি পারা যায়, সরিয়া পড়িলেন।



একটি বালিকা নলিনীর কাছে গিয়া বলিল, “হ্যা, নলিনী-মাসী, তুমি নাকি আবার বিয়ে করবে ?

নলিনীর মুখ রাঙ্গা হইয়া উঠিল। ব্যাপারটা যে কি, সে কথা বুঝিতে আর তার দেরি হইল না। কোন কথা না কহিয়া মুখ নীচু করিয়া আস্তে আস্তে আবার সে ফিরিয়া গেল।

ঘাটের রমণীরা পরস্পরের দিকে চোখ-ঠাঠাঠা করিয়া নীরবে হাসিতে হাসিতে এ-উহার গায়ে ঢলিয়া পড়িতে লাগিলেন। সে হাসি দেখিয়া বোঝা যায়, নলিনীর প্রাণের বাখাটা তাঁহারা বেশ ভালরূপেই উপভোগ করিতেছিলেন।

### একালের স্মরণ

আমরা সবাই গোলাপ-ফুলটিকে চাই—কিন্তু কাঁটা বাদ। সুরেশবাবুও কলিকাতার সুবিধাটুকু ষোল আনা ভোগ করিতে চান; কিন্তু কলিকাতার রাস্তার ধূলা, গাড়ীর ঘড়-ঘড়ানি আর লোকজনের হটগোল সহ্য করিতে একেবারেই নারাজ।

অতএব, কলিকাতার কাছাকাছি গঙ্গার পারেই তিনি বাড়ী তৈয়ারী করাইয়াছেন। কলিকাতার কোন কোর্টের তিনি ম্যাজিস্ট্রেট। তাঁর পিতাও, যৎকিঞ্চিৎ সঞ্চয় না করিয়া পরলোকে প্রস্থান করিয়া পুত্রকে ইহলোকে বিপদগ্রস্ত করেন নাই।

## মধুপর্ক

বিলাতের মাটী না মাড়াইয়াও যে কতটা পূরো সাহেব হওয়া যায়, তার প্রমাণ দিতে হইলে লোকে সুরেশবাবুর নাম করিত। বাড়ীর ভিতরে বা বাহিরে সুরেশবাবুকে কেউ কখনও বাঙ্গালীর পোষাক পরিতে দেখে নাই। আকারে প্রকারে, আহারে-বিহারে সুরেশবাবু একেবারে 'কেতা'দুরস্ত খাটি সাহেব।

সুরেশবাবু বিপত্নীক। বিবাহের ফলে তাঁহার এক পুত্র ও এক কন্যা লাভ হইয়াছিল। ছেলের নাম রমেশ, মেয়ের নাম নলিনী।

রমেশ সম্প্রতি বিলাতে গিয়া ব্যারিষ্টার হইয়া আসিয়াছে। এখনও ব্যবসায় আরম্ভ করে নাই।

নলিনী বিধবা। বিবাহের এক বৎসর পরেই তার স্বামী মারা যান। “খাও দাও—আনন্দে রহো”—সুরেশবাবুর জীবনে এইটিই মূলমন্ত্র হইলেও নলিনীর ঐ কাতর মুখখানি তাঁহার বুকের ভিতরে সর্বদা একটা খোঁচার মত লাগিয়া থাকিত।

সংসারে আর একটি লোক ছিলেন, তিনি সুরেশবাবুর বৃদ্ধা মাতা। নলিনীর এই ঠাকুরমাটি একেবারে সেকলে হিন্দুমহিলা; আপনার ঠাকুর-ঘরে বসিয়া সারাদিন তিনি দেবতার সেবা ও পূজা-অর্চনা লইয়াই ব্যস্ত থাকিতেন, সন্ধ্যাবেলায় প্রতিদিনই নলিনীর মুখে গলদশ্রলোচনে রামায়ণ

মহাভারতের অমৃত-কথা শ্রবণ করিতেন। পড়িতে বসিবার আগে নলিনীকে রোজ কাপড় ছাড়িয়া, গা ধুইয়া আসিতে হইত। যে কাপড় পরিয়া নলিনী তার বাপকে ছুঁইয়াছে, সে কাপড়ে ঠাকুরমাকে ছুঁইলে, তিনি তখনই “রাম রাম” বলিয়া গুদায় ডুব দিয়া আসিতেন।

স্বরেশবাবু মেয়েকে সকলরকমে নিজের আদর্শমত গড়িয়া তুলিতে চেষ্টা করিতেন। আবার, ঠাকুরমা তাহাকে নিজের দলে টানিতেন। তিনি বলিতেন, “দেপ্‌ মা নলিনী, তুই হিন্দুর ঘরের বিধবা, বাপের কথায় যেন স্নেহ আচার শিখিস্‌ নি। ঠাকুর তা হলে রাগ করবেন।”—নলিনী, হাসিয়া ঠাকুরমার গলা জড়াইয়া ধরিয়া বলিত, “না ঠাকুরমা, আমি তোমার কথা শুনব।”

এই দোটারায় পড়িয়া নলিনীর চরিত্রে একাল-সেকালের অপূর্ণ মিলন হইয়াছিল। বাপের যত্নে একালের শিক্ষিতা মহিলার মত সে বিদুষী হইয়া উঠিয়াছিল; আবার ঠাকুরমার সংস্কার ও প্রভাবও তাহার জীবনের পরতে পরতে মিশিয়া গিয়াছিল। ফলে, সে তার বাপকে ও খুসি রাখিত, ঠাকুরমাকে ও খুসি রাখিত।

\* \* \* \* \*

রমেশের সহপাঠি অমিয়কুমার ছেলেবেলা হইতেই

## মধুপর্ক

সুরেশবাবুর বাড়ীতে আসা-যাওয়া করিত, এমন 'সুশ্রী' পুরুষ বাঙ্গালীর ভিতরে বড় একটা দেখা যায় না।

রমেশের সঙ্গে অমিয়ও বিলাতে গিয়াছিল,—ডাক্তারী পড়িতে। অল্পদিন হইল, সে দেশে ফিরিয়াছে। অমিয় অবিবাহিত।

বিলাত হইতে ফিরিয়া প্রথম যেদিন শ্বেতবসনা নলিনীকে দেখিল, সেদিন সে স্তম্ভিত হইয়া গেল। নলিনীকে দেখিয়া গিয়াছিল সে চপলা কুমারীর বেশে, বাতাসে উড়ন্ত ফুলের একটি পাপড়ির মত, তখন সে মনের খুসিতে বাড়ীময় ছুটাছুটা করিয়া বেড়াইত,—আর আজ, সেই হাস্যময়ী চঞ্চলার একি রূপ, একি বেশ! এই দু'দিনের ভিতরে সংসারের বিষাক্ত নিঃশ্বাসে তাহার মুক্ত স্বথের নিব্বার একেবারে শুকাইয়া গিয়াছে? অমিয়ের চোখ সজল হইয়া উঠিল,—সে প্রথমে কোন কথাই কহিতে পারিল না।

নলিনী তাহাকে নমস্কার করিয়া বলিল, “ভাল আছেন ত অমিয়বাবু? আপনার চেহারা যে একেবারে বদলে গেছে!”

অমিয় জোর করিয়া মুখে হাসি আনিয়া বলিল, বদলে গেছে! কি রকম বল ত!”

নলিনী বলিল, “বিলেত যাবার আগে আপনি বেশ ছেলে-মানুষটির মত দেখতে ছিলেন; আর এখন—”

“একেবারে জোয়ান পুরুষ-মানুষ হয়ে উঠেচি—না-  
নলিনী? ভগবান্ এমনি করে ছেলেকে যুবা আর যুবাকে বুড়ো  
করে চিরকালই খেলায় মেতে আছেন—মানুষ বড় হইলেই  
যুবা হয়, নাকের তলায় গৌফ গজায়, মাথায় লম্বা হয়ে ওঠে—  
উঃ! সৃষ্টির কি ভীষণ হেঁয়ালি! কিন্তু তোমার আমার ত  
আর এতে কোন হাত নেই, কি করুব বল, এজ্ঞে আমি  
আন্তরিক দুঃখিত।”

নলিনী হাসিয়া বলিল, “অমিয়বাবু, চেহারা বদলালেও  
আপনার কথা কইবার ধরণটুকু একেবারেই বদলায়  
নি।”

অমিয় বলিল, “এককথা বললে দশকথা শুনিবে দি? হাঁ—ও রোগটা আমার বরাবরই আছে—তবে আশা করি, যরাবর থাকবেও।”

“আচ্ছা অমিয়বাবু, বিলেত কেমন জায়গা?”

“সেকথা ত আমাদের এক কবি প্রাঞ্জল ভাষায় বুঝিয়ে দিয়েছেন, ‘বিলেত দেশটা মাটির, সেটা সোণা-রূপোর নয়, তার আকাশেতে সূর্য্য ওঠে, মেঘে বৃষ্টি হয়,’ বাস্! এই দু’লাইনেই বিলেতের অবিকল ‘ফোটো’। তবে কিনা, তফাৎ কি জান? সে দেশের মেয়েরা তোমার মতন এমন শাদা কাপড় পরে, এমন মুখ শুকিয়ে থাকে না—একটু খামিয়া,

## মধুপর্ক

গম্ভীর হইয়া অমিয় বলিল, “নলিনী, তোমাকে এমন দেখতে হবে, এটা কখন স্বপ্নেও মনে করি নি।”

নলিনী মুখ ফিরাইয়া কিছুক্ষণ চূপ করিয়া রহিল ! তাহার পর বলিল, “অমিয়বাবু, ঠাকুরমার সঙ্গে দেখা করবেন না ?”

অমিয় বলিল, হ্যাঁ, হ্যাঁ,—ঠাকুরমার ঠাকুরের প্রসাদ অনেক খেয়েছি,—তঁার সঙ্গে দেখা না করলে মস্ত অকৃতজ্ঞতা হবে। চল।”

ঠাকুরমা, তখন ঠাকুর-ঘরে বসিয়া নৈবেদ্যের চাল সাজাইতেছিলেন। অমিয় ঠাকুরমার শুচিবাইএর কথা জানিত। তাই সে বাহির হইতেই ডাকিল, “ঠাকুরমা—অ-ঠাকুরমা।”

অমিয়ার গলা শুনিয়াই ঠাকুরমা ধড়-মড় করিয়া উঠিয়া বলিলেন, “কে রে, ‘ওমে’ এলি নাকি? কেমন, ভাল আছিস্ ত ?”

অমিয় বলিল, “তোমায় প্রণাম করতে এসেছি ঠাকুরমা ! হুকুম দাও—ঘরে ঢুকে পা ছুঁয়ে দণ্ডবৎ হয়ে ভক্তিভরে প্রণাম করব, না এইখানে দাঁড়িয়ে তফাৎ থেকেই প্রণামটা আনুগোছে সেরে নেব ?”

ঠাকুরমা তাড়াতাড়ি দরজার কাছে আসিয়া ব্যস্তভাবে

বলিলেন, “না বাবা, ঘরে আর ঢুকতে হবে না, ঐখান থেকেই কর, ঐখান থেকেই কর।”

“যো হুকুম”—বলিয়া অমিয় ঠাকুরমাকে প্রণাম করিল।

“বেঁচে থাক বাবা, চিরজীবী হও; সংসারে আমাদের দিন ত ফুরিয়ে এসেছে, এখন তোমরা ঘর-সংসার পেতে, বিয়ে-থা করে’ সুখে-স্বচ্ছন্দে থাক—মা-কালী যেন এই করেন।”

অমিয় বলিল, “সে কি ঠাকুরমা, তোমার দিন ফুরবে কেন? বালাই, মা-কালী তোমার জন্মে এত শীঘ্র যদি বাস্তু হয়ে ওঠেন, তা হলে তিনি ভুল করবেন। দাঁড়াও, আগে তোমার রমেশের একটি টুকটুকে রান্ধা বউ দেখ, তার নাতি দেখ।”

ঠাকুরমা বলিলেন, “না বাবা, তা আর দেখতে চাই না, এখন তোমাদের রেখে যেতে পারলেই বাঁচি।”

“যেতে পারলে ত বাঁচ,—কিন্তু তোমাকে ছাড়ে কে? রমেশের নাতির বিয়েটা দেখ।”

“না বাবা, তোমার অমন কামনায় আর দরকার নেই।”

“উঁহু! রমেশের নাতির খোকাকে দেখবে—”

“না বাবা—”

“সেঁকি হয়, নাতির নাতি দেখলে স্বর্গে দেবার বাতি জ্বলে, জান ত?”

## মধুপর্ক

রমেশ বলিল, “আপনি কি জিজ্ঞাসা করছেন? বিধবার বিবাহ দেওয়া উচিত কি অসুচিত,—এই ত?”

“হ্যাঁ।”

“আমার বিশ্বাস দেওয়া উচিত। বিশেষ, আমাদের দেশে।”

“কেন?”

“এদেশে বিধবার জীবন,—লক্ষ্যশূণ্য জীবন। সংসারের একজন হয়েও তিনি সংসারের বাইরে থাকেন। আমরা তাঁকে মানুষ বলে’ জানি; কিন্তু তাঁকে মানুষের অনেক অধিকার থেকে বঞ্চিত রাখি। এখানে বালিকা-বিধবাকে কঠোর ব্রহ্মচর্যা-ব্রত পালন করানো হয়; কিন্তু সেই বালিকার সামনে বসে তার বৃদ্ধ পিতা-মাতা জীবনকে যতটা পারেন, হাসিমুখে ভোগ করে নেন।”

সুরেশবাবু চুপ করিয়া কিছুকাল বসিয়া রহিলেন। তাহার পর বলিলেন, “আচ্ছা রমেশ, নলিনীর যদি আবার বিবাহ দি, তা হলে তোমার কোন আপত্তি-টাপত্তি আছে?”

তাহার পিতা যে এই কথা বলিবেন, রমেশ তাহা তাহার কথা কহিবার ধরণ-ধারণ দেখিয়া আগে থাকিতেই আন্দাজ করিতে পারিয়াছিল। এদিকে তারও একটা আন্তরিক ইচ্ছা ছিল; কিন্তু ভরসা করিয়া এতবড় কথাটা সে পিতার সম্মুখে



তুলিতে পারে নাই। সে পুলকিত হইয়া বলিল, “আমার এতে কোন অমত নেই বাবা !”

“দেখ, নলিনীর জন্তে দিন-রাত আমার মনে শঙ্কি নেই—তার শুষ্কমুখ দেখলে আমার বুকের রক্ত জল হয়ে যায়। অনেক ভেবে চিন্তে তবে আমি ঠিক করেছি যে, নলিনীর আবার বিবাহ দেব। এতে তোমারও মত আছে জেনে আমি সুখী হলাম ;—কিন্তু এখন একটা কথা। বিধবা বলে ত নলিনীকে যার তার হাতে সঁপে দিতে পারি না—ভাল পাত্র না পেলে তার বিবাহ কিছুতেই দেব না ; কিন্তু তেমন পাত্র পাই কোথায় ?”

রমেশ বলিল, “আচ্ছা বাবা, অমিয় যদি নলিনীকে নিতে রাজী হয়, তা হলে আপনার কোন অমত হবে কি ?”

শুরেশবাবু বলিলেন, “অমিয় ! বল কি ! এমন ভাগ্য কি আমার হবে ?”

রমেশ বলিল, “কেন অমিয়ার অমত হবার কারণ দেখছি না। নলিনীর মত শিক্ষিতা আর সুন্দরী স্ত্রী কি যার-তার ভাগ্যে ঘটে ? বিশেষ, অমিয়ার বাপ-মা নেই, সে একেবারে স্বাধীন ; সুতরাং সেদিকে থেকেও কেউ তাকে বাধা দেবে না। আর তার নিঃস্বের কথা যদি ধরেন, আমি তা হলে বলতে পারি, তার কোন রকম কুসংস্কার নেই।”

## মধুপর্ক

সুরেশবাবু উঠিয়া দাঁড়াইয়া বলিলেন, “বেশ, তুমি তাহলে অমিয়ের মতামত জেনে এস। অবশ্য, এ বিবাহ হলে আমাদের আত্মীয়-স্বজনেরা চটে যাবেন ; কিন্তু, কি করুব, তাঁদের খুসী রাখবার জন্তে ত ঐ নিন্দোষ মেয়েটার সারা জীবন নষ্ট করে দিতে পারি না। আর এক বিপদ হ'বে, আমার মাকে নিয়ে ; কিন্তু সেকেলে বুড়ীদের কুসংস্কার মেনে চলতে গেলে সংসারটা পদে পদে অচল হয়ে উঠবে। যাক—যাই হোক তাই হোক—এ বিবাহ আমি দেবই দেব।”

## আলো ও ছায়া

নলিনী যখন কথাটা শুনিল, তখন তার প্রাণ-মন হঠাৎ কেমন একটা অজানা বিদ্রোহী ভাবে অভিভূত হইয়া গেল।

আমার বিবাহ ! আপনার পোড়াকপালের কথা ভাবিয়া সে অনেক দীর্ঘশ্বাস ফেলিয়াছে ; কিন্তু তার মনের ব্যথা সুধু মনই জানিত, সে গভীর ব্যথার কথা ত ঘৃণাক্ষরেও বাহিরে প্রকাশ পায় নাই ! সে বিধবার জীবন যাপন করিতেছিল, বিলাসিতাকে সকল দিকু দিয়া পরিহার করিয়া চলিতেছিল ; তার যে আবার বিবাহ হইবে, সেটা যে সম্ভব, এমন ব্যাপার সে স্বপ্নেও কোনদিন কল্পনা করে নাই।

কথাটা শুনিয়াই তার মন যেন ঘৃণাভরে বলিয়া উঠিল,

## বিধবা

“না, নু, না!”—তাহার ইচ্ছা হইতে লাগিল—তখনই সে ছুটিয়া গিয়া পিতার ছুটি পায়ে পড়িয়া বলে, “ওগো সে হবে না, সে হবে না, বাবা, সে হবে না।”—কিন্তু সে পিতার দৃঢ়তা জানিত। বুঝিল, এমন অনুরোধে তাহার নিজের লজ্জা-হীনতাই প্রকাশ পাইবে,—পিতা তাহার কাকুতিতে কৰ্ণপাতও করিবেন না।

তখন সন্ধ্যা হইয়াছে। পশ্চিমের জ্বলন্ত রবি-চিতার আকাশভরা আলো অনেকক্ষণ নিবিয়া গিয়াছে, দু-চারিটা দলছাড়া বক তখনও তাড়াতাড়ি উড়িয়া যাইতেছিল এবং রহিয়া রহিয়া দূর মন্দির হইতে আরতির শব্দ কামরের গম্ভীর নিনাদ এলোমেলো বাতাসে ভাসিয়া ভাসিয়া আসিতেছিল। অস্পষ্ট ছায়ালোকে সঙ্গীতমুখর গঙ্গার ও-পারের গাছ-পালার সবুজ রঞ্জের সঙ্গে একটু একটু করিয়া অন্ধকার জমাট বাঁধিতে-ছিল। একখানা পান্‌সী সাদা পাল তুলিয়া ভাসিয়া যাইতেছিল,—তাহার দাঁড়ী মাঝীগুলোকে দেখাইতেছিল, ঠিক যেন জীবন্ত ছবির মত! নলিনী বাপ্পাকুল চোখে সেইদিকে তাকাইয়া রহিল; তাহার উদাসী মন যেন ঐ পান্‌সীখানার সঙ্গে-সঙ্গে ঘর ছাড়িয়া বাহিরে ছুটিয়া যাইতে চাহিল।

অনেকদিন আগেকার এক শুভদিনের কথা তাহার স্মরণ হইল,—আলো আর হাসি আর গানের মাঝে যেদিন এক

## মধুপর্ক

নবীন অতিথি আসিয়া নিজের জীবনের সহিত, তাহার জীবনকে এক করিয়া দিয়াছিল। হায় রে, অকাল শীতের উদয়ে সে বসন্তের পাখী আজ মৌন হইয়াছে বটে,—কিন্তু দুদিনের তরে ডাকিয়া তাহার সারা জীবনকে সে যে বিচিত্র রাগিণীতে পরিপূর্ণ করিয়া দিয়া গিয়াছে, আর কি তাহা ভোলা যায় গো, আর কি ভোলা যায় ? সেই মুখ, সেই চোখ, সেই হাসি ! শশানের নিষ্ঠুর চিত্ত তাহা স্পর্শ করিতেও পারে নাই, নলিনীর স্মৃতির তীর্থে আজও তাহা স্বর্ণ রেখায় তেমনই উজ্জ্বল হইয়া আছে,—নির্কোষ পৃথিবী, নির্দয় সংসার এ সত্য বুদ্ধিতে পারে না কেন, কেন পারে না ? জীবনে জীবনে, জন্মে জন্মে, ঈহলোকে পরলোকে দেবতা সাক্ষী করিয়া চিরসম্বন্ধ যাহার সঙ্গে,—ছার রক্ত মাংসের তুচ্ছ উপভোগের জন্ত আজ কি সে সম্বন্ধকে অস্বীকার করিতে হইবে ? —নলিনী ভাবিতে লাগিল।

বাহির হইতে রমেশ ডাকিল, “নলি, ঘরে আছিস্ ?”

নলিনীর সাড় হইল। তাড়াতাড়ি চোখের জল আঁচর্নে মুছিয়া সে উত্তর দিল, “দাদা ডাক্চ ?”

“হ্যা, বাইরে চল—অমিয় এসেছে।”

নলিনীর বুকটা ধড়্-ফড়্ করিয়া উঠিল। বুক হাত দিয়া খানিকটা সে চূপ করিয়া দাঁড়াইয়া রহিল, তারপর বলিল, “দাদা, আমার বড় মাথা ধরেছে, বাইরে যেতে ইচ্ছে করুচে না।”

“মাথা ধরেচে ত ঘরের ভিতরে বন্ধ হয়ে আছিস কেন ?  
ওতে যে অস্থখ বাড়বে ! আয়, আয়—বাইরে আয় ।”

নলিনী ক্ষীণস্বরে আরও দু-চারবার আপত্তি জানাইল ;  
কিন্তু রমেশের জেদের কাছে তাহার কোন আপত্তিই টিকিল  
না। অগত্যা তাহাকে দরজা খুলিয়া অপ্রসন্ন মনে রমেশের  
সঙ্গে সঙ্গে যাইতে হইল ।

বাহিরের ঘরে গিয়া সে দেখিল, অমিয় একেলা বসিয়া  
আছে। নলিনী ঘরে ঢুকিতেই অমিয়ার চোপ উজ্জল  
হইয়া উঠিল ।

সে হাসিয়া বলিল, “এই যে নলিনী, কখন থেকে তোমার  
জন্মে হা-পিভেন্স করে বসে আছি, কিন্তু তুমি যে দেখ্‌চি বেঁটে  
লোকের কাছে উঁচু দরজার শিকলির মত একান্ত দুর্ভ  
হয়ে উঠেছ !”

উত্তরে নলিনী হাসিবার চেষ্টা করিল,—চেষ্টামাত্র ;  
কিন্তু সে চেষ্টায় তার মুখে হাসির চেয়ে কান্নার ভাবটাই  
বেশীমাত্রায় প্রকাশ পাইল। সে এতদিন অমিয়ার সঙ্গে  
অসকোচে কথাবার্তা করিয়া আসিয়াছে,—আজ কিন্তু কথা  
কওয়া দূরে থাক, অমিয়ার দিকে মুখ তুলিয়া চাহিতেই তার  
ঘাড় ষেন স্নাইয়া স্নাইয়া পড়িতেছিল ।

অমিয় বলিল, “নলিনী, আজ যে দেখ্‌চি তুমি যিশুর

## মধুপর্ক

‘স্বিঃস্কে’র চেয়েও, পাথরের প্রতিমার চেয়েও বেশী নীরব !  
ব্যাপার কি ?”

রমেশ বলিল, “নলির আজ ভারি মাথা ধরেছে। ও ত কিছুতেই আসবে না, আমি একরকম জোর করে ধরে নিয়ে এসেছি।”

অমিয় বলিল, “তুমি অতিশয় পাষণ্ড, রমেশ ! না নলিনী, তোমার শরীর যদি ভাল না থাকে, তবে তুমি ভেতরে যাও। (নালিনী চলিয়া ঘাইতে উত্তত হইল) দাঁড়াও, আর একটা কথা।”

নলিনী কোন রকমে বলিল, “কি ?”

অমিয় স্মুখের টেবিলের উপর হইতে একখানা চক্চকে, নূতন বাধান’ বই তুলিয়া লইয়া বলিলেন “নলিনী, আমার একখানা কবিতার বই বেরিয়েছে। যে দেবীর নামে বইখানা উৎসর্গ করা হয়েছে, সে দেবী যদি প্রসন্না হন, তবে আমার কলম ধরা সার্থক।” বলিয়া, অমিয় বইখানি নলিনীর হাতে দিল।

বইখানি হাতে করিয়া লইবার সময়ে নলিনী, দেখিল, অমিয় কাতর অথচ মধুর মিনতিভরা চোখে তাহার দিকে ভাকাইয়া আছে। সে দৃষ্টি যেন তাঁরের কলার মত নলিনীর প্রাণের মাঝখানে গিয়া বিধিল ; বইখানা লইয়া সে দ্রুতপদে চলিয়া গেল।

আপনার ঘরে গিয়া নলিনী মেঝের উপরে বসিয়া পড়িল। তাহার বুক তখনও ধড়াস্ ধড়াস্ করিতেছিল।

অনেকক্ষণ পরে তার বকের কাঁপন থামিল। তখন সে আশ্বে আশ্বে অমিষের বইখানা লইয়া পাতা উন্টাইতে লাগিল। প্রথম দুই পৃষ্ঠা উন্টাইতেই দেখিল, উৎসর্গ-পত্র। সেখানে বড় বড় হরফে লেখা রহিয়াছে :—

“স্নেহ ও ভালবাসার চিহ্নস্বরূপ আমার এই কবিতাগুলি শ্রীমতা নলিনী দেবার নামে উৎসর্গ করিলাম।”

উৎসর্গ-পত্রের দিকে নলিনী শূন্যদৃষ্টিতে চাহিয়া মূর্তির মত বসিয়া রহিল। অনেকক্ষণ পরে সে বইখানা হাতে করিয়া উঠিয়া দাঁড়াইল। ঘরের এককোণে কেরোসিনের উজ্জ্বল ‘ল্যাম্প’ জলিতেছিল। নলিনী কিছুমাত্র ইতস্ততঃ না করিয়া বইখানা চিমনির উপরে ধরিল।

অমিষের সাধের উপহার লইয়া নলিনী অগ্নিদেবকে উপহার দান করিল। অগ্নিদেব সর্বভুক—এ উপহারে তাঁহাৎ অর্কাচ হইল না।

• \* \* \* \* \*

বুড়াবয়সে কাঁদিয়া কাঁদিয়া ঠাকুরগার চোখ বুঝি গেল।

## মধুপর্ক

যেদিন থেকে নলিনীর বিয়ের কথা শুনিয়াছেন, সেইদিন থেকে তিনি যেন পাগলের মত হইয়া উঠিয়াছেন।

ছেলেকে তিনি অনেক বুঝাইলেন, তাহার কাছে অনেক কান্নাকাটি করিয়াছেন; কিন্তু তাঁহার প্রাণের বেদনা সে ত কিছুতেই বুঝিল না!

চোখের জল মুছিতে মুছিতে ঠাকুরমা বলিলেন, “তবে আমাকে কাশীতে পাঠিয়ে দে বাবা! আমি থাকতে সংসারে এতবড় অধম্ম কখনই ঘটতে দেব না।

‘হাভানা’ চুরটে একটা টান দিয়া সুরেশবাবু বলিলেন, “সে ভাল কথা। তোমাকে আমি কাশী পাঠাতেও রাজি আছি মা, কিন্তু নলির বিয়ে বন্ধ করতে কোনমতেই রাজি নই।”

ঠাকুরমা বলিলেন, “আচ্ছা, আমি অমিয়কে একবার বলে কয়ে দেখব, আমার কথায় হয় ত নলিকে সে বিয়ে না করতেও পারে।”

সুরেশবাবু বিরক্ত হইয়া বলিলেন, “সে সব কিছু ক’র না মা, তাতে কোন ফল হবে না। অমিয় যদি নারাজ হয়, আমি তা হলে অগ্নত্র নলির বিয়ে দেব।”

ঠাকুরমা হতাশ হইয়া চলিয়া গেলেন। ঠাকুর-ঘরে গিয়া কুলদেবতার উদ্দেশ্যে তিনি ষোড়হাতে কাতরে বলিলেন, “হে





## মধুপর্ক

নলিনীর। কথা গুলি শুনিয়া লজ্জায় যেন নলিনীর মাথা-কাটা যাইতে লাগিল। মুখে যারা হাসিয়া কথা কয়, বন্ধুত্ব জানায়, সুর্যোগ পাইলে তাহাদের জিভ্ যে কতটা নিষ্ঠুর হইয়া উঠিতে পারে, নলিনী সেদিন তাহা বেশ বুঝিতে পারিল।

এদিকে সুরেশবাবু বিবাহের দিন স্থির করিয়া ফেলিলেন।

রমেশ ঠিক করিল, বিবাহের আগে একবার নলিনীর মতটা জানা দরকার। তাই, সেদিন বৈকালে যখন অমিয় তাহাদের বাড়ীতে আসিল, রমেশ তখন বলিল, “দেখ অমিয়, নলিকে একবার জিজ্ঞাসা করে দেখ দেখি, এ বিবাহে তার মত আছে কি না।”

অমিয় বলিল, “না ভাই, ও-কাজটার ভার তোমরা কেউ নিলেই ভাল হয়। নলিনী যতই লেখা পড়া শিখুক, সে বাঙ্গালীর মেয়ে;—সে যদি বিড়ালক্ষী মেরি হোত, তা হলে আমি ‘প্রপোস্ করতে পারতুম।’ মছামিছি বেচারীকে লজ্জা দিয়ে লাভ কি?”

রমেশ বলিল, “না না, সে যখন তোমার পত্নী হবে, তখন তোমার পক্ষে বিবাহের আগে ভাল করে তাকে বোঝা দরকার। তুমি বোস, আমি নলিকে ডেকে আনছি।”

অলক্ষণ পরেই নলিনীকে সঙ্গে করিয়া রমেশ ফিরিয়া

আসিল। নলিনী অত্যন্ত কুণ্ঠিতভাবে টেবিলের সামনের এক-  
খানা চেয়ারে বসিয়া পড়িল।

অমিয় বলিল, “কেমন আছ, নলিনি? আজ ত তোমার  
মাথা ধরে নি?”

নলিনী সংক্ষিপ্ত উত্তর দিল, “না।”

টেবিলের উপরে একখানা বাঙ্গালা মাসিক পত্র পড়িয়া-  
ছিল, নলিনী হেঁট হইয়া অগ্রমনস্কভাবে তাহার পাতা উল্টাইতে  
লাগিল। এক জায়গায় একখানা ছবি রহিয়াছে, নাম ‘বিধবা’।  
বিবাহ-বাড়ী, চারিদিকে হাসিমাখা মুখ। ‘এয়ো’রা সাজ-  
গোছ করিয়া, কেহ শাঁখ, কেহ বরণ-ডালা, কেহ খালা লইয়া  
বর-কন্যাকে ঘিরিয়া উৎসবানন্দে মাতিয়া আছেন,— কাহারও  
মুখে বিষন্নতার চিহ্নমাত্র নাই।—এদিকে আঙ্গিনার পাশে  
অন্ধকার ঘরে, মালন শ্বেতবাস পরিয়া, এক নিরলঙ্কারা বিধবা  
যুবতী একাকী দাঁড়াইয়া, কাতর চোখে বাহিরের সেই বিবাহ-  
সমারোহের দিকে তাকাইয়া আছেন। হায়, ঐ উৎসবের মধ্যে  
তাঁহার প্রবেশাধিকার নাই, তাঁহার স্পর্শে নব দম্পতীর  
অকল্যাণ হইবে!

নলিনী আগ্রহের সহিত ছবিখানি দেখিতে লাগিল।

এই অবসরে রমেশ ঘর ছাড়িয়া বাহির হইয়া গেল,—  
নলিনী কিছুই জানিতে পারিল না।

## মধুপর্ক

অমিয় বসিয়া বসিয়া নলিনীর মুখের দিকে—ভক্ত, যেমন করিয়া প্রতিমার মুখের দিকে চাহিয়া থাকে, তেমনই করিয়া— চাহিয়া রহিল।

নলিনী তাহার স্মুখে কখনও মাথায় কাপড় দিত না— আজও দেয় নাই। সে তার কালো চুলগুলিকে এলাইয়া দিয়াছে,—কতক চুল তার পিঠে, কতক বৃকের উপরে, কতক-বা কাধের উপরে আসিয়া ঘুমন্ত সাপের মত এলাইয়া আছে। পরণে তার থান-কাপড়,—সেই শ্বেতবস্ত্রে তাহার সৌন্দর্যের দীপ্তি ও পবিত্রতা যেন আরও উজ্জ্বল হইয়া উঠিয়াছিল!

বিলাত যাইবার আগে অমিয় যখন নলিনীকে দেখিয়া গিয়াছিল, তখন তাহার বয়স কৈশোর ও যৌবনের মাঝামাঝি; কিন্তু ভরা যৌবন আসিয়া নলিনীর সেই ফুটন্ত দেহলতাকে এখন অপূর্ণ শ্রী-ছাদে বসন্তের নবীন মালঞ্চের মত পূরন্ত ও সুন্দর করিয়া তুলিয়াছে। নলিনীর সুডৌল নাসিকার ছায়ায় অধরের উপরে শিশির-বিন্দুর মত ঐ যে ঢল্-ঢলে ঘামের ফোঁটাগুলি, ডানদিকের ফুলের মত রাঙ্গা নধর কপোলে ঐ যে একটি ছোট কালো তিল,—ও-গুলি দেখিলে মনের ভিতর দিয়া যেন কিসের একটা প্রাণ-পাগল-করা ঝড় বহিয়া যায়!

নলিনী অত মনোযোগ দিয়া অবাক হইয়া কি দেখিতেছে? অমিয় একটু ঝুঁকিয়া পড়িয়া দেখিয়া লইল। ছবিখানি

সে আগেই দেখিয়াছিল ; সুতরাং নলিনীর এই মনোযোগের কারণ বুঝিতে তাহার দেরি হইল না ।

সে বলিল, “বাস্তবিক নলিনি, আমাদের দেশে বিধবাদের যে দুঃখ, তা ভাবলেও প্রাণ কেঁদে ওঠে ।”

নলিনী লজ্জিতভাবে তাড়াতাড়ি মাসিক-পত্রখানা মুড়িয়া বলিল, “ভগবানের দণ্ড যারা মাথা পেতে নিতে জানে না, তাদের দুঃখ কে ঘোচাবে বলুন ? পৃথিবীর দুঃখকে সহ্য করতে পারা, তাকে অস্বীকার করতে পারা, যে একটা মহা গৌরবের কাজ, এ কথা কি আপনি মানেন না অমিয়বাবু ?”

অমিয় নলিনীর মুখ হইতে একরূপ উত্তরের প্রত্যাশা করে নাহি । সে খানিক চুপ করিয়া রহিল ; তারপর বলিল, “কিন্তু ততটা মনের জোর, ততটা সহ্য করবার শক্তি এই দুর্বল পৃথিবীতে ক-জনের আছে ?”

নলিনী, মুখ না তুলিয়াই তেমনিভাবে বলিল, “হ্যাঁ, যারা সহ্য করতে পারে না, যারা মনুষ্যকে কলঙ্কিত করতে পারে, তাদের জন্তু সমাজ একটা উপায় স্থির করুক ।”

“কি উপায়, বল ।”

“ধরুন, বিধবা-বিবাহ ।”

“এতে তোমার মত আছে ?”

“আমার মত নেই ; কারণ, মানুষের এমন শোচনীয়

## মধুপর্ক

অবস্থা, আত্মার এমন অধঃপতন আমি কল্পনাও করতে পারি না ; তবে এইটুকু বলতে পারি যে, যারা দুঃখ বলে' স্বীকার করে না, যারা বৈধব্যকে অত বলে, পূর্বজন্মের পাপের প্রায়-শ্চিত্ত বলে' গ্রহণ করে, তাদের যিনি বিবাহ দিতে চান, তিনি মহা অধর্ম করেন। আপনিও কি তাই বলেন না, অমিয়বাবু ?”

অমিয় সোজাশুঁড়ি কোন জবাব না দিয়া বলিল, “দেখ, বিধবাদের বিবাহ দিলে, দেশ থেকে অনেক গুণ্ডু পাপের বীজ নষ্ট হয়ে যায়।”

নলিনী মুখ রক্তবর্ণ করিয়া বলিল, “দেখুন অমিয়বাবু, কম পাওয়া যায় বলেই অগতে ভাল জিনিষের আদর বেশী। সবাই সীতা-সাবিত্রী হলে, কবিরা আর বিশেষ করে সীতা-সাবিত্রীর কাহিনী রচনা করতেন না। বিধবাদের ভিতরেও হয় ত সকলে মনের মধ্য থেকে বল পান না, হয় ত কারুর কারুর পদস্থলন হয়, হয় ত এমনই দুর্বলা বিধবার সংখ্যাই বেশী দেখা যায়। আমার ত মনে হয়, প্রকৃত বিধবার দেবীত্বও এইখানে ; কিন্তু আদর্শ বিধবা অল্প বলে, আপনি সকলকার উপরে এক আইন জারি করে আদর্শের অপমান করতে পারেন না। কেমন, পারেন কি ?”

অমিয় মৃদুস্বরে বলিল, “না, তা পারি না।”

নলিনী বলিল, “আদর্শ বিধবা দুঃখকে দুঃখ বলে স্বীকার

## বিধবা

করেন না ! আপনারা যাকে দুঃখ বলে মনে করুচেন, বিধবা হয় ত তাকে ব্রত বলে, কর্তব্য বলে, অগ্নি-পরীক্ষা বলে হাসিমুখে সব সহ করে থাকেন । আপনি বলবেন, এ-রকম দুঃখ-কষ্ট সওয়া মানুষের পক্ষে স্বাভাবিক নয় । আমি বলি, স্বাভাবিক নয়, তাই বিধবার গৌরব । ইন্দ্রিয়-সংযম করে লোকে যে সন্ন্যাস-ব্রত নেয়, বৈধব্য-ব্রতের চেয়ে তাতে কি কম কঠোরতা ? নিশ্চয়ই নয় । বিধবাদের বৈধব্য-ব্রত পালন করুতে হয় বলে আপনাদের যখন কান্না পায়, তখন সন্ন্যাস-ব্রতের বেলায় আপনারা বিদ্রোহিতা করেন না কেন ? আমি ত বলি, সন্ন্যাসব্রতকে যারা সন্মানের চোখে দেখেন, বৈধব্য-ব্রতকে ও তাঁহাদের সেইভাবে দেখা উচিত ।”

অমিয় বলিল, “এইখানে তুমি মস্ত ভুল করুচ নলিনী! মানুষ সন্ন্যাস-ব্রত নেয়—স্বৈচ্ছায় আর অসহায়া রমণীর উপরে বৈধব্য-ব্রত এনে পড়ে—বজ্রাঘাতের মত—তার অনিচ্ছাকে অগ্রাহ করে । যাতে ইচ্ছা নেই, তাকে কি সহ করা চলে ?”

নলিনী বলিল, “কেন চলবে না ? গোড়া থেকে আমরা যদি তেমন শিক্ষা পাই, এই দুঃখের পৃথিবীতে সকল রকম দুঃখের জন্ম সর্বদাই যদি আমরা প্রস্তুত থাকতে পারি, সর্বত্রই আমরা যদি ভগবানের মঙ্গল হস্ত, কর্মফলের পরিণাম দেখতে পারি, তা হলে আর দুঃখ কি দুঃখ কোথায় ? যারা এমন

## মধুপর্ক

শিক্ষা পায়নি, সংসারে ইন্দ্রিয়ই যাদের কাছে বড়; তারা আপনাদের বিধানমত চলতে চায়, চলুক অমিয়বাবু! কিন্তু এক কাঠগড়ায় সকলকে পূরে বিধবার অপমান করবেন না, করবেন না।”

নলিনী, অত্যন্ত উত্তেজিত হইয়া এতক্ষণ পরে মাথা তুলিয়া অমিয়ের দিকে চাহিল; দেখিল, অমিয়ের নিম্পলক মুগ্ধনেত্র তাহার মুখের উপরে চিত্রের মত স্থির হইয়া অদৃশ্য। সে দৃষ্টিতে নলিনী তর্কের কোন ভাব পাইল না—বাহা পাইল, তাহাতে সে চকিত, ভীত ও স্তব্ধ হইয়া গেল;—আর, একি! দাদা কোথায়?

রমেশ তাহাকে এখানে একেলা রাখিয়া চলিয়া গিয়াছে, অর্থাৎ সে এতক্ষণ ধরিয়া অমিয়বাবুর সঙ্গে নিজে বিধবা হইয়া ও বিধবা-বিবাহ লইয়া তর্ক করিতেছে! নলিনী বুঝিল, রমেশের চলিয়া যাওয়ার কোন গুঢ় অর্থ আছে। কি অর্থ? নলিনী একেবারে বোবা হইয়া আবার মাথা হেঁট করিয়া বাসিয়া রহিল।

কেহ কোন কথা কাঁহল না,—এমনই অনেকক্ষণ গেল। অমিয় একদৃষ্টিতে তাকাইয়া দেখিতে লাগিল, তর্কের তাপে নলিনীর কপোলে যে গোলাপী আভা ফুটিয়া উঠিয়াছিল, এখন কেমন করিয়া সে রংটুকু অল্পে অল্পে মিলাইয়া যাইতেছে!



নলিনী বলিল, “আমি এখন আসি অমিয়বাবু!”

অমিয় একটু দুঃখিতভাবে বলিল, “তোমার দাদা চলে গেছেন বলে, তোমার ও পলাবার কোন দরকার নেই। আমি নরমাংসপ্রিয় রাক্ষস নই, মানুষকে ভক্ষণ করা আমার অভ্যাস নয়।”

নলিনী উঠিতে-উঠিতে অপ্রস্তুত হইয়া আবার বসিয়া পড়িল।

একটু ইতস্ততঃ করিয়া অমিয় বলিল, “নলিনি, ভাল করে শোন, তোমার সঙ্গে একটা কথা আছে।”

কথা! এই কথাটার ভয়েই নলিনী যে এখন হইতে পলাইয়া বাঁচিতে চায়! সে কোন জবাব দিল না, চেয়ারের উপরে জড়-সড় হইয়া বসিয়া বসিয়া ~~ঘাসিত~~ লাগিল।

চেয়ারখানা সরাইয়া নলিনীর আর একটু কাছে সরিয়া আসিয়া অমিয় বলিল, “তোমার পিতা, আমার সঙ্গে তোমার বিবাহ দিতে চান, একথা তুমি নিশ্চয়ই জান।”

নলিনী মুখ তুলিতে গিয়া পারিল না। সে কাপড়-চোপড়গুলো ভাল করিয়া গায়ের উপরে টানিয়া দিয়া আড়ষ্ট হইয়া রহিল।

অমিয় তাহার স্মুখে হেঁট হইয়া বলিল, “এ বিবাহে

## মধুপক

আমার দিক থেকে কোন আপত্তি নেই; কিন্তু বিবাহের আগে তোমার মত জানাটা দরকার মনে করি।

নলিনী মুছ, অস্পষ্ট, কম্পিতস্বরে থামিয়া থামিয়া বলিল, “কি জানতে চান?”—তাহার পর ঘন ঘন শ্বাস পড়িতে লাগিল।

অমিয় একবার চোখ তুলিয়া দেখিল, নলিনীর পাতলা পাতলা ননীর মত নরম ঠোঁট দুখানি নড়িয়া নড়িয়া উঠিতেছে আর ফাঁকে ফাঁকে কর্পূরের মত ধব-ধবে, মুক্তার মত সার-গাঁথা দাঁতগুলি দেখা যাইতেছে। সে মিনতিপূর্ণ কোমলস্বরে বলিল, “তুমি আমাকে বিবাহ করবে কি না, আমি তাই জানতে চাই নলিনি! মনে রেখ, তোমার একটি ‘না’ কি ‘হ্যাঁ’র উপরে আমার সমস্ত ভবিষ্যৎ, সমস্ত সুখ-দুঃখ, সমস্ত আশা-ভরসা নির্ভর কর্বে। চুপ্ করে থেক না—বল, বল, বল!”—অমিয় হঠাৎ আবেগ সামলাইতে না পারিয়া, দুই হাতে নলিনীর দুই হাত চাপিয়া ধরিল।

নলিনীর মুখ একেবারে মড়ার মত শাদা হইয়া গেল এবং প্রথমটা সে স্তম্ভিত হইয়া বসিয়া রহিল। তাহার বুক একবার উঠিতে ও একবার নামিতে লাগিল,—হৃদয়ের ভিতরে তার বন্দী-প্রাণ তখন যেন গভীর যন্ত্রণায় ছট্-ফট্ করিতেছিল! কিন্তু তাহার পরেই চকিতে আপনার হাত টানিয়া লইয়া উচ্চ, তীব্র ভৎসনার স্বরে নলিনী বলিল, “অমিয়বাবু!”

অমিয় মূঢ়ের মত চাহিয়া দেখিল, নলিনীর কুপিত নয়ন যেন বাজের মত আগুনভরা !

নলিনী দাঁড়াইয়া উঠিয়া ক্রকুটি করিয়া বলিল, “অমিয়বাবু ! জানেন, আমি বিধবা ! আপনি আমাকে অপমান করিতে সাহস করেন ?”

অপরাধীর মত মাথা নীচু করিয়া জড়িতস্বরে অমিয় বলিল, “আমাকে মাপ কর নলিনি ! আমি তোমাকে অপমান করিতে যাই নি ।”

নলিনী নীরবে দ্বারের দিকে অগ্রসর হইল ।

অমিয় সঙ্কাতরে বলিল, “যেওনা নলিনি ! আমার কথার একটা উত্তরও দিবে যাও ।”

“আপনি আমার গায়ে হাত দিবে উত্তর চান ! আপনার যা জিজ্ঞাসা করবার আছে, বাবাকে জিজ্ঞাসা করবেন— আমাকে নয় !”

না দাঁড়াইয়া, পিছনপানে না তাকাইয়া, এই কথা বলিতে বলিতে নলিনী রাজ্জী-মহিমায় বিদ্যুতের মত ঘর হইতে বাহির হইয়া গেল ।

### সেকেলে ঠাকুরমা

সাঁঝের সময়ে ঠাকুর-ঘরে সন্ধ্যা দিয়া, ঠাকুরমা দরজার চৌকাঠের পাশটিতে বসিয়া হরিনামের মালা ফিরাইতে ছিলেন ।

## মধুপর্ক

নলিনী আসিয়া ধরা দিয়া পড়িল, “ঠাকুরমা, আজ একবার তোমার দিদিমার সহমরণের গল্প বল।”

হরিনামের ঝুলিটি তিনবার কপালে ছুঁয়াইয়া ঠাকুরমা বলিলেন, “যে পাপ সংসারে এসে পড়েচি, এখানে সে সব পুণ্যের কথা বলতে আমার মন সরে না বাছা!”

নলিনী ঠাকুরমার পায়ে হাত বুলাইয়া দিতে দিতে বলিল, “যেখানে পাপ, সেইখানেই ত পুণ্যের কথা বলতে হয় ঠাকুরমা!”

ঠাকুরমা ম্লান হাসি হাসিয়া বলিলেন, “তবে শোন বাছা!”

হরিনামের ঝুলিটি দেয়ালে একটি পেরেকে টাঙ্গাইয়া রাখিয়া ঠাকুরমা আরম্ভ করিলেন, “দাদাবাবু যখন বিদেশে যারা পড়েন, আমরা তখন জন্মাই নি। যারা যাবার আগে দাদাবাবু, দিদিমাকে আনুবার জন্তে ছেলেকে দেশে পাঠিয়ে দিয়েছিলেন। এদিকে রাতে কু-স্বপন দেখে দিদিমা মারা সকালটা কারুর সঙ্গে কথা-বার্তা কন নি। ছেলে যখন কাঁদো-কাঁদো মুখে এসে তাঁর সঙ্গে দেখা করলে, তখন কিছু বলবার আগেই দিদিমা বললেন, ‘বুঝেচি বাবা, আমার পোড়াকপাল পুড়েচে। চল, এখনি আমি তোমার সঙ্গে যাব।’—ছেলের সঙ্গে দিদিমা দাদাবাবুর কাছে গিয়ে দেখেন, সব শেষ। দেখে তিনি

## বিধবা

কাঁদলেনও না, একফোঁটা চোখের জলও ফেললেন না। খালি বললেন, তোমরা সব যোগাড় যন্ত্র কর, আমি সহমরণে যাব।' তাই শুনে, সেখানে আত্মীয় স্বজন যারা যারা ছিলেন, সবাই মিলে দিদিমাকে হাতে-পায়ে ধরে মানা করতে' লাগল। দিদিমা প্রথমে কারুর কোন কথায় জবাব দিলেন না। শেষটা বিরক হয়ে বললেন, 'তোমরা আর আমায় জ্বালায় উপরে জ্বাল দিও না। আমি ওঁর সঙ্গে না গেলে, স্বর্গে গিয়েও উনি শান্তি পাবেন না।'—এ-কথার ওপরে কেউ আর কোন কথা কইতে পারলে না। দিদিমা নতুন লালপেড়ে-শাড়ী পরলেন, এক-গা গয়না পরলেন, ভাল করে মাথায় জল-জলে সিঁদুর, পায়ে টুক-টুকে আলতা পরলেন; স্বামীর সঙ্গে স্বর্গে যাবেন, মুখে হাসি আর ধরে না! চারিদিকে হৈ-চৈ পড়ে গেল, রাজ্যের যে যেখানে ছিল, সবাই শ্মশানের ওপরে ভেঙ্গে পড়ে দো-সারি কাতার দিয়ে দাঁড়াল, সবাই ধ্বি-ধ্বি করতে লাগল; কেউ এসে পায়ে ধুলো নেয়, এয়োরা এসে দিদিমার মাথার সিঁদুর চেয়ে নেয়, তুলিরা ঢাক-ঢোল বাজাতে শুরু করলে, চন্নন-কাঠের চিতায় ঘড়া ঘড়া ঘি ঢালা হ'ল, ধূপ-ধূনো জ্বলে দেওয়া হ'ল,—আহা, কে বলবে সে শ্মশান, যেন রাজ-অট্টালিকা! দিদিমার মুখে কথা নেই, কিন্তু হাসি আছে,—হাসতে হাসতেই তিনি শ্মশানে এসেছিলেন, হাসতে হাসতেই

## মধুপর্ক

চিতায় গিয়ে উঠলেন, হাস্তে হাস্তেই স্বামীর পায়ে প্রণাম করে', তাঁর পাশে গিয়ে শুলেন। ধূ-ধূ করে আগুন জ্বলে' উঠল —কিন্তু দিদিমা একটুও নড়লেন না, একটুও শব্দ করলেন না —তিনি সতীত্বের ছোরে ডঙ্কা মেরে হাস্তে-হাস্তেই স্বর্গে স্বামীর সেবা করতে চলে গেলেন। চারিদিক থেকে এযোরা সব প্রণাম করে বলতে লাগল, 'এমন মরণ যেন জন্মে জন্মে মরি' !"

বলিতে বলিতে চোখের জলে ঠাকুরমার বুক ভাসিয়া যাইতে লাগিল,—সেই পবিত্র, স্বর্গীয় দৃশ্য তাঁহার চোখের সামনে যেন উদ্ভাসিত হইয়া উঠিল, সন্ধ্যার আধ-অন্ধকার আকাশের দিকে চাহিয়া বহুক্ষণ নীরবে বসিয়া বসিয়া তিনি যেন-তাহাই দেখিতে লাগিলেন ! অবশেষে হঠাৎ তিনি নলিনীর দুই হাত চাপিয়া ধরিয়া আবার বলিলেন, "কি বংশের রক্ত তোর গায়ে আছে, একবার ভেবে দেখ, দেখি বাছা ! তোর কি হবে নলি, তোর কি হবে !

নলিনীও কাতরস্বরে ঠাকুরমার কথার প্রতিধ্বনির মত বলিল, "আমার কি হবে ঠাকুরমা, আমার কি হবে !"

ঠাকুরমা দুঃখের সহিত বলিলেন, "তুই ত এ-বাড়ীর মত নস্ নলি ! তবে বিধাতাপুরুষ তোর কপালে এমন কণ্ঠকের কালি মাখিয়ে দিচ্ছেন কেন ?"

নলিনী সবেগে মাথা নাড়িয়া কহিল, “না ঠাকুরমা, না ! কলঙ্কের কালি’ যে মাথে সে মাথুক, আমি মাথুব না—কখখনো না, কখখনো না !”

ঠাকুরমা নলিনীর চোখের উপরে স্থির দৃষ্টিপাত করিয়া বলিলেন, “তাই হোক বাছা, তাই হোক ! দেখ মা নলি, তুই আমার বুকের নিধি—দেবতা ছাড়া তোর মত আর কাউকে আমি এত ভালবাসি না ; তোর পায়ে কাঁটা ফুটলে মনে হয়, সে আমার প্রাণে বিঁধল ! কিন্তু আজ যদি তুই মরে’ যাস, তা হলে আমার মত সখী আর কেউ হয় না, আর কেউ হয় না !”

নলিনী ঠাকুরমার বুকের ভিতরে মুখ লুকাইয়া, দুই হাতে তাহার গলা জড়াইয়া ধরিয়া ফুঁপাইতে ফুঁপাইতে বলিল, “সত্যি ঠাকুরমা, আমি যদি মরি, তুমি তা হলে কাঁদ না—তুমি হাস ?”

ঠাকুরমা নলিনীর গালে স্নেহে চুমা খাইয়া অশ্রুসিক্ত কণ্ঠে বলিলেন, “হ্যাঁ মা, কলঙ্কের চেয়ে বিধবার মৃত্যু ভাল !”

### নলিনী ঘুমাইতে গেল

ঘরের দেওয়ালে তাহার স্বামীর একখানি ‘ফটো’ টাঙ্গান আছে, নলিনী অপলক উর্দ্ধনেত্রে সেই চিত্রের দিকে তাকাইয়া, দাঁড়াইয়াছিল । ছবির মূর্তির মুখে সেই সরল, মধুর হাসি,—যে হাসি দেখিয়া একদিন সে বিশ্বের সমস্ত ভুলিয়া যাইত ।

## মধুপর্ক

নলিনী ছবিখানি দেওয়াল হইতে নামাইয়া 'প্রাণপণে আপন বুকের উপরে চাপিয়া ধরিল,—এত জোরে যে—কাঁচখানা 'ফ্রেম' হইতে ভাঙ্গিয়া টুকরা টুকরা হইয়া ঘরের মেঝেতে ছড়াইয়া পড়িল ; কিন্তু সেদিকে নলিনী লক্ষ্যপও করিল না,—দুই চক্ষু বুজিয়া গভীর শান্তিতে যেন সে অনেকদিন পরে আবার হারিয়ে-যাওয়া দুখানি বাহুর নিবিড় আলিঙ্গনের ফিরিয়ে পাওয়া স্পর্শ স্মৃতি অনুভব করিতে লাগিল ।

নলিনীর মনে পড়িল, বিবাহের কিছুদিন পরে স্বামীর সঙ্গে একদিন তার তর্ক বাধিয়াছিল যে, আগে কে মরিবে ?

তাহার স্বামী বলিয়াছিলেন, "দেখ, তোমার আগে আমি যাব, আমাকে তুমি ফাঁকি দিতে পারবে না ।"

নলিনী, স্বামীর কোলে মাথা রাখিয়া জোরের সহিত বলিয়াছিল, "আমি যদি সতী হই, তবে আমি তোমাকে রেখে যাবই-যাব ।"

তার সে জোর আজ কোথায় ? যে সতীত্বের বড়াই সে করিয়াছিল, আজ যে তাতেও কলঙ্কের ছাপ্ পড়িবার যোগ হইয়াছে ! তিনি যখন গিয়াছেন, শূন্য প্রাণের মায়া তখনও সে ছাড়িতে পারে নাই ; আর আজ, কলঙ্কের আশঙ্কার ভিতরেও সে এই অন্ধকার, নিঃসঙ্গ জীবনকে এখনও অঁকুড়াইয়া ধরিয়া রাখিয়া আছে,—হা রে ছার মায়া !



## বিধবা

নিরুৎসাহ রাত্রে ঘরের চির-জাগন্ত ঘড়ীটা অশ্রান্তভাবে আওয়াজ করিতেছিল,—টিক্, টিক্, টিক্। নলিনীর বোধ হইল, ঘড়ী যেন টিট্কারি দিয়া তাহাকে বলিতেছে,—ধিক্, ধিক্, ধিক্ !

আশ্বে আশ্বে সে বাক্সটা খুলিল। ভিতরে লাল রেশমী সূতা-বাঁধা একতাড়া কাগজ,—সেগুলি তার স্বামীর চিঠি ! নলিনী বাঁধন খুলিয়া এক একখানি করিয়া চিঠিগুলি পড়িতে লাগিল,—আর সঙ্গে সঙ্গে অতীত যেন জীবন্ত হইয়া তাহার প্রাণের লুকানো ঘরটি ভরিয়া তুলিল। এই চিঠিগুলির প্রত্যেক খানি কত আশার, কত অপেক্ষার, কত পথ চাওয়ার পর ডাক-পিয়নের 'বাগ' হইতে তাহার হাতে আসিয়া পড়িত ! এগুলি পড়িতে পড়িতে প্রেমের মোহাগে কতদিন সে না কাঁদিয়া থাকিতে পারিত না,—কোন কোন চিঠির হরফে এখনও সেই শুষ্ক অশ্রুর দাগ লাগিয়া রহিয়াছে। পত্রপাঠ করিতে করিতে অশ্রুজলে আজও তাহার চোখ ছাপিয়া উঠিল ;—কিন্তু সে ছিল আনন্দের অশ্রু ; আর এষে আজ নিরানন্দের নয়ন-ধারা !

নলিনী ঘরের সামনের বারান্দায় গিয়া দাঁড়াইল।

উপরে ঘুমন্ত নীলিমা—স্বমুখে চঞ্চল গঙ্গা। আকাশ উপ-ছাইয়া চাঁদের আলো ; পৃথিবীতে ঝরিয়া যেন মৌন গীতিময়ী

## মধুপর্ক

স্বপ্নপুরী রচনা করিতেছে ; গঙ্গাজলে তরঙ্গদল দীপালি-উৎসবে  
মত্ত হইয়া কলহাস্তে নৃত্য করিয়া তীরে তীরে টলিয়া  
পড়িতেছে !

দূরের কোন্ নৌকা হইতে দখিনা বাতাস এক মেঠো  
স্বর বহিয়া আনিল—

“যা রে কোকিলা তুই

আমার প্রাণপতি গেছে যে দেশে,—

শুনে তোর কুহস্বর

উষ্কে ওঠে পরাণ আমার,

প্রাণপতি মোর গেছে গাঙ্গের পার—

( ও তুই ) ছাড়্গে তথা কুহস্বর—”

কিন্তু, পোড়া কোকিল তবু খামিল না ; কোথায়  
লুকাইয়া সে অবোধ আপন মনে যেমন ডাকিতেছিল, তেমনই  
ডাকিতে লাগিল, কুহ কুহ কুহ ।

আর একদিন এমনই কোকিল ডাকিয়াছিল । নলিনীর  
প্রাণ-পটে স্মৃতি কবেকার এক ছবি আঁকিয়া দিল । এমনই  
এক পূর্ণিমার রাতে, এমনই দলমলে জ্যোৎস্নায়, এমনই বাল্-  
মলে গঙ্গাজলে স্নানীর সঙ্গে বোটে করিয়া, তীর ছাড়িয়া সে  
কতদূর চলিয়া গিয়াছিল । তাঁহার কোলে মাথা রাখিয়া, নলিনী  
চাঁদকে দেখিতে দেখিতে, চেউএর হাসি, হাওয়ার গান শুনিতে

শুনতে ঘুমাইয়া পড়িয়াছিল—তারপর স্বামীর আদর-ভরা চুম্বনে  
আবার সে জাগিয়া উঠিয়াছিল।

নলিনী আজ আবার ঘুমাইবে। ইঁ, মনকে শক্ত করিয়া  
অনেকক্ষণ থেকে সে প্রস্তুত হইয়া আছে। আর দেরি নয়।

স্বামীর ছবি বুকে চাপিয়া, নলিনী পা টিপিয়া টিপিয়া অতি  
সন্তর্পণে নীচে নামিয়া গেল।

এই ত গঙ্গার ঘাট! কোনদিকে কোন সাড়া শব্দ নাই—  
সুধু গঙ্গাজলে মৃদু মৃদু ঢেউএর বীণায় রহিয়া রহিয়া জ্যোৎস্না-  
রাগিনী বাড়িয়া উঠিতেছে।

রাত্রি ঘেন শুক হইয়া নেত্রহীন নেত্র :মেলিয়া নলিনীর  
দিকে দৃষ্টিপাত করিয়া আছে!

নলিনী ঘাটের সোপান দিয়া নামিতে লাগিল,—ধীরে,  
ধীরে, ধীরে। মৃত্যু ঘুমে তাহার আত্মা আচ্ছন্ন হইয়া আসিল।  
এই নিরানন্দ জগতে, এই ফুট-ফুটে চাঁদের আলোকে, এই  
সঙ্গীতময়ী রজনীতে স্বামীর ছবি বুকে করিয়া এবার ঘুমাইবে,  
সে ঘুমাইবে!

## ডাকাত

ক

পাশের বাড়ীতে বিয়ে ; কিন্তু গয়না সব শ্রাক্‌রার বাড়ীতে—গয়না নহিলে মেয়েদের নেমস্তন্ন রাখা হইবে না। গয়নাগুলো রং করিতে দেওয়া হইয়াছে—ভূকুম পাইলাম, সেগুলো যেমন করিয়া হোক আজকেই ফিরাইয়া আনা চাই-ই-চাই !

শ্রাক্‌রার দোকানে হাজির হইয়া গয়নাগুলো চাহিলাম। সে হাতযোড় করিয়া বলিল, “বসুন বাবু, অ্যাদ্‌র থেকে এলেন, একটু তামুক ইচ্ছে করুন।”

আমি হচ্ছি শ্রাক্‌রার একজন মস্ত খদ্দের। বুঝিলাম, সে আমাকে কিঞ্চিৎ আপ্যায়িত না করিয়া অমনি-অমনি ছাড়িবে না। অতএব, বসিলাম।

শ্রাক্‌রার দোকানগুলিকে অনায়াসে সরকারি বৈঠকখানা বলিতে পারা যায়। তামাকের ধোঁয়ার সঙ্গে এখানে সকালে-বিকালে পাড়ার যত সত্যমিথ্যা গুজব, নিন্দা, কুৎসা ও ঘোঁট পাকাইয়া উঠিতে থাকে।

## ডাকাত

তামাকের মিঠে-কড়া ধোঁয়ায় বেড়ে মসৃণল হইয়া উঠিয়াছি, এমন সময় একটা আধবুড়ো লোক হাঁপাইতে হাঁপাইতে দোকানে ঢুকিয়া বলিল, “ওহে শুনেছ !”

শ্রাকুরা বলিল, “কি ?”

নেশার আরামে তখন আমার চোখছুটি স্থিমিত হইয়া আসিয়াছে। ধূম্রকুণ্ডলীর ফাঁক দিয়া সেই অবস্থায় দেখিলাম, আগন্তকের মুখ-চোখ গল্প বলিবার আগ্রহে ও উৎসাহে প্রদীপ্ত হইয়া উঠিয়াছে। খবরটা নিশ্চয় যে-সে খবর নয়—শুনিবার জন্ত কান খাড়া করিয়া রহিলাম।

“মুখুযোদের বাড়ীতে মস্ত ডাকাতি হয়ে গেছে যে !”

—“কখন মশাই, কখন ?”

—“এইমাত্র। পাড়ায় থাকো—পাড়ার কোন খবর রাখ না—কি-রকম লোক হে !”

—“এঁজ্ঞে, একটা গোলমাল শুন্ছিলুম বটে। কিন্তু নিজেদের দোকান ফেলে ত আর পরের বাড়ীর ডাকাতি দেখতে যেতে পারি না মশয়, আমার দোকান দেখে কে ?”

—“হঃ, দোকান দেখা ! চোখে-কানে এরা দেখতে-শুনতে দিচ্ছেনা হে বাপু—এরা সেই হাওয়া-গাড়ীর বাবু-ডাকাত, হাতে এদের ইয়া ইয়া পিস্তল ! লোকের নাড়ী-নক্ষত্রের খবর রাখে ! এই ছাথনা, মুখুযোদের জমিদারী থেকে

## মধুপর্ক

আজ অনেক টাকা এসেছিল, এরা ঠিক সে সন্ধান পেয়ে দেউ-  
ড়ীতে এসে হাজির ! পিস্তলের একটি আওয়াজ শুনেই যত  
সব পাঁড়ে-দোবে-চোবের দল রাখা-কিষণকে টিকির মধ্যে  
লুকিয়ে ভোঁ-দৌড়, ডাকাতদের চেহারা দেখেই মুখুঘো-মশাই  
ভিঝমি খেয়ে চিৎপটাং, ডাকাত-বাবুরা সোজা এসে বুক ফুলিয়ে  
সোজাই চলে গেল, যাবার সময় সঙ্গে নিয়ে গেল জমিদারীর  
সমস্ত টাকার তোড়া, মেয়েদের সমস্ত গয়না !”

—“আঁা—বলেন কি, বলেন কি ! তারপর ?”

—“তারপর—কাল শুনো সব । খবরটা টাটকা থাকতে  
থাকতে সবাইকে আগে শুনিয়ে আসি”—লোকটা যেমন হঠাৎ  
আবিভূত হইয়াছিল, তেমনি হঠাৎ অন্তর্হিত হইল ।

এতক্ষণে আমার স্তমিত নেত্র আশ্চর্যরূপে বিস্ফারিত  
হইয়া উঠিয়াছে ।

শ্রাকরা আমার পানে ফিরিয়া বলিল, “মশয়, শুনলেন !”

“হঁ ।”—বলিয়া হঁকায় একটি স্থখ-টান্ মারিতে গিয়া  
দেখিলাম, বহুক্ষণ চুম্বন-অভাবে অভিমানিনী হুকাসুন্দরীর প্রেম-  
বহ্নি নিবিয়া গিয়াছে । হুকাটি শ্রাকরার হাতে দিয়া বলিলাম,  
“তাইত, এখন উপায় ?”

শ্রাকরা দোকানে কুলুপ লাগাইতে লাগাইতে বলিল,  
“আমি ত মশয়, বাসায় চল্লুম !”

—“তাঁত দেখতেই পাচ্ছি। কিন্তু আমি কি করব ? সঙ্গে এতগুলো গয়না, যেতে ও হবে অনেকটা।”

—“আসি মশায়, নমস্কার !”—আমার কথার কোন জবাব না দিয়া, স্নাকুরার পো ভয়ে ভয়ে চারিদিকে চাহিতে চাহিতে চটপট চম্পট দিল।

খানিকক্ষণ হতভম্ব হইয়া বসিয়া রহিলাম। শীতের রাত্রি : কুয়াশা আর অন্ধকারে চারিদিক ঝাপসা।

খ

গয়নাগুলো পেট-কাপড়ে বাঁধিয়া, উঠিলাম। এদিকে ওদিকে চাহিয়া—লোকজন বড় নজরে ঠেকিল না—ডাকাতের ভয়ে যে যার বাড়ীতে ঢুকিয়া দরজার খিল আঁটিয়াছে।

বলির পাঠার মত কাঁপিতে কাঁপিতে প্রাণটি হস্তগত করিয়া পথ চলিতে লাগিলাম ! আমার বাড়ী শ্যামবাজার, এখান থেকে দেড় মাইলেরও বেশী। প্রত্যেক গলি-ঘুঁজির মুখ দিয়া যাই, আর বুকটা দুদ্দুড়্ করিয়া উঠে ! মনে হয়, ঐ অন্ধকারে, আনাচে কানাচে নিশ্চয়ই কোন একটা বদখত্ চেহারা পিস্তল বাগাইয়া লুকাইয়া আছে—দিল বুঝি মাথার খুলি উড়াইয়া ! সেই লোকটার কথা মনে হইল, ‘এরা লোকের নাড়ী-নক্ষত্রের খবর রাখে !’—ও বাবা, আমার কাছে গয়না আছে এরা কি সেটা টের পাইয়াছে ? তা আর পায় নাই—

## মধুপর্ক

যার যা কাজ ! এ-সব খবর না রাখিলে কি এদের ব্যবসা চলে ? চারিদিকেই এদের চর ঘুরিতেছে—তাদের চোখে ধূলা দেওয়া সহজ নয়। যে লোকটা ডাকাতির খবর দিয়া গেল সেই যে চর নয় তাই-বা কে বলিতে পারে ! তারপর হঠাৎ মনে পড়িল, স্মাকুরার কাছ থেকে গয়নাগুলো লইয়া আমি যখন কাপড়ে বাঁধিতেছিলাম, তখন রাস্তা দিয়া একটা চোয়াড়ে চেহারার লোক কটমট করিয়া আমার দিকে চাহিতে চাহিতে গিয়াছিল। নিশ্চয় সে ডাকাতির চর ! এতক্ষণ সে তার দলকে কি আর খবর দেয়-নি যে, আমার কাছে একরাশ গয়না আছে !

রাস্তায় মাঝে মাঝে লোকজন চলিতেছে, তাদের সকলকেই ডাকাত বলিয়া সন্দেহ হইতে লাগিল। দুপা যাই—আর চমকিয়া উঠি। হঠাৎ দেখি, একখানা মোটর-গাড়ী দুই চোখে অগ্নিবর্ষণ করিতে করিতে আমার দিকেই ছুটিয়া আসিতেছে। গাড়ীতে অনেকগুলো লোক ! যতক্ষণ না গাড়ীখানা আমাকে পার হইয়া চলিয়া গেল, ততক্ষণ আমি একটা বাড়ীর রোয়াকে উঠিয়া গা ঢাকা দিয়া দুক-দুক প্রাণে দাঁড়াইয়া রহিলাম।

বড় রাস্তায় আসিয়া প্রাণটা তবু কতকটা ধাতস্থ হইল। এখানে এত ভিড়, পুলিশের এমন কড়া পাহারা,—ডাকাতির



দল এ রকম জায়গায় নিশ্চয়ই কাকুর গুলা টিপিয়া ধরিতে পারিবে না !

শ্রামবাজারের দিকে যতই আগাইতেছি, রাস্তার ভিড় ততই পাতলা হইয়া আসিতেছে—আর আমার ভয় ততই চরমে উঠিতেছে। তবে, ভরসা এই যে, আর মিনিটদশেক মা-কালীর ইচ্ছায় ভালয় ভালয় কাটিয়া গেলেই বাড়ী পৌঁছিতে পারিব।

ইঠাৎ আমাদের পড়শী রামবাবুর সঙ্গে দেখা। আমাকে দেখিয়া বলিলেন, “এত তাড়াতাড়ি কোড়ে কাকের মত কোথেকে হে ?”

—“আকুরার বাড়ীতে গিয়েছিলুম রাম দা !”

—“কেন ?”

চুপি চুপি বলিলাম, “গয়না আন্তে।”

—“দিন-কাল ভাল নয়—খুব সাবধান।”

—বলিয়া, তিনি যেদিকে যাইতেছিলেন, সেইদিকেই চলিয়া গেলেন।

খানিক আগাইয়া একবার পিছনে ফিরিলাম। কিছু তফাতে আর একজন লোক! একটু তাড়াতাড়ি পা চালাইয়া দিলাম।

## মধুপর্ক

গ

রাত্রিকালে শ্যামবাজারের রাস্তায় একেই লোকজন কম চলে, তাহাতে এখন আবার শীতকাল। চারিদিক নিসাড়। আমার পায়ের জুতা ঠুকিয়া 'ফুটপাথে' বেজায় খটখট শব্দ হইতেছিল। কিন্তু, সেই সঙ্গে, পিছনে আর একজনেরও পায়ের শব্দ পাইতে লাগিলাম। আবার ফিরিয়া দেখি, সেই লোকটা তখনও আমার পিছনে পিছনে আসিতেছে। গ্যাসের আলোয় যতটা বোঝা গেল,—লোকটা খুব চেঙ্গা, মোটামোটা ষণ্ডা, একরকম গুণ্ডা বলিলেই হয়। তার হাতেও একগাছা ছড়ি,—না, তাকে শীর্ণ সংস্করণের বংশযষ্টি বলাই যুক্তিসঙ্গত— কেননা, সে রকম লাঠি হাতে থাকিলে কোঁচানো কোঁচা ঝোলানো এবং অভাগার মাথা ফাটানো—এই দ্বিবিধ কাৰ্য্যই সূচাক্রমে নির্বাহিত হইতে পারে।

এ ডাকাত টাকাত নয় ত—আমার পিছু নেয় নাই ত ? পরখ করিবার জন্য একটা পানওয়ালার দোকানের সূমুখে গিয়া দাঁড়াইলাম। অকারণে এক পয়সার পান কিনিলাম। পিছনের লোকটাও রাস্তার উপরে দাঁড়াইয়া পড়িল। পান কিনিয়া আমি অগ্রসর হইলাম, সেও অমনি চলিতে শুরু করিল। আমি একটা গলির ভিতর ঢুকিলাম, সেও সঙ্গে সঙ্গে ঢুকিল।

না—কোন সন্দেহ নাই, এ আমারই পাছু লইয়াছে।

মনে হইল, 'স্বাক্ষর দোকানে আমার দিকে যে কটমট করিয়া চাহিয়া গিয়াছিল, এ নিশ্চয় সেই লোক না হইয়া আর যায় না ! আমার বাড়ী দেখিয়া গিয়া দলের লোককে খবর দিবে, তার-পর সকলে মিলিয়া আমার বাড়ী লুঠিয়া টাকা ও গয়না সব লইয়া যাইবে ।

আমার বুক টিপ্ টিপ্ করিতে লাগিল ;—এখন উপায় ? ইহাকে কিছুতেই আমার বাড়ী দেখানো হইবে না । সেখানে গিয়া যদি গুলি টুল চালায়, তাহা হইলে এক সঙ্গে ধনে প্রাণে মজিব এবং মরিব ।

চলিতে চলিতে ৩১২ ডানদিকের একটা সরু গলিতে ঢুকিয়া পড়িলাম । তারপর অপথ বিপথ কুপথ—এমন কি আঁস্তাকুড় মাড়াইয়াও, অন্ধকারে হাত্ড়াইতে হাত্ড়াইতে, হোঁচট খাইতে খাইতে, মাথা ঠুকিতে ঠুকিতে যেখানে গিয়া নাক ঘষিয়া গেল, সেখানে আমার মাথার চাইতেও উঁচু এক পাঁচিল ! সেখানে আলোও নাই—পথও নাই । তাইত, কি করি ? কোনদিকেই যে সুরাহা নাই ! যেদিকেই তাকাই, চোখে খালি সবুয়ে ফুল দেখি ! খানিক ভাবিয়া স্থির করিলাম, যা থাকে কপালে—পাঁচিল ত টপ্কাই, ওপারে হয়ত রাস্তা আছে ! নহিলে, যে পথে আসিয়াছি সে পথে আবার যদি ফিরি—নাঃ, ফেরার কথা ভাবিবামাত্র বুকটা ধড়াস্ করিয়া

## মধুপর্ক

উঠিল! আমি তার চোখে ধূলা দিবার ফিকিরে আছি দেখিয়া ডাকাত নিশ্চয়ই বেজায় খাপ্লা হইয়া আছে। বিঘোরে প্রাণ খোয়ানোর চেয়ে পাঁচিল টপ্‌কানো! ঢের ভাল অথচ সহজ।

দিলাম এক লাফ! তারপর ওপাশে নামিতে না নামিতে, যুগপৎ হৃদয় এবং শ্রবণ ভেদী চীৎকার আকাশ এবং পৃথিবী কম্পিত—প্রকম্পিত করিয়া ও আমাকে স্তম্ভিত করিয়া দিল—  
“ওরে বাবারে—চোর চোর, খুন করলে—খুন!”

সেই অহেতুক, অগ্ৰায় ও অভদ্র চীৎকার আমাকে একে-বারে পাথরের মত অচল করিয়া দিল বটে, কিন্তু, অচল হইলেও চলিতে হইবে—কি করি? ঐ যে তুম্‌দাম করিয়া জানালা দরজা খুলিয়া গেল না? ও বাবা, ওরা কারা—কেউ লাঠি হাতে, কেউ আলো হাতে, কেউ বাঁটি-হাতে—এ যে জলন্ত উলুন ছাড়িয়া ফুটন্ত তেলে আসিয়া পড়িলাম! আমার সংবন্ধনার জন্মই কি এই বিপুল আয়োজন? না মহাশয়গণ, আপনারা আমাকে ভুল বুঝিয়াছেন, এরূপ সশস্ত্র অভ্যর্থনায় আমি একে-বারেই অভ্যস্ত নই, অতএব—

—দিলাম আর এক লাফ,—যে পথে আসিয়াছি সেই পথে ফিরিতে!

কিন্তু লোকগুলো বিষম চালাক এবং চটপটে। আমি

নিরাপদ-ব্যবধানে যাইতে-না-যাইতেই আদের একজন খপ্-  
করিয়া আমার একখানা পা যত-জোরে পারে ধরিয়া ফেলিল।

আমি কিন্তু ততোধিক চালাক ! ইতুরের মত জাঁতিকলে  
পড়িয়াই আমার মাথা খুলিয়া গেল ! কৃত্রিম যন্ত্রণায় কাত্-রাইয়া  
উঠিলাম—“ছাড় বন্ধু, ছাড়, পা ছাড় হে ! পায়ে ফোঁড়া—  
উঃ, উঃ !”

ফোঁড়ায় হাত পড়িলেই হাত সরাইয়া লইতে হয়—এ  
হচ্ছে সংস্কার ! যে আমার পা ধরিয়াছিল, তাহার বজ্রমুষ্টি  
চকিতে আলগা হইয়া গেল এবং সঙ্গে সঙ্গে আমিও—  
সর্পমুখচ্যুত ভেকের মত—ঝুপ্-করিয়া অন্ধকারে খসিয়া  
পড়িলাম।

যে আমাকে এমন বাগাইয়া পাক্ড়াও করিয়াছিল,  
আমাকে ছাড়িয়া দিয়াই হতাশভাবে পাঁচিলের ওপাশ হইতে  
সে বলিয়া উঠিল—“ঐ যাঃ !”—অর্থাৎ, তার মনে পড়িয়া  
গিয়াছে যে, সাধুর পায়ে ফোঁড়া হইলেই ছাড়িয়া দিতে হয় আর  
চোরের পায়ে যত বড়ই ফোঁড়া হোক না কেন, সে পা আরও  
জোরে চাপিয়া ধরা কর্তব্য !

পা উঁচু এবং মাথা নীচু করিয়া অন্ধকারে যে কোথায়  
ঠিক্-রাইয়া পড়িলাম—ভগবান জানেন কিন্তু আমার মনে হইল  
যেন, ধড়ের উপর হইতে আমার মাথাটির অস্তিত্ব একেবারেই

## মধুপর্ক

বিলুপ্ত হইয়াছে ! ঋড়িয়াই উঠিলাম—কেননা, মাথা থাক্ আর যাক্—পা যখন আছে, তখন এ-সময়ে বন্ বন্ বেগে সেই পদ-যুগল ব্যবহার করা ছাড়া মুক্তিলাভের 'নাশ্চঃ পশ্চা' ! এবার ধরিলে আর কিছুতেই বাঁচিব না—আগে প্রহার, পরে কারাগার ! আমার এ ডাকাতির গল্প শুনিবে কে ?

উঠিলাম এবং—বলাবাহুল্য—ঘোড় দৌড়ের ঘোড়ার মতই ছুটিলাম, এখানে সেখানে দুচারবার ধাক্কা খাইয়াও ছুটিলাম, ইটে লাগিয়া দুবার হৌচট ও একবার ডিগবাজী খাইয়াও ছুটিলাম, কাছা খুলিয়া ও একপাটি জুতা হারাইয়াও ছুটিলাম,—একেবারে গলির মোড়ে গিয়া থামিলাম—কারণ, থামিতে হইল ।

—গলির মুখ জুড়িয়া দাঁড়াইয়া আছে সেহ বিপুলবপু—ডাকাত !

আমাকে দেখিয়াই সে হুঙ্কার করিয়া উঠিল—“এই যে—পেয়েছি !”

আমি একদম থ ! দুর্গানাম জপিতে জপিতে ভাবিলাম, কার ঋগ্নরে পড়া উচিত ? যে আমার ঠ্যাং ধরিয়াছিল, তার হাতে,—না, উপস্থিত যে আমার স্মৃথে মূর্তিমান্, তার হাতে ? একদিকে দমাদম্ বেদম প্রহার, ও অক্ষকার কারাগার—আর একদিকে মুহূর্তে সংহার—ডাঙ্গায় বাঘ ও জলে কুমীর—শ্রেয়

কি ? চালাক মন বলিল, পুনর্বার মধ্যপথের যাত্রী হও—  
শ্রেয় হচ্ছে, পলায়ন (পার যদি) ।

কোন রকম পূর্বাভাস না দিয়া আচম্কা ভয়ানক চাঁচাইয়া  
উঠিলাম—“কে তুমি ?” তেমন ছোরে জীবনে আর কখনো  
চাঁচাই নাই ।

ডাকাত বিনামেঘে এমন বেয়াড়া বজ্রনাদের আশা একে-  
বারেই করে নাই—সে চম্কাইল, ভড়কাইল, পিছনে হঠিল ।  
সেই ফাঁকে পাশ কাটাইয়া পুনর্বার আমার প্রাণপণ পলায়ন !

আমার প্রাণ পলায়নের দিকে নিবিষ্ট থাকিলেও, কাণ  
ছিল ঠিক ডাকাতের দিকেই । দ্রুত পদশব্দে বুঝিলাম, সেও  
ছুটিতেছে । ভাগ্যলক্ষ্মী বুঝি এইবার আমার পক্ষ ত্যাগ  
করিলেন ।

মোড় ফিরিতেই দেখি, সামনে মস্ত এক গাছ । পণ্ডিত-  
কথিত আমাদের পূর্বপুরুষের অভ্যাস এখনও ভুলি নাই ;  
সুতরাং একটুও ইতস্ততঃ না করিয়া চটপট গাছের উপরে  
উঠিয়া গেলাম ।

ও রাস্তায় বহু কণ্ঠে বিচিত্র ধ্বনি উঠিল, “ধবু বেটাকে !”  
“মাবু, মাবু !” “পুলিশ, পুলিশ !” কিছুক্ষণ এমনি হট্টগোল  
চলিল তারপর সব চুপচাপ ।

প্রথমটা কিছুই বুঝিতে পারিলাম না । তারপর মনে পড়িল,

## মধুপর্ক

যারা আমার চরণ ধারণ করিয়াছিল, চোর ধরিবার আশা নিশ্চয়ই তারা ত্যাগ করে নাই। আমাকে না পাইয়া, ধাবমান ডাকাতকে দেখিয়া, চোর সন্দেহে নিশ্চয়ই তারা সে গোয়ার-টাকেই পাকড়াও করিয়াছে! গাছের টঙ্কে বসিয়া ঘণ্টাখানেক ধরিয়া তেত্রিশ কোটিকে গড়্ করিতে লাগিলাম। তারপর নামিলাম।

হে মা কালী, এ যাত্রা প্রাণে প্রাণে ভারি ঝুঁচাইয়া দিয়াছ; আমি অকৃতজ্ঞ নই মা, কালিঘাটে কাল তোমার নামে এবং আমার পয়সায় জোড়া পাঠা পড়িবে।

৬

পাশের বাড়ীতে মেয়েদের নেমন্ত্নে যাইতে একটু রাভ হইয়াছিল বটে, কিন্তু তারা নেমন্ত্নে গিয়াছিল এবং গয়না পরিয়াই। গয়না আনিতে এত দেরি হইল বলিয়া গিন্নীর নথ প্রথমটা কিঞ্চিৎ চঞ্চল হইয়া উঠিয়াছিল বটে, কিন্তু আমার ইতিহাস শুনিয়া—মুথনাড়া ত দূরের কথা—অচিরে তাঁকে নথনাড়াও বন্ধ করিতে হইল। তিনি আমার গায়ে-মাথায় হাত বুলাইতে বুলাইতে মেয়েলি অভিধান হইতে এমন কতকগুলো স্থনির্বাচিত শব্দ শব্দ বিশেষণ ডাকাতদের সম্প্রগোষ্ঠীর উপরে প্রয়োগ করিলেন, যাহা শুনিলে যে কোন ভদ্র দম্মা কাণে হাত দিয়া লজ্জায় এবং অপমানে মাথা হেঁট



করিতে বাধ্য হইত ! সেইরাত্রেই গৃহিণীর মুখে আমার অপূৰ্ণ বিপদ এবং অপূৰ্ণতর উদ্ধারলাভের কাহিনী পল্লবিত ও অতিরঞ্জিত হইয়া পাড়াময় রটিয়া গেল ।

পরদিন সকালে বসিয়া বসিয়া গত রাত্রির ব্যাপারখানা ভাবিতেছি, এমন সময় বাহিরে আমার নাম ধরিয়া কে ডাকিল । গলাটা অচেনা ।

নীচে নামিয়া আসিলাম । কিন্তু সদর দরজায় গিয়া যে ডাকিতেছে, তাহাকে দেখিয়াই আমার অন্তরায়া শুকাইয়া ৩ মাথা ঘুরিয়া গেল ! এ যে সেই,—ডাকাত ! এখানে কেন ? প্রতিশোধ নিতে ?

ঠক্ঠক করিয়া কাঁপিতে কাঁপিতে পায়ে পায়ে বাড়ীর ভিতরদিকে পিছাইতে লাগিলাম ।

ডাকাত হাত তুলিয়া আদেশ দিল, “দাঁড়ান !”

হতভঙ্গের মত দাঁড়াইয়া পড়িলাম ।

“আমার পিঠটা আগে দেখুন”—বলিয়া সে জামা তুলিয়া গম্ভীরবদনে আপনার পৃষ্ঠদেশ আমাকে দেখাইল । সমস্ত পিঠটা যুড়িয়া লম্বা, গোল নানা আকৃতির কালশিরা পড়িয়াছে, কত ঘা লাঠি, জুতা ও ঘুঘি খাইলে মানুষের পিঠের দশা অমনধারা সাংঘাতিক হইতে পারে, সেটা অনুমান করা অসাধ্য ।

## মধুপর্ক

ডাকাত চোখ পাকাইয়া বলিল, “আমার ঐ দশা কার জন্তে, বলুন দেখি ?”

কিছু বলিলাম না—আমার কাঁপুনি ক্রমেই বাড়িয়া চলিল।

ডাকাত আমাকে নিরন্তর দেখিয়া নিজেই নিজের প্রশ্নের উত্তর দিয়া কঠোর স্বরে বলিল, “আপনার জন্তে—বুঝেছেন, আপনার জন্তে।”

আমি বোবা বনিয়া ঘাড় হেঁট করিলাম।

ডাকাত বলিল, “পাড়ায় যা রটিয়েছেন, তা আমি শুনেছি। তাই শুনেই বুঝে নিয়েছি, আপনি কে!—জানেন মশাই, কাল আমায় গারদে রাত্রিবাস করতে হয়েছিল? জানেন মশাই, কতকষ্টে আমি খালাস পেয়েছি? জানেন মশাই, হাজতে কত বড় বড় মশা আছে? জানেন মশাই, কাল সারারাত সজাগ থেকে হাজার মশার সঙ্গে আমায় একা লড়তে হয়েছে?”—ডাকাত ক্রমে আমার কাছে আসিয়া, আমার মুখের কাছে মুখ আনিয়া উচ্চস্বরে বলিল, “আর জানেন কি—আমি কে?”

মনে মনে বলিলাম, “বলা বাহুল্য।”

ডাকাত বলিল, “একজন গোবেচারী বরঘাত্রী। আপনার পাশের বাড়ীতে নেমন্তরে আসছিলুম। থাকি দূর পাড়ারগায়ে।

ট্রুণ ফেল্ করাতে ঠিক সময়ে বরযাত্রীর দলে মিশতে পারি নি। কনের বাড়ী চিনি না—পথের লোককে জিজ্ঞেস করে করে আসছিলুম। একটি বুড়ো ভদ্রলোক আপনাকে দেখিয়ে দিয়ে বলেন, 'ওঁর বাড়ী কনের বাড়ীর পাশে—ওঁর পিছু পিছু যান।' (ভদ্রলোকটিকে রাম-দাদা বলিয়া আন্দাজ করিলাম) তাই আসছিলুম মশায়ের পেছনে পেছনে।"

নিজের কাণকে বিশ্বাস করিতে পারিলাম না—যা শুনিতেছি, এ কি সত্য? বেকুব বনিয়া বাধো বাধো গলায় বলিলাম, "আপনি—আপনি কি ডা!"

হো হো করিয়া হাসিয়া সে বলিল, "আমি কেন—আমার চতুর্দশ পুরুষের মধ্যে কেউ ডাকাত হয়নি। আপনি ভেবেছিলেন আমি ডাকাত। যারা আমায় জাজতে পাঠিয়েছিল, তারা ভেবেছিল আমি চোর কি খুনে। কিন্তু কেউ ভাবলে না যে, আমি নিরীহ বরযাত্রী-মাত্র। আজ সকালে যখন বিয়েবাড়ীতে এসে হাজির হলুম, তখন মশায়ের 'অপূর্ব উদ্ধারলাভে'র গল্প শুনে নিজের ছুখে কাঁদব কি, হাসতে হাসতে পেটের নাড়ী ছিঁড়ে যাবার যোগাড়। অ্যা! এ যে একেবারে আস্ত উপগ্রাস!"

## অশ্রু

ক

আমাদের বাড়ী পাশাপাশি । উপমাদের সঙ্গে আমাদের বেশ একটু ঘনিষ্ঠতা ও আত্মীয়তার যোগ ছিল । উপমার সঙ্গে ছেলেবেলায় কত খেলাই খেলেছি—যদিও সে আমার চেয়ে বছর-পাঁচেক বয়সে ছোট । সুতরাং, বাল্যের ভালবাসা যে যৌবনের প্রেমে পরিণত হবে, এ-স্বাভাবিক আশ্চর্য্য কি ?

উপমার বাবা সুরেনবাবু নব্যতন্ত্রের হিন্দু । মেয়ের বিয়ের জন্তু তাঁর স্ত্রী যথেষ্ট মুখরা হয়ে উঠেছিলেন, কিন্তু কিছুতেই স্বামীর ‘মাথার টনক’ নড়াতে পারেন-নি । মেয়ে বড় হবে, লেখাপড়া শিখবে, তবেই বিয়ের কথা—এই ছিল তাঁর পণ ।

প্রথম যেদিন তার কাছে আত্মপ্রকাশ করি, সে দিন সে কিছুই বলে-নি ; কিন্তু তার প্রসন্ন নতদৃষ্টি ও রক্ত কপোলে হৃদয়ের মৌন সম্মতি পেয়েছিলাম । বাগানের গোলাপগাছ থেকে একটি আধ-ফোটা ফুল তুলে তার এলো খোঁপায় গুঁজে দিলাম—আমার প্রাণের পুলকই ফুলের পাপড়িগুলিকে যেন

রঙ্গিন করে তুলেছিল। উপমা আমার একখানি হাত  
 ছহাতে নিজের মুঠোর ভিতর নিয়ে কোলে করে বসে রইল।  
 আমরা কেউ কিছু বললাম না—বকুলশাখার কানে-কানে  
 বাতাস মৃদু গুঞ্জে যে কথা বলছিল, সারাসন্ধ্যা সেইখানে  
 বসে বসে আমরা তাই শুধু শুনতে লাগলুম।

খ

এ-কথা কত লুকানো!

জানতাম, আমার আইন-পড়া সাদ্দ না হলে বাবা কখনই  
 এ বিবাহে মত দেবেন না। বিশেষ সে সময়ে আমার বাবা  
 ফিটের ব্যামোয় বড় কষ্ট পাচ্ছিলেন। সুতরাং তখনকার মত  
 আমার প্রাণের কথা, আমার প্রাণেই চাপা রইল।

রোজ সন্ধ্যাবেলায় আমি উপমাদের বাড়ীতে চা খেতে  
 যাই—এটি আমার অনেক দিনের অভ্যাস।

সেদিনও নিয়মমত গেলাম।

টেবিলের একধারে বসে শ্বরেনবাবু খবরের কাগজ পড়-  
 ছিলেন। আমি তাঁর সামনে গিয়ে বসলুম। উপমা চাকিত  
 চোখে একবার আমার দিকে তাকিয়ে, একটু হেসে চায়ের  
 পেয়ালায় দুধ ঢালতে লাগল। উপমার চোখের এই দৃষ্টিতে  
 এখন আমি এক নতুন ভাষা দেখি—চারিদিকে লোক জন

## মধুপর্ক

থাকলেও সে ভাষা আমি ছাড়া আর কেউ পড়তে পারত না—  
সে ভাষা যে কেবল আমারই জন্ম !

বাইরে পায়ের শব্দ হোল। স্বরেনবাবু খবরের কাগজ  
থেকে মুখ তুলে বল্লেন, “উপা, বোধ হয় নরেন আসছে।”

নরেন উপমার দাদা।

নরেন ঘরের ভিতরে এল—তার পিছনে সাহেবী  
পোষাক-পরা আর একজন লোক। হঠাৎ এক অচেনা লোক  
দেখে উপমা একটু জড়সড় হয়ে আমার কাছে ঘেসে দাঁড়াল।

নরেন বল্লে, “উপা, লজ্জা করিস্নে, এ আমার বন্ধু  
অজিত। বাবা, আমার মুখে অজিতের কথা শুনেছেন ত ?”

স্বরেনবাবু তাড়াতাড়ি উঠে দাঁড়িয়ে বল্লেন, “এস বাবা,  
এস ! নরেনের বন্ধু বলে তোমাকে আর আপনি বল্লুম না।  
বোসো—ঐ চেয়ারে বোসো। উপা, আর দু-পেয়লা চা  
তৈরি কর্ত মা !

অজিত হেসে বল্লে, “কোর্টের ফেরতা আস্ছি, নরেন  
আর আমাকে বাড়ী গিয়ে খোলস্ ছাড়বার অবকাশ দেয়-নি।  
আশা করি দাঁড়কাকের এ ময়ূরপুচ্ছকে আপনারা সকলে ক্ষমা  
করবেন।” টুপী হাতে করে অজিত আমার সামনের চেয়ারে  
বসে পড়ল।

এই অজিতের কথা আজ ক-দিন ধরেই শুন্ছি। অজিত,

খুব বড়লোকের এক মাত্র সন্তান। কলকাতায় বি-এ পাশ করে বিলাতে গিয়ে সে ব্যারিষ্টার হয়ে এসেছে। দেখতেও সে বেশ সুপুরুষ। নরেন কাল বলছিল, অজিতের সঙ্গে উপমার বিয়ে হলে বেশ হয়। কথাটা তীরের ফলার মত আমার বুকে গিয়ে বিঁধেছিল বটে,—কিন্তু ভেবেছিলুম সে শুধু কথার কথা।

আজ আমার চায়ের পেয়ালায় কে যেন নিম-পাতার রস ঢেলে দিয়েছে! কোন রকমে চা পান করতে করতে ভাবতে লাগলুম, নরেন যখন অজিতকে সঙ্গে করে নিয়ে এসেছে, ব্যাপারটা তখন আর হালকা ভেবে উড়িয়ে দেওয়া চলে না। উপমা যে এখন আমার দেহের সঙ্গে রক্তের মত মিশে আছে,—সে পরের হবে, এ যে ভাবতেও পারি না। উপমাকে এখন যেদিন ভুলব—সেদিন আমি নিজেকেও হয়ত ভুলে যাব।

ভাবছি, হঠাৎ আমার বেয়ারা ছুটতে ছুটতে এসে খবর দিলে, বাবার আবার ফিট হয়েছে। আমি তাড়াতাড়ি উঠে পড়লুম।

গ

বাবার এবারকার পীড়া কিছু গুরুতর! ডাক্তার বলেন, কলকাতার গরম বাবার সহ্য হচ্ছে না, একে দু-একদিনের মধ্যেই দার্জিলিঙ্গে নিয়ে যাওয়া উচিত, নইলে অবস্থা হঠাৎ খারাপ হয়ে দাঁড়াতে পারে।

## মধুপর্ক

মা ধরে বসলেন, কালকেই দার্জিলিঙ্গ যাব। স্থির হোল দার্জিলিঙ্গে আমার এক মামা আছেন, আপাতত সেখানে গিয়েই উঠব।

বলতে-কি, এ সময়ে আমার মন কলকাতা থেকে কিছুতেই নড়তে চাহছিল না, কিন্তু উপায় নেই—এ যে কর্তব্য!

সকালে উঠে তাড়াতাড়ি উপমাদের বাড়ী ছুটলাম। ঢুকতেই দেখি, উপমা বাগানে দাঁড়িয়ে ফুল তুলছে। আমি তার কাছে গিয়ে বললাম, “উপা, বাবার ব্যামোর বড় বাড়াবাড়ি—তাকে নিয়ে আমরা দার্জিলিঙ্গ যাচ্ছি।”

“কবে, প্রভাত-দা?”

“আজই।”

“—আজই! সেকি, যাবার আগে মা-বাবা দেখতে পাবেন না?”

“কেন উপা, তোমার বাবা আর মা কোথায়?”

“তারা শ্রীরামপুরে কাকার বাড়ী গেছেন। কাল আসবেন।”

আমি হতাশভাবে বললাম, “তোমার বাবার সঙ্গে আজ আমার দেখা হওয়ার যে বড় দরকার ছিল উপা!”

“কেন প্রভাত-দা?”



“—আমার হাতে তোমাকে দিতে তাঁর কোন আপত্তি আছে কিনা, যাবার আগে সেকথা জেনে যেতাম !”

উপমার গালদুটি রাঙ্গা হয়ে উঠল। ঘাড় হেঁট করে খানিকক্ষণ দাঁড়িয়ে থেকে সে বলল, “তোমরা চলে যাচ্ছ, এইবেলা আমি সকলকার সঙ্গে দেখা করে আসি।”

নরম কাঁধের উপর এলানো চুল ছুলিয়ে উপমা চলে যেতে উদ্ভত হোল,—আমি আবেগভরে তার স্মুখে গিয়ে দাঁড়িয়ে পাচশ্বরে বললাম, “দাড়াও উপমা, অনেক দিন তোমায় দেখব না, একবার ভাল করে দেখে নি !”

উপমা একবার চাকিতের জন্ত পূর্ণদৃষ্টিতে আমার দিকে তাকাল,—পরক্ষণেই চোখ নামিয়ে লজ্জায় নুয়ে ফুলের ডালার দিকে চেয়ে থমকে দাঁড়াল !

গাছের ফাঁক দিয়ে সোণার মত এক ঝলক রোদ্ এসে উপমার মুখের একদিকটি আলোয় আলো করে তুলল—সে মূর্তি যেন গ্রীক ভাস্করের উপাস্ত্র প্রতিমা !

ঘ

দার্কিলিঙ্গে এসে বাবার রোগ কমল না—কিন্তু নানান উপসর্গ বাড়তে লাগল।

আমাদের মনের আনন্দই প্রকৃতিতে প্রাণসঞ্চার করে।—সে আনন্দ আমার ছিল না। তাই উপত্যকায় মেঘের মেলা,

## মধুপর্ক

তুষার-পটে আলোর খেলা, শৈল-কোলে ঝরণার লীলা—এ সব চোখ দিয়ে দেখ্তাম মাত্র, মন দিয়ে গ্রহণ করতে পার্তাম না ;—সবই যেন অর্থহীন চিত্রের মত !

সুধু বাবার অসুখই এত অশান্তির কারণ নয় ; নিয়তি সকল দিক থেকেই আমাকে কাবু করবার ফিকিরে আছে ।

জীবনের এহু ভাগটা শিশুর পক্ষে দ্বিতীয় ভাগের মত আমাকে ভারাক্রান্ত করে তুলেছে, —একে বাদ দেওয়াও চলে না, মনে রাখাও কষ্টকর । এ দুদিনের কথা ভুলে যেতে কত না চেষ্টা করেছি,—কিন্তু পারি নি, কিছুতেই পারি নি ! এ যেন আগুনের আখরের মত আমার বুকের ভিতরটা দাগী করে রেখেছে !

—তাকে দেবী বলেই জানতাম । না,—জানতাম কেন, এখনো তাই বলেই জানি, তাই বলেই পূজা করি । ভ্রম-প্রমাদের জীবনে হয়ত সে ক্ষণিকের ভুল করে ফেলেছিল । কিন্তু কার অভিশাপে ক্ষণিকের সে ভুল আমার অদৃষ্টে চিরস্থায়ী হয়ে রইল ?

দার্জিলিঙ্গে আসবার পরে, কল্কাতা থেকে প্রথম চিঠি পাই উপমার । আমরা কে কেমন আছি জিজ্ঞাসা করে সব শেষ লাইনে সে লিখেছিল :—“প্রভাত দাদা, তোমার জন্মে আমার মন কেমন করে ।”

সর্বশেষের সামান্য এই একটি লাইনকে তোমরা কেউ অসামান্য বলে ভাববে না হয়ত। আমি কিন্তু সেই লাইনটিকে ইষ্টমন্ত্রের মত মনে মনে কতবার—কতদিন যে জপ করেছি, তা আর বলা যায় না। প্রেমে যে সামান্যকে অসামান্য করে তোলে!

আজ শুঁ মে লাইন—সেই একটিমাত্র লাইন আমার জীবনকে মন্ত্রমুগ্ধ করে রেখেছে। “প্রভাত দাদা, তোমার জন্মে আমার মন কেমন করে।”—উপনার শেষ পত্রের এই শেষ পংক্তিটি স্মরণীয়। কারণ, তারপর উপনার জীবনে যেদিন এসেছে, সে-দিনের কথা আর আমার অধিকারে নেই—সে তখন অন্নের ধর্মপত্নী!

চিঠি লেখবার সময় সত্যই কি তার মন কেমন করেছিল? এখনো মাঝে মাঝে কথাটা ভাবি। একটা ইতর প্রাণীর সঙ্গে থাকলেও যে তার উপরে মায়া পড়ে,—আর আমি হচ্ছি তার বাল্যসার্থী,—কত কাল থেকে একসঙ্গে আছি,—আমার উপরে কি তার মায়া পড়ে নি? এ আর বিচিত্র কি? কিন্তু আমার এ প্রাণ ত তার মায়ার কাঙ্গাল ছিল না—সে যে চেয়েছিল, প্রেম! উপমাও ত তা জান্ত!

আবার, আর এক হতেও পারে। হয়ত, আমার জীবন তার নির্দয়তায় নিষ্ফল হয়ে যাবে বলে, আমার হতভাগ্যের

## মধুপর্ক

কথা ভেবে তার মনে অনুতাপের ক্ষণিক দয়া হয়েছিল। তাই কি? উপমার এ মন কেমন করা কি প্রথম শিকারীর করুণার মত? না, না,—আর ভাবতে পারি-নি। এয়ে নিজের দেহেই ছুরি চালিয়ে শব ব্যবচ্ছেদ শিক্ষা হচ্ছে। এ ব্যাপার যতই বিশ্লেষণ করুব, আমার আত্মা ততই রক্তাক্ত হয়ে উঠবে!

ধর্মীর সন্তান অজিতের অর্থের মোহেই হোক, আর তার বাপ মার ইচ্ছা বা আদেশেই হোক,—উপমা যখন আমাকে ত্যাগ করেছে, তখন আর কারণ চিন্তা করে লাভ কি? অকালে, ভৃগুয় ছাতি ফেটে গেলেও চাতক যখন বাদলের ধারা পাবে না, তখন তার পক্ষে কান্না-খামানোই হচ্ছে, উচিতকাব্য।

\* \* \* \* \*

উপমার চিঠি সামনে রেখে সেদিনও মেঘের প্রাসাদ তৈরি করছিলাম, এমন সময়ে সুরেনবাবুর এক পত্র এসে আমার স্মৃতির মেঘে আশ্রয় ধরিয়ে দিলে। সেই পত্রেই প্রথম জানলুম, অজিতের সঙ্গে উপমার বিবাহ।

আমার তখনকার মনের অবস্থা ভাষায় বর্ণনা করা নিষ্ফল; কারণ, সে ত আমি পারব না! কল্পনায় পরের মানস-ভাব হয়ত ফুটানো যায়, কিন্তু নিজে যা প্রাণে প্রাণে অনুভব করছি, সে কঠিন বাস্তবকে ভাষায় ঠিক প্রকাশ করা

যায় কিনা, তাতে আমার সন্দেহ আছে। অন্তত আমার সে শক্তি নেই।

জীবনে ধিক্কার এল,—নারীর প্রতি ঘৃণা হোল। সারা সন্ধ্যা কেমন যেন আচ্ছন্নের মত চূপ করে বসে রইলুম,—যখন সাড় হোল তখন রাত্রি হয়েছে।

কৃষ্ণপক্ষের রাত্রি,—আমার বুক ছাপিয়ে অনন্ত কালিমা যেন বিশ্বময় ব্যাপ্ত হবে পড়েছে। চন্দ্রশূন্য আকাশ, মাথার উপরে যেন এক কালিমাখা বিরাট কটাহের মত উল্টে রয়েছে। আমার মনে হতে লাগল, পৃথিবীতে শত শত অভাগার প্রাণে প্রাণে অহরহ যে দুঃখের চিতা জ্বলছে, তারই শিখার ধূমে আকাশ অত অন্ধকার!

উপহার চিঠিখানা হাতেই ছিল,—সেখানা বাতির আলোয় ধরলুম। দেখতে দেখতে সমস্ত পুড়ে ছাই হয়ে গেল। কিন্তু ছাই হয়েও চিঠিখানা একেবারে গুঁড়ো হয়ে গেল না,—বেঁকে চুরে দুমুড়ে গেল মাত্র। মাথা হেঁট করে তার দিকে চেয়ে দেখলাম। ছোট ছোট চেনা হাতের লেখায় তখনো পড়া যাচ্ছে, 'প্রভাত-দাদা, তোমার জন্মে আমার মন কেমন করে!'—করে নাকি? করুক! বিক্রপের স্বরে আপন মনে হেসে উঠে, পত্র ভস্ম সবলে মুঠোয় চেপে ধরলুম, মুড়্ মুড়্ করে একটা শব্দ হোল—সে যেন কার অতি মূহু

## মধুপর্ক

আর্তনাদ! যখন মুঠো খুললুম, হঠাৎ একটা দম্কা হাওয়া এসে ছাইগুলোকে এক ঝাপ্টায় নিঃশেষে উড়িয়ে নিয়ে গেল।

\* \* \* \* \*

মনের যখন এমন অবস্থা, বাবার অস্থিত তখন চরমে উঠল।

স্বপ্নে বাবুর আর এক পত্র পেলুম,—উপমার বিয়ের নিমন্ত্রণ! তার দু-চারদিন পরেই বাবাকে নিয়ে কলকাতায় রওনা হলুম।

মনে আছে, উপমাদের বাড়ীতে যেদিন সান্নায়ে সাহানা বাজচে, আমাদের বাড়ীতে সেদিন কান্নার রোল উঠেছে!

ঙ

কলকাতা আমার বিষ হয়ে উঠেছিল। ওকালতী পাশ করেই তাই পশ্চিমে চলে এসেছি। ছোট ভায়ের সঙ্গে মা কলকাতাতেই আছেন।

বছর-দুই কেটে গেছে। এর মধ্যে মনের উন্নতি যত-না হোক,—আর্থিক উন্নতি কিছু-কিছু হয়েছে।

মা প্রতি পত্রেই কান্না ধরেছেন, এইবার আমাকে বিয়ে করতে হবে। কিন্তু সে-কথা আমি কানে তুলিনি।

ইতিমধ্যে মার চিঠিতে উপমার খবরও পেয়েছি। তার জীবন সুখের নয়। অজিত মাতাল আর লম্পট। উপমার গায়ে হাত তুলতেও সে পিছপাও নয়।

নিয়তি !

আমার কথা কি আর তার মনে আছে ? বোধ হয়, না ।  
নইলে, বিয়ের পর থেকে সে আমার কোন খোঁজখবর  
নেয়-নি কেন ? ভাল স্বামী না পেলেও সে টাকা ত পেয়েছে  
বটে ! উপমা এখন বিলাসিনী ধনীর ঘরণী । সেখানে আমি  
কে ?

থাক ও কথা । অতীতের চিত্তভঙ্গ্য কুড়িয়ে, কি আর  
হবে ?

এদিকে মা হতাশ হয়ে উঠছেন । শেষপত্রে তিনি  
লিখেছেন, যাদের নিয়ে এ-বয়সে তাঁর সংসার ধম্ম, তারা যদি  
সংসারী না-হয়, তবে তিনিও আর সংসারের ভার বহিবেন  
না—কাশী চলে যাবেন ।—চিঠির ঝাপসা কালি দেখে বুঝলাম,  
লিখতে লিখতে মা কেঁদেছেন । মনে কেমন একটা ঘা  
লাগল ।—অভাগিনী বিধবা জননী আমার ! না ভেবে-  
চিন্তেই উত্তর দিলাম—আমি বিয়ে করব ।

চ

দেশে ফিরছি ।

একলে বিয়ের বাজারে রোজগারী উকীল-বর ভারি  
আক্রা—একরাশ পুঁটিমাছের ভিতরে দশ-সেরী একটি কাতলার  
মত । সুতরাং, আমাকে কেন্‌বার খরিদারের অভাব হয়-নি ।

## মধুপর্ক

মত দিয়েছি বলে এখন অনুতাপ হচ্ছে। পরিচিতকে যে আপন করতে পারলে না, অপরিচিতকে সে কি আর আপন করতে পারবে ?

ট্রেন একটা বড় জংশনে এসে দাঁড়াল। কলকাতা থেকে ও একথানা যাত্রী-গাড়ী এসে ষ্টেশনে দাঁড়িয়েছিল।

এখন বড়দিনের ছুটি। পশ্চিমে, কলকাতার গাড়ীতে, এ-সময় অনেক চেনা মুখ নজরে পড়ে। ও-গাড়ীতে কোন আত্মীয়-বন্ধু আছেন কিনা দেখবার জগে কামরা থেকে নেমে পড়লুম।

চেনা মুখ আছে বৈকি ! দু-চার পা যেতে-না-যেতেই যাকে দেখলুম,—তাকে দেখবার আশা মোটেই করি-নি। একখানি সেকেণ্ডারিজারি গাড়ীতে, জানালায় মুখ বাড়িয়ে, ঠিক আমার সামনেই বসে আছে—উপমা !

থম্কে দাঁড়িয়ে পড়লুম,—উপমাও আমাকে দেখতে পেয়েছে !

আমাকে দেখেই সে কেঁপে উঠল। তারপর ঘাড় হেঁট করে পাথরের মত বসে রইল। যেন-সে ফাঁশীর হুকুম পেয়েছে !

আমার মনের ভিতর সমস্ত অতীত একচমকে বিদ্যাতের মত খেলে গেল। সেই উপমা !



উঃ, কি বিবর্ণ তার মুখ, কি বিশীর্ণ তার দেহ, কি বিষণ্ণ তার ভাব! সেই রূপে-নিকরুপমা উপমা, কেমন করে এমন বিষাদ-প্রতিমা হোল?—এষে জীবন্ত শব!

কতক্ষণ যে অবাক-আড়ষ্ট হয়ে সেখানে দাঁড়িয়েছিলাম, তা আমার মনে নেই। উপমা আমার প্রাণে যে দাগা দিয়ে-  
গুঁছিল, আমার সমস্তকেই যে ব্যর্থ করে দিয়েছিল, আজ তার এই দীনমূর্তি দেখে সে-সব কথা একেবারে ভুলে গেলাম—ষ্টেশনের সেই বাস্তব জনতা, সেই কর্কশ কোলাহল ডুবিয়ে আমার স্মৃতির পটে সেই-একদিনের সোনার ছবি জেগে উঠল, যেদিন তার পাশে বসে, তার হাতে হাত রেখে বকুল-শাখায় বসন্তবাতাসের অশ্রাস্ত গানে এক নূতন রাগিনীর আভাস পেয়েছিলাম!

কলকাতার গাড়ীর বাঁশী বেজে উঠল, সে তীক্ষ্ণ ধ্বনি যেন ধারালো অস্ত্রের মত আমার প্রাণটা খান্-খান্ করে দিলে। আমি চম্কে উঠলুম—উপমাও চম্কে উঠল।

গাড়ী ছেড়ে দিলে।

উপমা যেন প্রাণপণে চোখ তুলে আমার দিকে চেয়ে রইল,—সে চোখে কোন্ ভাব ছিল, মন তা বুঝেছে, আমার মুখ তা বলতে পারবে-না!

আকাশের রোদ উপমার মুখে এসে পড়ল—তার পাণ্ডুর কপোলে কি ও চক্চক্ করছে? অশ্রু!

## মধুপর্ক

উপমা কাঁদছে !

কল্কাতার টিকিট ছুঁড়ে ফেলে দিলাম। বিবাহ ?  
এ-জীবনে নয়।

তার চোখের জলে মনের সকল মলিনতা ধুয়ে গেছে।  
জীবনে তাকে আর-কখনো দেখি-নি; কিন্তু আমার হৃদয়-মরু  
সজল করে, আজীবন জেগে থাকবে, সেই এক ফোঁটা  
'অশ্রুজল' !

---

## নিয়তি

রাত বারটা ।

ঐ পোড়ো-বাড়ীর ভাঙ্গা, কালো প্রাচীরের উপরে আধ-  
খানা টাঁদ বাঁকিয়া আছে ! টাঁদ কি পাণ্ডুর—যেন মড়ার  
মুখের মত ?—আর, আর—অন্ধকার কি গাঢ়,—যেন মৃত্তিমান  
মৃত্যুর মত ! ও কিসের ডাক ? পেচকের ? না অন্ধকারের ?

নবীন সে স্তব্ধতা, সে অন্ধকার সহিতে পারিল না—  
সেদিককার জানালা বন্ধ করিয়া দিয়া সে আর একদিকে  
আসিয়া দাঁড়াইল। সেদিককার জানালা খুলিয়া দিতে-না-  
দিতেই আলোর চেউয়ের পর চেউ আসিয়া তার ঘর যেন  
ভাসাইয়া দিল !

স্বমুখেই বিবাহ-বাড়ী—উজ্জ্বল আলোয় ঘরে ঘরে হাসি-  
মাখা মুখ দেখা যাঠিতেছে । কেহ প্রাণ খুলিয়া হাসিতেছে,  
কেহ আনন্দের গান গায়িতেছে । চারিদিকে জীবনের লক্ষণ—  
পৃথিবীতে যেন দুঃখ-বিষাদ বলিয়া কোন কিছু নাই !

নবীনের মনে হইল, সামনের বাড়ীখানা যেন তাকে আর  
তার অদৃষ্টকে কঠোর উপহাস করিতেছে ;—এর চেয়ে অন্ধকার

## মধুপর্ক

যে ঢের ভাল ! সে একটা দীর্ঘশ্বাস ফেলিয়া আবার জানালা বন্ধ করিয়া দিল । ঘর আবার অন্ধকার ।

সেই অন্ধকারে খানিকক্ষণ সে গুম্ হইয়া বসিয়া রহিল । তারপর আশ্বে আশ্বে উঠিয়া মাটির প্রদীপটি জ্বালিয়া দিল । প্রদীপে তৈল ছিল খুব অল্প । মিটমিট করিয়া কাঁপিয়া দীপ জ্বলিতে লাগিল,—আসন্নমৃত্যু রোগীর মত !

দারিদ্রের ঘর,—চারিদিকে দারিদ্রের চিহ্ন ! প্রদীপের স্নান শিখা চারিদিকের দীনতা ও মলিনতা যেন আরও বেশী করিয়া প্রকাশ করিয়া তুলিল !

কতকগুলো ছেঁড়া গাফুড়া ও তুলার স্তূপে পরিবারের আর সকলে শুইয়া আছে—একটি রমণী, দুটি ছেলে, তিনটি মেয়ে । তাহাদের দিকে তাকাইয়া নবীন শিহরিয়া উঠিল ।

রমণী তাহার স্ত্রী । অভাগীর ঘুমন্ত মুখ হইতেও দুশ্চিন্তার রেখা সরিয়া যায় নাই । তার চোখের কোলে কালি, গালের হাড় উঁচু হইয়া উঠিয়াছে, আর মুখে যেন হৃদে রং মাখান ! নবানের মনে পড়িল, যেদিন উৎসবের বাঁশী ও আনন্দের হাসির মাঝে এই রমণীর সঙ্গে মন্তোচ্চারণ করিয়া পুরোহিত তাহার অদৃষ্টসূত্র বাঁধিয়া দিয়াছিল, সেদিন এই মুখেই, এই নয়নেই, সে কি সুখমা ও কি নবীনতা দেখিতে পাইয়াছিল !

## নিয়তি

নবীন ঘাড় হেঁট করিয়া ভাবিতে ভাবিতে ঘরের ভিতরে  
পায়চারি করিতে লাগিল।

আজ তিনমাস হইল, তাহার চাকুরীটি গিয়াছে। সে  
মোহিনা পাইত কুড়ি টাকা। তাতেই কোনরকমে অন্ধাধারে  
পেট চলিয়া যাইত।

গেল তিনমাস ধার করিয়া, তৈজস-পত্র বিক্রয় করিয়া  
কোনক্রমে সে দিন কাটাইয়াছে। সকাল-সন্ধ্যা সে চাকুরীর  
জন্ত লোকের দ্বারে দ্বারে ঘুরিয়াছে; কিন্তু কোথাও চাকুরী  
পায় মাই। আজকাল পথে বাহির হইলে পাণ্ডনাদারেরা  
তাকে অপমান করে,—ধার চাহিতে গেলে সকলে তাকে  
তাড়াইয়া দেয়। একখানি ভাড়াঘরে তারা কয়টি প্রাণী মাথা  
গুঁজিয়া থাকিত; কিন্তু বাড়ীওয়ালার অনেকদিন ভাড়া না  
পাইয়া আগুন হইয়া আছে। কাল নূতন মাসের ১লা—  
তাহাদের এ ঘর ছাড়িয়া উঠিয়া যাইতে হইবে।

কিন্তু, কোথায় যাইবে সে? স্ত্রী পুত্রের হাত ধরিয়া পথে  
সাঁড়া'ন ছাড়া আর ত—কোন উপায় নাই!—আর, খাব কি?  
পথের ধূলা?

নবীন, দুইহাতে মাথা ধরিয়া বসিয়া পড়িল। ঘরের  
কোণে হইতে একটা কুকুর এতক্ষণ একদৃষ্টিতে তাহার গতিবিধি  
দেখিতেছিল। কুকুরটা বুড়া হইয়াছে। সে যখন একমাসের,

## মধুপর্ক

নবীন তখন তাকে পথ হইতে কুড়াইয়া আনিয়াছিল; সেইদিন থেকে সে স্নেহ-দুঃখে নবীনের পরিবারেরই একজন হইয়া আছে।

নবীনকে বসিয়া পড়িতে দেখিয়া, কুকুরটা আস্তে আস্তে উঠিয়া প্রভুর কাছে আসিয়া দাঁড়াইল। তারপর আপনার বড় বড় চোখটুকি মেলিয়া নবীনের দিকে চূপ করিয়া চাহিয়া রহিল। তার পশু-নেত্রে যে দুঃখ ও সমবেদনার ভাব প্রকাশ পাইতেছিল, অনেক সময়ে নর-নেত্রও তেমনি গভীর ভাব প্রকাশ করিতে পারে না।

নবীন বলিল, “কি রে ভুলো, তুই যে উঠে এলি বড়?”

ভুলো ল্যাঙ্ক্ নাড়িতে নাড়িতে নবীনের একখানা হাত আদর করিয়া চাটিয়া দিতে লাগিল; সে যেন নবীনকে সান্ত্বনা দিতে চায়!

নবীন তাহার মাথায় হাত বুলাইতে বুলাইতে বলিল, ভুলো, যা—আজকের রাতটা ঘুমিয়ে নে রে! কাল থেকে তোকেও পথে পথে ঘুরে বেড়াতে হবে। আহা, এ বুড়োবয়সে এত কষ্ট তুই সহিতে পারবি ত?”

ভুলো, নবীনের মুখের দিকে চাহিয়া একটা অস্ফুট ধ্বনি করিল;—যেন সে সব কথা বুঝিতে পারিয়াছে!

ঘরের ভিতরে হঠাৎ শিশুর কান্নার শব্দ হইল। সে

## নিয়তি

নব্বীনের সর্বাঙ্গে ছোট মেয়ে—সবে আজ ছয়মাস পৃথিবীতে আসিয়াছে। নব্বীন তাড়াতাড়ি উঠিয়া তাকে কোলে তুলিয়া নিল।

মেয়েটিকে দেখিতে খুব সুন্দর। কোঁকড়া কোঁকড়া চুল, ডাব্‌রা ডাব্‌রা চোখ, ফুলো-ফুলো গাল, রাঙ্গা রাঙ্গা ঠোঁট; কিন্তু মরুভূমিতে ফুলের মত, গরীবের ঘরে দিন দিন সে শুকাইয়া যাইতেছে। আজ কয়দিন সে অন্ধারক্লিষ্টা জননীর স্তন্যপান করিয়াই কাটাইয়াছে,—অন্য দুধ তার অদৃষ্টে ~~জুটে~~ নাই।

আলোর দিকে মেয়ের মুখ ফিরাইয়া নব্বীন খানিকক্ষণ একদৃষ্টিতে শিশুর মুখ নিরীক্ষণ করিল। তারপর খুকির ননীর মতন নরম গালে একটি চুমো খাইয়া বলিল, “খুকি, আর জন্মে তুই কি মহাপাপ করেছিলি যে, এ জন্মে আমার ঘরে জলে পুড়ে মরতে এলি?”

খুকি ঘন ঘন হাত-পা নাড়িতে নাড়িতে হাসিয়া বলিল, “অক্ক, অক্ক, অক্ক!”

নব্বীন, মেয়েকে ~~নাচাইয়া~~ নাচাইয়া ঘুম পাড়াইল। শেষে, স্ত্রীর বুকের উপরে খুকিকে শোয়াইয়া দিল। সেই স্পর্শে তাহার স্ত্রী জাগিয়া উঠিল! চোখ মেলিয়া, স্তম্ভিত স্বামীকে দেখিয়া সে ঘুমের ঘোরেই হাত বাড়াইয়া নব্বীনের গলা

## মধুপর্ক

জড়াইয়া ধরিল এবং পাশ ফিরিয়া সেই অবস্থায় আবার ঘুমাইয়া পড়িল।

নবীন ধীরে ধীরে আপনার গলা হইতে স্ত্রীর হাতখানি নামাইয়া, তার ওষ্ঠে একটি চুম্বন দিয়া আপন মনে বলিল, “ঘুমোও, ঘুমোও—ষতটুকু পার ঘুমিয়ে নাও। কাল থেকে ভিখারীদের সঙ্গে ছেলে মেয়ে নিয়ে পথে শুয়ে ঘুমোতে হবে, লোকের কাছে হাত পেতে ভিক্ষে চাইতে হবে! কেউ একদুটো চাল দেবে, কেউ দুর্-দুর্ করে তাড়িয়ে দেবে। আমার মুখের দিকে চল চল চোখে তাকালেও কোন ফল হইবে না; কাঁদলেও—কেঁদে কেঁদে মরে গেলেও ভগবান্ মুখ তুলে চাইবেন না।”

টং করিয়া ঘড়ী বাজিয়া উঠিল।

টং! টং!—রাত দুইটা!

নবীন আপন মনে হিসাব করিয়া বলিল, “দুটো, তিনটে, চারটে, পাঁচটা, ছটা—আর চার ঘণ্টা! ভিখারী সেজে পথে দাঁড়াতে আর চার ঘণ্টা বাকি! আর চার ঘণ্টা আমি ভদ্রলোক আছি! মাগো—আমার মত অভাগাকে তুমি গর্ভে ধরেছিলে কেন? আজ কি আমার কান্না তুমি শুনতে পাচ্চ না?”—নবীন অশ্রুভরা চোখে স্ত্রীর মুখের উপরে মাথা রাখিয়া শুইয়া পড়িল।











